

## Chijnie ndo Jesús chronga ndo Lucas

### *Xrangíxin xroon ji i*

<sup>1</sup> Kueya nã tjaun nã ndako xrokjin nã kain nge e nduaxin kon en nchakon bake e ndo Jesús ngajinna

<sup>2</sup> xranchi juinchekuaína sen, sen xrangíxixión bikonxin ikon sen kain nge e juinche e ndo Jesús ko kuaxi sen chronga sen ti nichja ndo.

<sup>3</sup> Jan an kaxon juanchangi jian kain nge e tsikon en xrangíxixión bake e ndo Jesús. Ko jai xrokjin annta, Teófilo, kain nge e xranchi tsikon en naa ko naa,

<sup>4</sup> ixi tsichuxinnta jian kain nge e tsijinckewan annta sen.

### *Naa ndo ángel kuji ndo chronga ndo ixi tsjongí e ndo Juan Bautista*

<sup>5</sup> Nchakon bake e xi Herodes baketuen en xa nunte Judea, nti a bake e naa ndotaana bakin in Zacarías, kuachrjenixin ndo xitaana bakin in Abías. Ko janchri e ndo Zacarías bakin in jan Elisabet, ndotáchri e jan kaxon xranchrjen ndotaana Aarón.

<sup>6</sup> Yui sen jian kuanche e sen xranchi tjaun ndo Dio ko bakitikaon sen kain ti nge e kuetuan an ndo. Méxin, xro an ngisen chao xrondachro ixi je e sen chónnda sen ijje.

<sup>7</sup> Ko xro an chjan kuachón<sup>da</sup> sen ixi jan Elisabet kuituen a jan xrochón<sup>da</sup> jan chjan, ko je e sen ó tachríi sen.

<sup>8</sup> Ko tjume e naa nchakon ndo Zacarías ko xitaana, sen nche e ixra xranchi je e ndo, ku<sup>t</sup>uen en sen tsajon sen juasie sen ngajin ndo Dio.

<sup>9</sup> Xranchi kuanche e xitaana nchakon me e, ndo Zacarías kuayé e ndo ixra tixin in ndo ngaxin in nchia tjúá ndo a ndo Dio ixi tsjaaka ndo tsjoxraxé.

<sup>10</sup> Nchakon juaaka ndo tsjoxraxé ngaxin in ndo a ndo Dio, kain ni ste nduja nichje e na ndo Dio.

<sup>11</sup> Ko tuinxin ndo Zacarías bikon ndo naa ndo ángel xruan an ndo Dio ko siin ndo ángel nangoxin jian tjenka altar ti iche tsjoxraxé.

<sup>12</sup> Hora bikon ndo Zacarías ndo ángel me e, je e ndo chrinkaxrakon ndo.

<sup>13</sup> Ko ndo ángel nichja ndo ko ndachro ndo:

—Zacarías xrakon a, ixi ndo Dio kuin en ndo nge e juanchia, méxin, janchri a Elisabet sinchejongí e jan naa xjan xi ko ja a sincheki ian xjan Juan.

<sup>14</sup> Ko ja a xrochón<sup>da</sup> juaxruxin ko kueya na xroché e na ixi tsjongí e xjan me e.

<sup>15</sup> Ko chjan an ijié tsake e xjan ngajinxin ndo Dio. Ko xro an vino ko ninaa xran tsi a xjan, ko tsango xrochón<sup>da</sup> xjan Espíritue ndo Dio ti xrajíyá xjan ngaya tse e janée xjan.

<sup>16</sup> Ko je e xjan sinchekuen en xjan ni tjajna Israel, ko kueya na xrokjan na tsitikaon na ndo Dio.

<sup>17</sup> Je e ndo Juan tsitaon ndo tsjendue e ndo cha o tsj xin Ncháina, ko xrochón<sup>da</sup> ndo xraje o

juachaxin xranchi kuachónnda ndo profeta Elías, ko xronichje e ndo aséen ndotée ichjan tsoñao a na ngajin chjen en na, ko kain ni titikaon a ndo Dio tsono e na xranchi tsitikaon na ndo ko jian sinche e na ixi tsii Ncháina Cristo.

<sup>18</sup> Ko je e ndo Zacarías juanchangi e ndo ndo ángel ko ndachro ndo:

—¿Xranchi tsonóna ixi tson en ti ndachronta? Ixi jan an ó tsango tachríina ko kaxon janchri na ó nachrí jan.

<sup>19</sup> Ko je e ndo ángel juatingíexin ndo:

—Jan an Gabrielna, ko nta a kain nge e tetuan an ndo Dio. Ko kuetuanna ndo tsji i ko xrontatjua nge e jian tson en.

<sup>20</sup> Ko ixi kuitikaon a ti ndachrjan, méxin, tsonosian ko jua i xronichja xroxetjaja nchakon tson en me e.

<sup>21</sup> Ko kain ni stechón en nduja ndo a ndo Dio ixi tsachrje ndo Zacarías, stexraxaon na sonda jitonchrjen en ndo ngaxin in ndo a ndo Dio.

<sup>22</sup> Ko hora kuachrje ndo, í jua i nichja ndo. Ko xraxaon na ixi xrojan nge e bikon ndo Zacarías ngaxin in ndo a ndo Dio. Ko je e ndo ixi je o itja ndo tjakoxin ndo nge e tjaun ndo ixi nosin ndo.

<sup>23</sup> Ko juexin xetja nchakon juinche e ndo Zacarías ixra ngaxin in ndo a ndo Dio, sakjui ndo ndo e ndo.

<sup>24</sup> Ko tjume e jan Elisabet, janchri e ndo Zacarías, yaa jan chjan. Ko íkuachrjexin a jan ndo e jan na ó nchanitjao, ko jixraxaon jan:

<sup>25</sup> “Jaña ndo Dio kuajon ndo juachaxin ixi xrochónnda chjan ko ítsjanao ina na jai.”

*Ndo ángel chronga ndo ixi tsjongí e xjan Jesús*

<sup>26</sup> Kuatsinga ikjaon nchanitjao ko ndo Dio xruan an ndo ndo ángel Gabriel itsji ndo naa tjanée tjajna Galilea ndatin in Nazaret

<sup>27</sup> \*ixi nti a xronichje e ndo naa nchrichajan ndatin in María ko je e nchrichan xrachuxin a nchrichan ninaa xi. Je e nchrichan tsijate e nchrichan tsute e nchrichan naa xi ndatin in José, kuachrjenixin xa ndo rey David.

<sup>28</sup> Ko ndo ángel me e kuixin in ndo ndo a jan María, ko ndachro ndo:

—Jan an jui i tjá anta juajna ixi ndo Dio ícha tjua anta ndo ko Ncháina Dio jii ngajinnta, ícha juintanchaonnta ndo ixi ikaxin nchri!

<sup>29</sup> Ko xronka je e nchrichajan ko íkuienxin a nchrichan nge e juajna kuajon ndo ángel.

<sup>30</sup> Ko je e ndo ángel ndachro ndo:

—María, xrakon anta, ixi ndo Dio ícha tjua anta ndo.

<sup>31</sup> \*Ko jai tseyá naa chjan ngaya tseenta ko sinchejongí enta naa xjan xi ko sinchekin innta xjan Jesús.

<sup>32</sup> Ko je e xjan tsango tsetuan an xjan, ko tsin in xjan chjen en ndo Dio jii ngajní. Ko je e Ncháina ndo Dio xrochjée xjan juachaxin tsetuan an xjan xranchi baketuan an ndotáchri e xjan xranchrjen, ndo David.

<sup>33</sup> Ko je e xjan tsetuan an xjan tjajna Israel kain nchakon ko ti tsetuan an xjan ítsjexin a.

<sup>34</sup> Ko jan María juanchangi e jan ndo ángel, ndachro jan:

—¿Xranchi tson en ji i, ixi jan an rikian i xi?

<sup>35</sup> Ko juatingíexin ndo ángel, ndachro ndo:

—Espíritue ndo Dio tsii ngajinnta ko juachaxien ndo sinchekitsáanta ndo xranchi naa tsa on. Ko xjan tsjongí e xrochóna i xjan ijie, ko ndatsin in xjan chjen en ndo Dio.

<sup>36</sup> Ko kaxon jan kichuunta Elisabet yaa jan chjan maski ó nachríi jan. Ko jai, nchri bandachro na jua i xrochóna chjan, jai ó ikjaon nchanitjao yaa jan xjan.

<sup>37</sup> Méxin juachaxien ndo Dio, chao tson en kain nge e.

<sup>38</sup> Ko ndachro jan María:

—Jan an nta a xrée Nchána Dio; méxin jan an tsitika on kain nge e kuetuanna ndo xranchi ja anta ndachrona.

Ko juexin nichja ndo ángel, sakjui ndo.

### *Jan María kuitsje e jan jan Elisabet*

<sup>39</sup> Kaxon nchakon me e, jan María nteeto sakjui jan naa tjajna ngata a ijna nunte Judea.

<sup>40</sup> Ko kuiji jan tjajna nti a kuixin in jan ndo a ndo Zacarías ko jan Elisabet ko kuajon jan juajna ngajin jan Elisabet.

<sup>41</sup> Hora kuin en jan Elisabet juajna, xjan yaa jan chrinka xjan ngaya tse e jan, ko je e jan Elisabet tsango kuayé e jan juachaxien Espíritue ndo Dio.

<sup>42</sup> Ko tjume e jan Elisabet séen nichja jan ko ndachro jan:

—Ndo Dio juinchenchaoan ndo ícha ixi ikaxin nchri, ko kaxon juinchenchaon ndo chjan an.

<sup>43</sup> ¿Ngisen jan an ixi jui a kuitsjena ja a, janée Nchána?

<sup>44</sup> Ixi hora kuin an juajnáa, chrinka chjan na ngaya tse e ixi ché e xjan.

45 Ijié juaxruxin chonda ixi kuitikaoan nge e tson en, xranchi ndachro ndo Dio.

46 Ko tjume e jan María ndachro jan: Aséenna tajon juasaya ngajin Ndotána Dio.

47 Ko juaxruxin ritjén ixi ndo Dio kuantsjena ndo ijie.

48 Ndo Dio xraxaon ndo sinche e ndo jian ngajin, jan an naa nchri nóa nche e ixra ngajin ndo. Ko jai tsaxi xrondachijina na ndo Dio juinchechaoan ndo.

49 Ndo Dio chóna ndo kain juachaxin, ko juinche e ndo ijié nge e ngajin ixi je e ndo tsango tjúa ndo.

50 Ko je e ndo kain nchakon tikonóe e ndo kain ni tajon juasie ngajin je e ndo.

51 Je e ndo soji ndo ixi juinche e ndo kain nge e ko kuantsje e ndo juachaxin chóna kain ni nchejié aséen.

52 Ko kuantsje e ndo kain juachaxin chóna ni tetuan an ko juinchejié ndo kain ni nóa ixi je e na xrochóna na juachaxin.

53 Ko kuajon ndo kain nge e jian kuayé e ni chóna i ko xro an nge e kuajon ndo ngajin ngisen kueya chóna.

54 Je e ndo bingijna ndo ni tjajna Israel, ni nche e xrée ndo; ko bikonóe e ndo na,

55 ixi jaña ndache ndo sen tachrí e na xranchrjen, ndo Abraham ko kain ni tsachrjenixin ndo.

56 Ko jan María kuitu e jan ndo a jan Elisabet ní nchanitjao, ko tjume e ikjan jan ndo a jan.

### *Jongí e ndo Juan Bautista*

<sup>57</sup> Ko kuii nchakon sinchejongí e jan Elisabet chjen en jan, ko juinchejongí e jan naa xjan xi.

<sup>58</sup> Méxin, ni ste tjenka ndo a jan ko ni nchando a jan, ikjui na kuitsje e na jan ko kuintee na juaxruxin ngajin jan ixi kono e na ixi ndo Dio tsango bikonóe e ndo jan.

<sup>59</sup> Kuitja ijní nchakon, kuii na ixi tsayé e ichjan chji e ni judío, ko tjaun na xrokuin in xjan Zacarías xranchi tin in ndotée xjan.

<sup>60</sup> Ko ndachro janée xjan:

—Na i. Xrokonda tsin in xjan Juan.

<sup>61</sup> Ko je e na juatingíexin na:

—¿Sonda tsin in xjan jaña? Xro an sen ndúya tin in na jaña.

<sup>62</sup> Tjume e itja na juanchangíexin na ndotée xjan xranchi tjaun ndo tsin in xjan.

<sup>63</sup> Ko je e ndo juanchia ndo tu o ntáa ko ikjin ndo: “Je e xjan tsin in xjan Juan.” Ko kain ni ste nti a xronka na.

<sup>64</sup> Ko tuinxin íjngo kuaxi nichja ndo Zacarías, ko kuaxi kuajon ndo juasie ndo ngajin ndo Dio.

<sup>65</sup> Kain ni ste tjenka nchando a sen xronka na, ko kain tjajna ngata a ijna Judea kuin en na nge e kon en.

<sup>66</sup> Ko kain ni kuin en nge e kon en, xraxaon na ko ndachro na:

—¿Nge e ixra sinche e ichjan ña?

Ko nduaxin ndo Dio tsango jii ndo ngajin xjan.

### *Ndo Zacarías itsje ndo*

<sup>67</sup> Ko ndotée xjan ndo Zacarías me e ícha kuayé e ndo juachaxien Espíritue ndo Dio ko nichja ndo chijnie ndo Dio ko ndachro ndo:

<sup>68</sup> Juasie Ndotáina Dio titikaon ni tjajna Israel ixi je e ndo kuii ndo tsingijna ndo tjajnéé ndo.

<sup>69</sup> Ko je e ndo xruan an ndo ngisen ícha soji tsingijna tsachrjengíexin ijie chóna chujni, naa sen kuachrjenixin ndo David, ngisen juinche e ixra ngajin ndo Dio.

<sup>70</sup> Jaña nichja ndo Dio nichjaxin ndo sen chronga chijnie ndo Dio ó sa ó

<sup>71</sup> ndache ndo sen ixi tsingijna ndo tsantsje e ndo juachaxin kain ni ningakoina.

<sup>72</sup> Ko tsikonóe e ndo sen tachrí ina kuintee sa ó, ko xraxaon ndo ti juao ndo sen tjajnéé ndo ó sa ó.

<sup>73</sup> Ko ji i tsindache ndo Dio ndo tachrí ina xranchrjen, ndo Abraham

<sup>74</sup> ixi tsingijnana ndo ixi tsitua i xi ningakoina, ko chao sinche ena ixra ngajin ndo Dio ko xrox-rakon ana,

<sup>75</sup> ixi ícha tjúa tsake e aséeina ko jian tsitikaonna chijnie ndo Dio,

ko tsojuna ngajin ndo Dio kain nchakon.

<sup>76</sup> Ko ja a, chjan na, ja a xrokjan naa ngisen xronichja chijnie ndo Dio jii noi,

ko ja a sa ó tsitaon en Ncháina,\*  
ko ja a sinchenataonxian chaoé ndo,

<sup>77</sup> ixi tsono e ni tjajnéé ndo ixi sinchemé e ndo kain ijie chóna na

ko tsajon ndo juachaxin tsitjáña i na.

---

\* **1:76 Ncháina** Señor Ncháina Jesús o Ncháina Dio



78 Ixi je e Ndotáina Dio tsango tjaunna ndo ko tsango tikonóa ina ndo,

ko je e ndo tsajon ndo xro i tsingasáñajna kain nchakon,

79 ko tsajon ndo xro i tsingasáñaxin kain ni jii ti tsango naxixe e.

Ko je e ndo tsake e ndo tutéina ngata a cha o tajon juaxruxin.

80 Ko je e xjan bangi xjan ko konsoji aséen xjan. Ko bake e xjan ngataon ijngi ti xro an ngisen ste, xetjaja nchakon konoxin xjan ngajin ni tjajna Israel.

## 2

### *Jongí e xjan Jesús* (Mt. 1:18-25)

1 Nchakon me e bake e naa xi ícha baketuan an ko bakin in xa Augusto César, ko je e xa kuetuan an xa xixintaxin kain na xixi tsono e xa ngijan in chujni chóna kain tjajna.

2 Méxin, ti sa ó kuixintaxin chujni xi Cirenio baketuan an xa nunte Siria.

3 Ko kuetuen en na kain na satsji na tjajna tikinixin en na xixi nti a tsixintaxin na.

4 Méxin, ndo José kuachrxjin ndo tjajna Nazaret tikinixin en Galilea, ko sakjui ndo tjajna Belén nunte Judea ti tsijongíexin ndo David, xixi ndo José kuachrxjenixin ndo ndo tachrí e ndo xranchrjen, ndo David.

5 Méxin sakjui ndo José tjajna Belén, je e ndo ko janchri e ndo jan María. Ko je e jan María ó yaa jan ichjan.

<sup>6</sup> Ko nchakon jii sen tjajna Belén, kuitja nchakon tsjongí e chjen en jan María.

<sup>7</sup> Ko nti a kuixin in sen naa nchia ti tejua iko ixi kuitja i sen nchia no tsitu e sen. Méxin, nti a jongíexin chjen en jan María, xjan sa ó, ko je e jan kuintsía jan xjan manta ko bākē e jan xjan ngaya ti nexin iko.

*Sen ángel ko ni stendáa kutuchjon*

<sup>8</sup> Tiie me e tjenka tjajna Belén kaxin nā stendáa nā kutuchjoen nā ngataon ijngi.

<sup>9</sup> Me e tuinxin konoxin naa ndo ángel xruan an ndo Dio, ko bika o ndo chjiixrué ndo Dio juinchen-gasáña nguixin ngandajin nā; ko je e nā tsango xronka nā.

<sup>10</sup> Ko je e ndo ángel ndache ndo nā:

—Xrakon anta ixi jan an bikian juajna jian, méxin, xrochondanta juaxruxin ko kain ni tjajna kaxon.

<sup>11</sup> Tjajnée ndo David jai jongíexin naa chjan, xjan me e sinchemé e xjan kain ijje chónnda chujni, ko je e xjan Ncháina Cristo.

<sup>12</sup> Itjinta tjajna, nti a tsinchíinta xjan jitsjía xjan manta ko jii xjan ti no nexin iko.

<sup>13</sup> Xrajíi ndo ángel, tuinxin konoxin ícha kueya sen ángel kuixin sen ngajní,\* ko itsje sen ko kuajon sen juasaya ngajin ndo Dio jii ngajní, ko ndachro sen:

<sup>14</sup> ¡Juasie ndo Dio jii ngajní ixi tsango chónnda ndo juachaxin!

Ko juaxruxin tsintee kain ni ste ngata a nunte, kain ni titikaon ndo.

---

\* **2:13 ngajní** cielo

15 Ko tjume e kain sen ángel sakjui sen ngajní, ko ni stetsje e kutuchjoen ndache kichuu na:

—Ichjina tjajna Belén, tsitsje ena nge e kon en nti a xranchi ndachro ndo ángel xruan an ndo Dio.

16 Ko nteeto sakjui na bikitsje e na jan María ko ndo José, ko ichjan jii xjan ti tejua iko.

17 Hora bikon na xjan, beki na kain ti ndachro ndo ángel kondee je e xjan

18 ko tsango xronka kain chujni kuin en ti ndachro na.

19 Ko je e jan María jixraxaon jan ngaya aséen jan kain nge e kon en.

20 Ni stetsje e kutuchjoen ikjan na ti kuintu e na kuée na, ko kuajon na juasaya ngajin ndo Dio ixi kain nge e kuin en na ko bikon na, kain nge e kon en xranchi ndachro ndo ángel.

### *Ndotée xjan Jesús bikao sen xjan tjajna Jerusalén*

21 \*Nchakon kuitja xjan Jesús ijní nchakon, chjée sen xjan chji e ni tjajnée xjan ko juinche kin in sen xjan Jesús, xranchi kuetuan an ndo ángel ngajin jan María nchakon xrayá i jan xjan.

22 Kuitja nchakon chao jii jan María xranchi tsiketuan an ley tsikjin ndo Moisés, ko tjume e je e jan ko ndo José sabikao sen xjan tjajna Jerusalén ixi ndo Dio sinchenciaon† ndo xjan.

23 Ko jaña juinche e sen xranchi jitaxin xroon kuituan an ndo Dio: “Kain xjan xi, xjan kóña sa ó, tikinixin en xjan ndo Dio.”

24 Méxin, jan María ko ndo José sakjui sen ndo a ndo Dio ixi bikao sen iko tsen en nti a xranchi

jítaxin xroon tsituan an ndo Dio tson en, méxin xrokuajon sen yuu kuntúá najni o yuu kuxenta.

<sup>25</sup> Nchakon me e tjanya Jerusalén bake e naa ndo tachríi ndatin in Simeón. Je e ndo tsango jian ndo, ko bakajon ndo juasaya ngajin ndo Dio, ko chón en ndo xroxruan an ndo Dio ngisen tsingijna tjanya Israel. Méxin Espíritue ndo Dio jii ngajin ndo Simeón

<sup>26</sup> ko Espíritue ndo Dio juincheno e ndo Simeón ixi xratsen a ndo tsikonja ndo ndo Cristo, ndo xroxruan an ndo Dio.

<sup>27</sup> Ko tjume e Espíritue ndo Dio juinchexraxaon ndo Simeón xrokjui ndo ndo a ndo Dio. Ko nchakon me e kuij jan María ko ndo José bikao sen xjan Jesús ngaxin in ndo a ndo Dio ixi kuitikaon sen xranchi tsiketuan an ley.

<sup>28</sup> Ko tjume e ndo Simeón joa ndo xjan Jesús ko kuajon ndo juasaya ngajin ndo Dio ko ndachro ndo:

<sup>29</sup> Jai, Ncháina, ó kuitja ti ndachronta.

Jai chao tájonnta juachaxin juaxruxin tsen en na,

<sup>30</sup> ixi ó bikon ngisen kuij tsantsje kain ijie chondana,

<sup>31</sup> ko ja anta tsixruan annta xjan

ko kain tjanya tsichuxin na xjan.

<sup>32</sup> Je e xjan xro i tsingasáña ngajin kain tjanya, ni je a tjanya Israel,

ko tsajon na juasaya ngajin tjanánta Israel ixi nti a konoxin xjan Jesús.

<sup>33</sup> Ko ndo José ko jan María, janée xjan Jesús, xronka sen ixi jaña ndachro ndo Simeón xranchi sinche e xjan Jesús.

<sup>34</sup> Ko tjume e ndo Simeón juinchenchaon ndo sen ko nichje e ndo jan María, janée xjan ko ndachro ndo:

—Chjan an me e tsika o itsjé nge e tangi tsikonni. Méxin, kueya ni tjajna Israel, kaxin n̄a tsitikaon a n̄a ko ikaxin n̄a tsitikaon n̄a chijnie xjan ko jian tsake e n̄a.

<sup>35</sup> Ko jaña tsonoxin xranchi xraxaon nguŋgu aséen n̄a. Ko kain nge e tson en sintani a xranchi naa chika yao tsatsingatu u asáan ja a, María.

<sup>36</sup> Ko kaxon nti a bake e naa janachri profeta, nichja jan chijnie ndo Dio ko ndatin in jan Ana. Ndotée jan bakin in ndo Fanuel, ko je e ndo, ndo tachrí e ndo xranchrjen, ndo Aser. Je e jan Ana ó tsango nachríi jan, ko xranchríhajan jan tsikute e jan ko bekao jan ndoxi e jan je o yaato nano.

<sup>37</sup> Ko jai ó ka an jan ko noókán ko noó nano chóna jan. Ko tahrjexin a jan ni ngo ndo a ndo Dio; ko ndi ao bake e jan tiie ko nchakon bakajon jan juasaya ngajin ndo Dio; ko kaxin nchakon bajine a jan ixi nichje e jan ndo Dio.

<sup>38</sup> Ko nchakon me e jan Ana konchjiñe e jan ko juangíxin jan kuajon jan juasie jan ngajin ndo Dio, ko kuaxi jan nichja jan ixi xjan Jesús, nichje e jan kain ni stechón en nchakon xroxruan an ndo Dio ngisen tsingijna ni tjajna Jerusalén.

*Ndotée xjan Jesús kjanka o sen xjan tjajna Nazaret*

<sup>39</sup> \*Nchakon juexin juinche e jan María ko ndo José kain nge e ndachro chijnie ndo Dio, ikjan sen tjajnée sen Nazaret, nunte Galilea.

<sup>40</sup> Ko xjan Jesús ícha bangi xjan, ko ícha konsoji xjan, ko ícha no e xjan jian kain nge e ixí ndo Dio bakajon ndo juachaxin ngajin xjan.

*Kuitja sen xjan Jesús ngaxin in ni ngo*

<sup>41</sup> Ndo José ko jan María, janée xjan Jesús, bakji sen tjajna Jerusalén kain nano ixí tsake e sen nti a ti kia pascua.

<sup>42</sup> Ko nchakon kuitja xjan Jesús teyuu nano, je e sen ko je e xjan sakjui sen tjajna Jerusalén xranchi kuituen en sen ixí kia pascua.

<sup>43</sup> Nchakon juexin kia pascua, kua sen cha o itji tjajnée sen. Ko xjan Jesús tsikitu e xjan nti a tjajna Jerusalén, ko ndo José ko jan María, janée xjan, konoe a sen tsikitu e xjan.

<sup>44</sup> Je e sen xraxaon sen ixí xjan Jesús jitji xjan ngakjen en sen kaxin, ko sakjui sen nchijí naa nchakon. Ko tjume e juée sen xjan ngajin ni kichuu sen ko ni chúxin sen.

<sup>45</sup> Ko kuitja i sen xjan, méxin ikjan sen tjajna Jerusalén ko juée sen xjan nti a.

<sup>46</sup> Ko nchakon nínxin kuitja sen xjan ngaxin in ni ngo ndo a ndo Dio. Nti a jii xjan nunte ngusine kain sen tjako chijnie ndo Dio ko jitin en xjan ti ndachro sen, ko jitjanchiangí e xjan sen.

<sup>47</sup> Ko kain chujni jitin en ti ndachro xjan, xronka na ixí tsango jian no e xjan ko jian tjate e xjan kain nge e tjanchangí e sen xjan.

<sup>48</sup> Ko xronka ndo José ko janée xjan hora bikon sen ti jii xjan ngusine sen no e. Ko janée xjan ndachro jan:

—Chjan na, ¿sonda jaña juinche e? Ndotáa ko jan an yaana juachjaon chrjiténa ja a.

49 Ko juatingíexin xjan Jesús:

—¿Sonda tjeéninta? ¿Á noa inta ixi jan an xrokonda sinta a xrée Ndotána?

50 Ko je e sen kuienxin a sen nge e ndachro xjan.

51 Ko tjume e sabikao sen xjan Jesús tjajnée sen, tjajna Nazaret, ko xjan Jesús baktikaon xjan sen. Ko jan María, janée xjan, ngaya aséen jan xraxaon jan kain nge e kon en.

52 Ko ícha bangi xjan ko ícha kono e xjan, ko ijié juachaxin kuajon ndo Dio ngajin xjan, ko kain na tsango tjue e na xjan.

### 3

*Ndo Juan bake e ndo ngata a jna*  
(Mt. 3:1-12; Mr. 1:1-8; Jn. 1:19-28)

1 Ó chónnda tena ó nano baketuan an xi Tiberio César, ko xi Poncio Pilato baketuan an xa nunte Judea, ko xi Herodes baketuan an xa nunte Galilea, ko xi kichuu xi Herodes ndatin in Felipe baketuan an xa nunte Iturea ko nunte Traconite, ko xi Lisantias baketuan an xa nunte Abilinia.

2 Ko xi Anás ko xi Caifás xitaana ícha tetuan an. Nchakon me e ndo Dio, nichje e ndo ndo Juan, chjen en ndo Zacarías, xjan bake e ntajie.

3 Ko ndo Juan ikjui ndo kain tjajna ngande e inda jitinga ndatin in Jordán ko ndache ndo kain na ixi xrokonda tsintu e na ti ndako a nche e na ko tsikitée na ixi ndo Dio jaña sinchemé e ndo kain ijié chónnda na.

4 Jaña jitaxin xroon tsikjin ndo profeta Isaías ndachro:

Naa tée sen nichja ntajie tuyako ko ndachro:

“Nchekonchjiannta cha o tsaji Ncháina,

tantje enta naa cha o nao itji.

<sup>5</sup> Ko kain tsaaka tsingachjian inche,  
ko kain jna ko kain ngande e jna, jian  
tsonataunxin;

ko kain cha o nango itji, xroxendue e cha o  
ko kain cha o nataonxin a, tsonataunxin cha o.

<sup>6</sup> Méxin, kain ni ste ngata a nunte nti i tsono e na  
ngisen xruan an ndo Dio,  
tsantsje ndo ijié chónnda chujni.”

<sup>7</sup> \*Nchakon me e kueya na bakonchjiñe e na ixi  
ndo Juan tsikitée ndo na, ko je e ndo ndache ndo  
na:

—Ja anta tsikachrjenixinnta kunchee! ¿Ngisen  
ntatjunta satsinge enta juañaue ndo Dio ti ó tu-  
inxin tsii?

<sup>8</sup> \*Xrokonda tsindoxinnta ti ndako a nche enta  
ko jian titikaonnta ti tetuan an ndo Dio.  
Ko Ndachro anta: “Jan anna ícha jianna ixi  
kuachrjenixinna ndo Abraham.” Ko jan an  
nduaxin ntatjunta ixi ndo Dio chao sinchéña  
ndo ixro ji i xrokjan xjantié ndo Abraham.

<sup>9</sup> \*Méxin, ó jichón en chika jacha xrochrijinxin  
ntaa, nue e ntaa xrochrijinxin ntaa. Méxin kain  
ntaa tajon a itu cháña tsjanka na ntaa ko tsaa ntaa  
xro i.

<sup>10</sup> Ko tjume e juanchangi e na ndo Juan ko  
ndachro na:

—¿Nge e xrokonda sinta ana?

<sup>11</sup> Ko juatingíexin ndo Juan ko ndachro ndo:

—Ngisen chónnda yuu manta xrochjée sen naa  
manta ni xro an nge e chónnda. Ko ngisen chónnda  
nge e sine xrochjée sen ni chónnda i.



<sup>12</sup> \*Ko konchjiñe e kaxin ni xenge e i na tomi tjanchia xi tetuan an ko kaxon tjaun na tsikitée na, méxin, juanchangi e na ndo Juan:

—Maestro, ¿nge e xrokonda sinta ana jan ana?

<sup>13</sup> Ko je e ndo ndachro ndo:

—Je o tjanchianta ti nduaxin sínká na.

<sup>14</sup> Ko kaxon kaxin xisoldado juanchangi e xa ndo Juan:

—Kaxon jan ana, ¿nge e sinta ana?

Ko je e ndo juatingíexin ndo:

—Tantsje anta chujni nge e chóna na, ko nchexronka inta na ixi nge e juinche a na, ko take énta juaxruxin ixi je o tomi tjachanta.

<sup>15</sup> Kain ni ste nti a tjao na ixi je e ndo Juan á ndo Cristo ndo.

<sup>16</sup> Ko ndo Juan ndache ndo kain na:

—Jan an nduaxin ntatjunta ixi jan an tikitéxinnta inda, ko tsji naa ngisen tsikitéxinnta ndo ixi Espíritue ndo Dio ko xro i. Ko je e ndo ícha ijié juachaxin chóna ndo ixi juachaxin chonda jan an. Jan an tikinixinna i tsoxindanga a tjuée katée ndo.

<sup>17</sup> Ko je e ndo ó bika o ndo naa kachrintu ixi tsjenduaxin ndo noatrigo ixi tsachrjekje en xineno. Tsjatsi in ndo kain noatrigo ti tikinixin tsji in no, ko kain xineno tsjánka ndo ti xro i jua i tsanga.

<sup>18</sup> Jaña ndachro ndo Juan ko ndache ndo na ikaxin nge e ko chronga ndo chijni jian.

<sup>19</sup> \*Ko kaxon kuyakutee ndo Juan xi Herodes, xi tetuan an, ixi jikao xa nchri Herodías, nchrinchri e xikichuu xa, xi ndatin in Felipe, ko kaxon ndo

Juan koñao ndo ngajin xi Herodes ixi ícha nge e ndako a juinche e xa.

<sup>20</sup> Ko xi Herodes kuitikaon a xa, ko ícha chinga juinche e xa ko kaxon bije e xa ndo Juan ndo achjiso.

*Bikitée ndo Jesús*

*(Mt. 3:13-17; Mr. 1:9-11)*

<sup>21</sup> Ko nchakon xrajitikitée ndo Juan kueya na, kaxon kuij ndo Jesús bikitée ndo. Ko hora jinichja ndo Jesús ngajin ndo Dio xitje e ngajní

<sup>22</sup> \*ko Espíritue ndo Dio xingajin xranchi naa kuntúá ko bake e ba ngata a jaa ndo Jesús ko kuin enni nichja naa ngisen jii ngajní ndachro:

—Ja a chjan na ko tsango tjua a.\* Ko jan an ritjén juaxruxin ngajian.

*Kain ndotáchri e xranchrjen ndo Jesús*

*(Mt. 1:1-17)*

<sup>23</sup> Ndo Jesús kuachónnda ndo xranchi ikánte nano nchakon ti juangíxin ndo xrée ndo.

Ko kain na xraxaon na ixi je e ndo Jesús chjen en ndo José.

Ko ndo José chjen en ndo Elí,

<sup>24</sup> ko ndo Elí chjen en ndo Matat,

ko ndo Matat chjen en ndo Leví,

ko ndo Leví chjen en ndo Melqui,

ko ndo Melqui chjen en ndo Jana,

ko ndo Jana chjen en ndo José.

<sup>25</sup> Ko ndo José chjen en ndo Matatías,

ko ndo Matatías chjen en ndo Amós,

ko ndo Amós chjen en ndo Nahum,

---

**3:22** Mt. 3:17; Mr. 1:11; Lc. 9:35. \* **3:22** tjua a yo te amo

ko ndo Nahum chjen en ndo Esli,  
ko ndo Esli chjen en ndo Nagai,  
<sup>26</sup> ko ndo Nagai chjen en ndo Maat,  
ko ndo Maat chjen en ndo Matatías,  
ko ndo Matatías chjen en ndo Semei,  
ko ndo Semei chjen en ndo José,  
ko ndo José chjen en ndo Judá.  
<sup>27</sup> Ko ndo Judá chjen en ndo Juana,  
ko ndo Juana chjen en ndo Resa,  
ko ndo Resa chjen en ndo Zorobabel,  
ko ndo Zorobabel chjen en ndo Salatiel,  
ko ndo Salatiel chjen en ndo Neri.  
<sup>28</sup> Ko ndo Neri chjen en ndo Melqui,  
ko ndo Melqui chjen en ndo Adi,  
ko ndo Adi chjen en ndo Cosam,  
ko ndo Cosam chjen en ndo Elmodam,  
ko ndo Elmodam chjen en ndo Er.  
<sup>29</sup> Ko ndo Er chjen en ndo Josué,  
ko ndo Josué chjen en ndo Eliezer,  
ko ndo Eliezer chjen en ndo Jorim,  
ko ndo Jorim chjen en ndo Matat.  
<sup>30</sup> Ndo Matat chjen en ndo Leví,  
ko ndo Leví chjen en ndo Simeón,  
ko ndo Simeón chjen en ndo Judá,  
ko ndo Judá chjen en ndo José,  
ko ndo José chjen en ndo Jonán,  
ko ndo Jonán chjen en ndo Eliaquim.  
<sup>31</sup> Ndo Eliaquim chjen en ndo Melea,  
ko ndo Melea chjen en ndo Mainán,  
ko ndo Mainán chjen en ndo Matata,  
ko ndo Matata chjen en ndo Natán.  
<sup>32</sup> Ndo Natán chjen en ndo David,

ko ndo David chjen en ndo Isaí,  
ko ndo Isaí chjen en ndo Obed,  
ko ndo Obed chjen en ndo Booz,  
ko ndo Booz chjen en ndo Salmón,  
ko ndo Salmón chjen en ndo Naasón.

<sup>33</sup> Ndo Naasón chjen en ndo Aminadab,  
ko ndo Aminadab chjen en ndo Aram,  
ko ndo Aram chjen en ndo Esrom,  
ko ndo Esrom chjen en ndo Fares,  
ko ndo Fares chjen en ndo Judá.

<sup>34</sup> Ko ndo Judá chjen en ndo Jacob,  
ko ndo Jacob chjen en ndo Isaac,  
ko ndo Isaac chjen en ndo Abraham,  
ko ndo Abraham chjen en ndo Taré,  
ko ndo Taré chjen en ndo Nacor.

<sup>35</sup> Ndo Nacor chjen en ndo Serug,  
ko ndo Serug chjen en ndo Ragao,  
ko ndo Ragao chjen en ndo Peleg,  
ko ndotée ndo Peleg me e ndo Heber,  
ko ndo Heber chjen en ndo Sala.

<sup>36</sup> Ndo Sala chjen en ndo Cainán,  
ko ndo Cainán chjen en ndo Arfaxad,  
ko ndo Arfaxad chjen en ndo Sem,  
ko ndo Sem chjen en ndo Noé,  
ko ndo Noé chjen en ndo Lamec.

<sup>37</sup> Ndo Lamec chjen en ndo Matusalén,  
ko ndo Matusalén chjen en ndo Enoc,  
ko ndo Enoc chjen en ndo Jared,  
ko ndo Jared chjen en ndo Mahalaleel,  
ko ndo Mahalaleel chjen en ndo Cainán.

<sup>38</sup> Ndo Cainán chjen en ndo Enós,  
ko ndo Enós chjen en ndo Set,

ko ndo Set chjen en ndo Adán,  
ko ndo Adán chjen en ndo Dio.

## 4

*Xixron anxrée tjaun xa xrojuincheye e xa ndo Jesús*

*(Mt. 4:1-11; Mr. 1:12-13)*

<sup>1</sup> Ndo Jesús tsango chóna ndo juachaxien Espíritue ndo Dio, ko tjume e kjanxin ndo ti jii inda jitinga ndatin in Jordán. Ko Espíritue ndo Dio bikao ndo ntajie.

<sup>2</sup> Nti a bake e ndo yuu ikán nchakon, ko kain nchakon me e juine a ndo, ko tjume e kuen en ndo jinta ko Xixron anxrée tjaun xa xrojuincheye e xa ndo.

<sup>3</sup> Ko je e Xixron anxrée ndache xa ndo Jesús:  
—Siá nduaxin ja a chjen en ndo Dio, ndache ixro ji i xrokjan ixro nutja.

<sup>4</sup> Ko juatingéxin ndo Jesús ko ndachro ndo:  
—Ndachro xroon jitaxin chijnie ndo Dio: “Je a je o nutja tsechónxin chujni. Kaxon ixo chijnie ndo Dio tsechónxin na.”

<sup>5</sup> Ko tjume e Xixron anxrée bikao xa ndo Jesús ngata a naa ijna ícha nui ko juako e xa ndo kain tjauna jii ngata a nunte.

<sup>6</sup> Ko ndachro Xixron anxrée:  
—Jan an xrotjá a juachaxin ko kain ti tjintee chóna kain tjauna ixo jan an kuayá a kain ji i, ko chao xrotjá a kain ji i ngajin ngisen jan an tja on.

<sup>7</sup> Méxin siá ja a tsake exian ntatuchi ian ko xrochjana juasaya, kain ji i tsaye é.

<sup>8</sup> Ko juatingéxin ndo Jesús ko ndachro ndo:

—Tingaxintuan satjia, Xixron anxrée ja a. Ndachro chijnie ndo Dio: “Tsájuan juasaya ngajin Ncháa ndo Dio, ko je o ngajin je e ndo sinche é ixra.”

<sup>9</sup> Ko tjume e Xixron anxrée bikao xa ndo Jesús tjajna Jerusalén, ko juinçekajin in xa ndo ti ícha nuí ngata a ni ngo ko ndachro xa:

—Siá nduaxin ja a chjen en ndo Dio, chrinka ti nunte;

<sup>10</sup> ixi ndachro chijnie ndo Dio:

Ndo Dio tsetuen en ndo sen ángel ixi xrotsengia sen,

<sup>11</sup> ko ngaya itja sen tsake e, ixi tsontengíxin a tutáa ixro.

<sup>12</sup> Ko ndo Jesús juatingíexin ndo ndachro ndo:

—Kaxon ndachro chijnie ndo Dio: “Tsaké a naa nge e ixi tsikuan á chao sinche e ndo.”

<sup>13</sup> Ko Xixron anxrée jua i juincheye e xa ndo Jesús, ko je e xa sajuixin xa ti ndo Jesús kaxin nchakon.

*Juangíxin Ndo Jesús juinçekuen en ndo chujni nunte Galilea*

*(Mt. 4:12-17; Mr. 1:14-15)*

<sup>14</sup> Ko tjume e Ndo Jesús ikjan ndo nunte Galilea ko tsango chóna ndo juachaxien Espíritue ndo Dio. Ko kain ni nti a teki na kain ti juinche e ndo Jesús.

<sup>15</sup> Ko je e ndo juinçekuen en ndo chujni chijnie ndo Dio ngaxin in ni ngo ste kain tjajna nti a, ko kain na kuajon na juasaya\* ngajin ndo.

---

\* **4:15 juasaya** respeto, honor

*Ndo Jesús bake e ndo tjajna Nazaret  
(Mt. 13:53-58; Mr. 6:1-6)*

<sup>16</sup> Ko tjume e ndo Jesús sakjui ndo tjajna Nazaret, ti no bangixin ndo. Ko nchakon sábado tjoké e na, kuixin in ndo ningue ni israelita ixi jaña kuanche e ndo. Ko bingatjen ndo Jesús ixi sinchekuanxin ndo ti jitaxin xroon chijnie ndo Dio.

<sup>17</sup> Ko chjée na ndo xroon tsikjin ndo kuanichjixin chijnie ndo Dio ó sa ó, ndo Isaías. Ko je e ndo kuantje e ndo xroon ko juée ndo ti jitaxin ja in:

<sup>18</sup> Espíritue ndo Dio jii ngata ana,  
ko kuayá a juachaxin xronichja chijnie ndo tsayé e ni nóa.

Xruan anna ndo ixi syntaxruan an ni tangi ste,  
ko tsantsje jíee ni steje e,  
ko syntaxruan an ni tikon a;  
ko tsingijna ni stechrúa,

<sup>19</sup> ko xrontatjan na ixi kuu nchakon tsingijna na  
ndo Dio ko tsantsje ndo ijié chóna na.

<sup>20</sup> Ko tjume e ndo Jesús bije e ndo xroon, ko kuajon ndo xroon ngajin xi jinche e ixra ni ngo, ko je e ndo bake e ndo nunte. Ko kain ni ste nti a jian stetsje e na ndo.

<sup>21</sup> Ko kuaxi nichja ndo:

—Jai kuitja nchakon ndachro chijnie ndo Dio, chijni kuin ennta.

<sup>22</sup> Ko kain na stetjao kichuu na kondee xranchi jian jinichja ndo, ko xraxaon na tsango chaxro ti nge e nichja ndo. Ko juanchangi e kichuu na:

—¿Á je a xi ji i chjen en ndo José?

<sup>23</sup> Ko ndo Jesús ndache ndo na:

—Nduaxin xrondachijintana chijni ji i: “Ja a xi nchexruan, ja ua toxruan an.” Ko kaxon xrondachijintana: “Ti kuin anna juinche e tjajna Capernaum, jaña nche e kaxon nti i tjajnáa.”

<sup>24</sup> \*Ko xrajnichja ndo, ko ndachro ndo:

—Nduaxin xrontatjunta xro an sen profeta nichja chijnie ndo Dio, tsitikaon nã ndo ni tjajnéé ndo.

<sup>25</sup> Ko jan an nduaxin ntatjunta ixi bake e itsjé nchri ka an nunte Israel nchakon bake e ndo profeta Elías, naa ndo kuanichja chijnie ndo Dio ó sa ó, nchakon me e kui a ichrin ní nano kutu o ko tsango bake e jinta nchijí tjajna nti a.

<sup>26</sup> Ko ndo Dio xruan i ndo ndo Elías xrokuitsje e ndo ngixe i nchri ka an tjajna Israel. Na i. Xruan an ndo ndo Elías itsji ndo ngajin naa nchri ka an bake e tjajna Sarepta, tjenka tjajna Sidón ixi tsingijna ndo nchra.

<sup>27</sup> Kaxon nunte Israel kuintee kueya chujni níexin ichin lepra nchakon bake e ndo profeta Eliseo, ko xruan i ndo Dio ndo Eliseo ngisen xrokuitsje e ndo ngixe i chujni níexin ichin lepra nti a. Je o ndo Naamán kuixin tjajna Siria, me e ndo koxruen en.

<sup>28</sup> Ko kain ni ste ngaxin in ni ngo kuin en nã jaña, ko tsango koñao nã.

<sup>29</sup> Bingatjen nã ko kuantsjexin nã ndo Jesús nti a, ko bikao nã ndo ngande e tjajna ngata a ti ijnã ícha nui ixi tjaun nã xrojuinchengandatjen nã ndo ijnã me e.

<sup>30</sup> Ko je e ndo Jesús kuatsinga ndo ngakjen en nã ko sakjui ndo.



*Naa xi bachóna xa espíritue Xixron anxrée*  
(Mr. 1:21-28)

<sup>31</sup> Ko tjume e ndo Jesús sakjui ndo tjajna Capernaum, naa tjajna tikinixin en tjajna Galilea ko kain sábadó nchakon tjoké e na nchekuen en ndo ni ste nti a.

<sup>32</sup> \*Ko ni stetin en juinche e na juaxruxin xranchi kuanchekuen en ndo na ixi chijnie ndo chóna ijié juachaxin.

<sup>33</sup> Ko ngaxin in ni ngo nti a jii naa xi chóna espíritue Xixron anxrée ko séen kuyako xa ko ndachro xa:

<sup>34</sup> —Tintunana, Jesús tjajna Nazaret. ¿Á jui ia ixi sinchetjáñana? Jan an chuxian ixi ja a naa ngisen ícha tjúa xruan an ndo Dio.

<sup>35</sup> Tjume e ndo Jesús kuyakutee ndo espíritue Xixron anxrée, ko ndachro ndo:

—¡Tenkua, ko tachrjexian xi ña!

Tjume e je e espíritue Xixron anxrée juanka xi me e nunte ngatoxin ikon kain ni ste nti a. Ko tjume e kuachrje espíritue Xixron anxrée ko juinchenie a xa xi me e.

<sup>36</sup> Kainko na xronka na, ko ndache kichuu na:

—¿Nge e chijni jian nichja ndo Jesús? Ixi je e ndo chóna ndo ijié juachaxin ko tetuen en ndo espíritue Xixron anxrée ko titikaon, tachrje ko satji espíritu.

<sup>37</sup> Ko kain tjajna nti a binga chijni xranchi nchexruen en ndo Jesús kain na ko xranchi nichja ndo.

*Ndo Jesús juinchexruen en ndo jachée ndo Simón Pedro*

*(Mt. 8:14-15; Mr. 1:29-31)*

<sup>38</sup> Tjume e ndo Jesús kuachrjexin ndo ni ngo ko sakjui ndo a ndo Simón Pedro. Ko jachée ndo Pedro tsango níexin jan súa. Méxin, kuinóatée sen ngajin ndo Jesús ixi sinchexrjuen en ndo jan.

<sup>39</sup> Ko ndo Jesús kuisée ndo ti jitsinga jan, ko kuyakutee ndo súa ko je e súa kuachrje súa. Ko tuinxin bingatjen jan ko kuajon jan juine sen.

*Ndo Jesús juinchexruen en ndo kueya ni ni e*

*(Mt. 8:16-17; Mr. 1:32-34)*

<sup>40</sup> Ko kuitaon nchakon, kain ni chónnda ni ni e, níexin n̄a ngixe i ichin, bikao n̄a n̄a ti jii ndo Jesús; ko je e ndo bake e ndo itja ndo ngata a nguungu n̄a, ko koxruen en kain n̄a.

<sup>41</sup> Ko itsjé ni ni e kuantsjexin ndo espíritue Xixron anxrée ko hora tachrje espíritu tuyako ko ndachro:

—Ja a chjen en ndo Dio.

Ko ndo Jesús kuyakutee ndo espíritue Xixron anxrée ko kuintue a ndo xronichja xa ixi je e xa no e xa ixi je e ndo Jesús, ndo Cristo.

*Ndo Jesús juinchekuen en ndo ni ste nunte Galilea*

*(Mr. 1:35-39)*

<sup>42</sup> Ko ó bingasáña je e ndo Jesús kuachrjexin ndo tjajna me e, ko sakjui ndo nunte xro an chujni ste. Ko je e n̄a juée n̄a ndo ko ikjui n̄a ti no jii ndo. Ko tingakon en n̄a ndo ixi tjaun a n̄a satsji ndo inaa tjajna.

<sup>43</sup> A je e ndo Jesús ndachro ndo:

—Jan an xrokonda itsji ikaxin tjanya ixi xrontat-jan na xranchi tsayé e na ti tetuan an ndo Dio ixi me e juixin jan an.

<sup>44</sup> Ko jaña kuaji ndo Jesús kain ni ngo tixinixin en nunte Galilea ko ndache ndo na chijnie ndo Dio.

## 5

### *Kueya kucheé itsé sen*

(Mt. 4:18-22; Mr. 1:16-20)

<sup>1</sup> \*Naa nchakon ndo Jesús jii ndo ngande e ndalago ndatin in Genesaret ko kueya na kuixin-tja kichuu na ixi tjaun na tsin en na chijnie ndo Dio.

<sup>2</sup> Ko bikon ndo jii ngande e inda yuu ntabarco tsikintu e ni itsé kucheé ko je e na stenéma na nocha a tséxin na ba.

<sup>3</sup> Ko je e ndo bajin in ndo naa ntabarcoe naa xi ndatin in Simón, ko ndo Jesús ndache ndo xa ixi tsoncheka xa ntāa ícha ngusine inda. Ko bake e ndo nunte ngata a ntabarco ko kuaxi ndo juinçekuen en ndo kain ni ste nti a.

<sup>4</sup> Ko juexin juinçekuen en ndo na, tjume e ndache ndo xi Simón:

—Tiku a ntabarco ti ícha yaso e inda, ko tjankanta nocha a chringi inda ixi xrotsénta kucheé.

<sup>5</sup> \*Ko ndo Simón juatingíexin ndo:

—Maestro, nguixin tiie stenta ana ixra ko xro an kucheé itséna. Ko siá ja anta ndachronta, jaña sinta ana.

<sup>6</sup> \*Ko je e sen kuitikaon sen nge e ichro ndo

Jesús. Ko tsango kueya kuchee bingachjian nocha a ko jitaxin jichrindaon no.

<sup>7</sup> Ko tjakaxin kichuu sen ste<sup>yá</sup> inaa ntábarco ixi tsonchjiñe e sen tsingijna kichuu sen. Ko kuij sen ko juinchekaon sen yui ntábarco ko je e ntáa kuechjen en ntáa ko ó xrojамangi ntáa ixi kueya kuama ntáa.

<sup>8</sup> Ko bikon ndo Simón Pedro nge e kon en, bake exin ndo ntatuchi in ndo ko ndachro ndo:

—Tingaxintuan, Nchána Jesús, ixi jan an tjúa i aséenna.

<sup>9</sup> Méxin, ndo Simón ko sen ste ngajin ndo xronka sen ixi kueya kuchee itsé sen.

<sup>10</sup> Kaxon xronka ndo Jacobo ko ndo Juan, chjen en ndo Zebedeo, sen me e tingijna ndo Simón nche e sen ixra. Ko ndo Jesús ndachro ndo:

—Xronka ia, sa ó kuatse kuchee ko jai tsaxia xronichje e chujni kondeena jan an.

<sup>11</sup> Ko bikao sen ntábarco ngande e inda. Ko kuintu e sen ntáa ko kain nge e kuachón<sup>da</sup> sen ko sakjui sen rué e sen ndo Jesús.

*Ndo Jesús juinchexruen en ndo naa xi níexin ichin lepra*

*(Mt. 8:1-4; Mr. 1:40-45)*

<sup>12</sup> Naa nchakon bake e ndo Jesús naa t<sup>ja</sup>jna, kuij naa xi níexin xa ichin lepra. Ko bikon xa ndo Jesús, méxin, konchjiñe e xa ko bake exin ntatuchi in xa ko kuiséya xa ngata a nunte ko kuinóatée xa ko ndachro xa:

—Ja anta nchexruannanta siá jaña tjaunnta.

<sup>13</sup> Ko ndo Jesús bake e ndo itja ndo ngata a xa ko ndachro ndo:

—Jaán tja on; syntaxruan an.

Ko tuinxin koxruen en xa.

<sup>14</sup> Ko je e ndo kuetuan an ndo ngajin xa:

—Xro an ngisen teki é ixi ó koxruan an. Itjia ngajin xitaana ixi ó koxruan an ko tájuan ti tikinixin kuituan an ndo Moisés ko jaña tsikon kueya nã ixi koxruan an.

<sup>15</sup> Ko kono e kain tjajna chijnie ndo Jesús, ko kueya nã konchjiñe e nã ngajin ndo ixi tsin en nã nge e ndachro ndo, ko sinchexrjuen en ndo chin en nã.

<sup>16</sup> Ko je e ndo Jesús bakachrjendáa ndo nanaó ti xro an chujni jii ixi kuanichje e ndo ndotée ndo jii ngajní.

*Ndo Jesús juinchexruen en ndo naa xi jua i itji*

*(Mt. 9:1-8; Mr. 2:1-12)*

<sup>17</sup> Naa nchakon ndo Jesús juinchekuen en ndo chujni ko nti a ste kaxin xi fariseo ko kaxin xi tjako ley, tsiki x̄in xa kain tjajna nunte Galilea ko nunte Judea ko tjajna Jerusalén. Ko ndo Jesús juako ndo juachaxien ndo Dio ixi juinchexruen en ndo itsjé chujni ni e.

<sup>18</sup> Nchakon me e kuji kaxin nã bika o nã naa xi jitsingata a kania, xi me e jua i nchetengi tutée xa. Ko tjaun nã xrokuixin in nã kao xi ni e ngaxin in nchia ixi xrobake e nã xa ngajin ndo Jesús.

<sup>19</sup> Ko jua i kuixin in nã ixi kueya nã ste nã ngaxin in nchia. Ko tjume e bajin in nã ngata a nchia ko konxrato xa ngata a nchia, ko nti a juinchexingajinxin nã xi ni e jiá kania ngusine kain ni ste tjenka ndo Jesús.

<sup>20</sup> Ko ndo Jesús bikon ndo ixi chujni me e tsango chuntia nã ko ndache ndo xi ni e:

—Jan an ó juintemá a kain ti ndako a juinche e.

21 Ko tjume e kain xi tjako ley ko xi fariseo kuaxi xraxaon xa: “¿Ngisen xi ji i, ixi ndako a nichja xa ko nichjangí e xa ndo Dio? Ixi xro an chujni tsantsje ijie; je o ndo Dio chao tsantsje ndo ijie chóna nã.”

22 Ko ndo Jesús ó no e ndo nge e stexraxaon xa, méxin, ndachro ndo:

—¿Sonda jaña xraxaonnta?

23 ¿Nge e ícha tangi a xrontatjan xi ni e? ¿Á ícha tangi a xrontatjan xa ixi ó komé e ti ndako a juinche e xa?, o, ¿á tsingatjen xa ko tsajixin xa tutée xa?

24 Méxin, jai tsjako anta ixi jan an, chjen en ndo Dio, xjan jongí e xranchi chujni, chonda juachaxin ngata a nunte tsantsje ijie chóna chujni.

Ko tjume e ndo Jesús ndache ndo xi ni e:

—Jan an ntatjua ja a tingatjen ko itsé kania a ko satsjia ndúya.

25 Ko tuinxin bingatjen xi jua i itji ko stetsje e kain nã, ko itsé xa kanie e xa ti baketa a xa ko sakjui xa ndo a xa ko jitajon xa juasaya ngajin ndo Dio.

26 Ko kain ni ste nti a xronka nã ko kaxon kuajon nã juasaya ngajin ndo Dio, ko xrakon nã stendachro nã:

—Jai bikona naa nge e ícha jié juinche e ndo Dio.

*Ndo Jesús kuiye e ndo ndo Mateo*

*(Mt. 9:9-13; Mr. 2:13-17)*

27 Ko tjume e ndo Jesús kuachrxjixin ndo nchia, ko bikon ndo naa xi xenge e i nã ndatin in Mateo, jii xa ti xengaxin i nã ko ndo Jesús ndache ndo xa:

—Xrokuia, ichjina.

28 Ko xi Mateo, bingatjen xa ko kuintu e xa kain nge e, ko rué e xa ndo Jesús.

29 Ko tjume e xi Mateo bake e xa naa kia ijié ndo a xa ixi tsajon xa juasie xa ngajin ndo Jesús. Ko kaxon ste kueya xi xenge e i na ko ikaxin chujni chóna ijié ko juinekao na ndo Jesús.

30 \*Ko itsjé xi fariseo ko xi tjako ley kuaxi xa nichjangí e xa ti ni chrikao ndo Jesús, ko ndachro xa:

—¿Sonda rinteku unta ko tiku unta xi xenge e i na ko ni chóna ijié?

31 Ko juatingíexin ndo Jesús ko ndachro ndo:

—Ngisen níe a xrokonde a xinhexruan; ni ni e ícha xrokonde e na xa.

32 Jui a ixi tsiya a ni jian. Jui i ixi tsiya a ni chóna ijié, ko tsitikaon na ndo Dio.

*Sonda sen chrjikao ndo Juan nchekatseña sen jinta*

*(Mt. 9:14-17; Mr. 2:18-22)*

33 Ko tjume e je e na juanchangi e na ndo Jesús ko ndachro na:

—Sen chrikao ndo Juan ko xi fariseo ne a sen nchakon nichja sen ngajin ndo Dio ko, ¿sonda sen chrjiko a ja a kain nchakon ine sen ko ti i sen?

34 Ko ndachro ndo Jesús:

—¿Á xrojuine a ni tsikiye e xi kute e, ni kuji kié xa? Já jaán ixi xrastekao na xa.

35 Ko tsii naa nchakon satsikao na xi tsikute e, ko tjume e je e sen sine a sen.

36 Kaxon juako ndo naa nge e, ko ndachro ndo:

—Xro an ngisen tonchrijin tu o manta natjúá ko tjaun ti tsikichje manta ntaxi. Siá jaña sinche e

na, tsitjáña manta natjúá; ko kaxon manta natjúá ndako a tsikonni manta ti manta ntaxi.

<sup>37</sup> Kaxon jua i tsikia xran vino natjúá tjuanxran ntaxi, ixi tsichje tjuanxran, ko ixran ko tjuanxran ndatsitjáña.

<sup>38</sup> Méxin, xran natjúá xrokonda tsikia xran tjuanxran natjúá, ko jaña kayui tsitjáña i.

<sup>39</sup> Ko kaxon xro an ngisen tsi i xran ntaxi, ko tjume e tsi i na xran natjúá, ixi xrondachro na: “Ícha jian xran ntaxi.”

## 6

### *Sen chrikao ndo Jesús tonchrinjin sen trigo (Mt. 12:1-8; Mr. 2:23-28)*

<sup>1</sup> Naa nchakon sábado tjoké e ni judío, ndo Jesús ko sen teyuu chrikao ndo kuatsinga sen tjenka kaxin ijngi tsikenga na trigo, ko sen teyuu chrikao ndo konchrinjin sen kaxin tin trigo, ko konte nga sen trigo ixi itja sen ko juine sen.

<sup>2</sup> Ko kaxin xi fariseo juanchangi xa ndachro xa: —¿Sonda stenze enta ti tikinixin a sinche eni nchakon tjoké eni?

<sup>3</sup> Ko ndachro ndo Jesús: —¿Á juinchekuanxin anta nge e ndachro xroon jitaxin chijnie ndo Dio, xranchi juinche e ndo David ko kain xi bikao ndo naa nchakon tsango kuen en sen jinta?

<sup>4</sup> Ndo David kuixin in ndo ndo a ndo Dio ko itsé ndo nutja ti tikinixin en ndo Dio ko juine ndo nio, ko kaxon kuajon ndo nio juine kain xi bikao ndo. Ko nutja me e je o xitaana chóna xa juachaxin sine xa nio.

<sup>5</sup> Ko kaxon ndachro ndo Jesús:



—Chjen en ndo Dio, xjan jongí e xranchi chujni, chónða ndo juachaxin tsetuen en ndo xranchi tson en nchakon tjoké eni.

*Naa xi jua i nchetengi itja xa  
(Mt. 12:9-14; Mr. 3:1-6)*

<sup>6</sup> Inaa sábadó nchakon tjoké e ni judío, kuixin in ndo Jesús ningue ndo Dio ko kuaxi ndo juinchekuen en ndo na chijnie ndo Dio. Ko nti a jii naa xi jua i nchetengi itja xa ti jian.

<sup>7</sup> Ko xi tjako ley ko xi fariseo stetsjaya xa ndo Jesús ixí tjaun xa tsikon xa á sinchexrjuen en ndo xi me e nchakon sábadó tjoké e na, ixí jaña tsjankata a xa ndo Jesús ijie.

<sup>8</sup> Ko ndo Jesús ó no e ndo nge e stexraxaon aséen xa, méxin, ndache ndo xi ni e itja:

—Tingatjen ko take é ngusine nti i.

Ko tjume e bingatjen xi me e ko bake e xa ngusine ti ste kain na.

<sup>9</sup> Ko je e ndo Jesús ndache ndo ikaxin na:

—Jan an tsjanchangi anta, ¿nge e chao sinche eni nchakon tjoké eni, á sinche eni jian o sinche eni ndako a? ¿Á tsingijnani chujni o á tsóñani chujni?

<sup>10</sup> Ko tjume e ndo Jesús tsje e ndo kain ni ste nti a ko ndache ndo xi ni e:

—Tinxe tjáa.

Ko je e xa kuinxe itja xa, ko hora me e koxruen en itja xa.

<sup>11</sup> Ko ikaxin na tsango koñao na ko stetjao kichuu na xranchi xrotsé na ndo Jesús.

*Ndo Jesús kuinche e ndo teyuu sen tsajikao ndo  
(Mt. 10:1-4; Mr. 3:13-19)*

<sup>12</sup> Ikaxin nchakon tjume e ndo Jesús ikjui ndo ti jii naa ijnā xronichjexin ndo ndo Dio, ko nchijí tiie juao ndo ndotée ndo.

<sup>13</sup> Ko ti bingasáña nichje e ndo sen rué e ndo, ko kuinche e ndo teyuu sen, sen me e ikjan apóstol tsajikao ndo.

<sup>14</sup> Ko sen me e ja in ndatin in sen: ndo Simón, me e ndo Jesús juinchekin in ndo Pedro; ko xikichuu ndo ndatin in Andrés; ndo Jacobo, ndo Juan, ndo Felipe ndo Bartolomé,

<sup>15</sup> ndo Mateo, ndo Tomás, ndo Jacobo, chjen en ndo Alfeo, ndo Simón, banchekin in nā Zelote,

<sup>16</sup> ndo Judas chjen en ndo Jacobo ko ndo Judas Iscariote, ndo juinchejki ndo Jesús.

*Ndo Jesús juinchekuen en ndo kueya nā chijnie ndo Dio*

*(Mt. 4:23-25)*

<sup>17</sup> Ko ndo Jesús ko ti teyuu sen xingajinxin sen ngata a jnā ko kujj sen ngataon naa ijngi, ko nti a ste ikaxin sen rué e ndo. Ko kaxon kueya nā konchjiñe e nā, kuixin nā kueya tjajna nunte Judea ko tjajna Jerusalén ko nguixin ngande e ndalago ti jii tjajna Tiro ko tjajna Sidón. Kain nā kujj nā ixi tsin en nā ti nichja ndo Jesús ko tsoxruenxin nā ichin chóna nā.

<sup>18</sup> Ko ni chóna espíritue Xixron anxrée kaxon koxruen en nā.

<sup>19</sup> Ko kain nā tjaun nā xrotsé nā ndo Jesús ixi no e nā juachaxin tachrxexin je e ndo chao sinchexrjuen en kain nā.

*Juaxruxin ko juachjaon*

*(Mt. 5:1-12)*

20 Ko tjume e ndo Jesús xendua ndo tsje e ndo sen teyuu chrikao ndo ko ndachro ndo:

—Juaxruxin tsake enta ti nóanta ixi tsaye enta juachaxin tsixin innta ti tetuan an ndo Dio.

21 Juaxruxin tsake enta ti jai chonda inta nge e sintenta, ko tjume e xrochondanta ti jian.

'Juaxruxin tsake enta ti jai tsjanganta, ixi tjume e xrocha anta.

22 \*'Juaxruxin tsake enta ti jai ningakon annta na ko tsjanoanta na, chinga xrontatjunta na, ko xrondachro na ixi ña inta ixi titikaonntana jan an, Chjen en Ndo Dio, xjan jongí e xranchi chujni.

23 \*Nchakon tson en kain juachjaon me e, tsango juaxruxin ko chaxro tsake enta, ixi tsaye enta naa nge e ícha jian jii ngajní. Jaña juinche e sen tachrí anta ngajin sen kuachronga chijnie ndo Dio.

24 'Lastunta ja anta ti kueya chondanta ixi ó juexin ti juaxruxin bake enta.

25 'Lastunta ti chondanta kueya nge e sintenta ixi tsij nchakon tsatsenta jinta.

'Ko lastunta ti jai tjanonta ko chá anta ixi tsij nchakon xrotsjanganta ixi tsaye enta ijié juachjaon.

26 'Lastunta ja anta ixi jai kain chujni chaxro nichja anta na ixi jaña kaxon kuanichje e ni tachrí anta chujni ndako a bajako chijnie ndo Dio.

*Xrokonda xrotjaunnta ngisen ningakon annta  
(Mt. 5:38-48; 7:12)*

<sup>27</sup> 'Ko ja anta ti tin ennta ti ntatjunta: Tjue enta ngisen tjaun anta, ko nche enta jian ngajin ni ningakon annta.

<sup>28</sup> Tjanche enta ndo Dio ixi chaxro tsintee ngisen chinga nichja anta, ko tjanche enta ndo Dio ixi ni ndako a nche e ngajinnta.

<sup>29</sup> Siá xrojan ngisen tsande e n̄a tja n̄a ikonnta, tintu enta tsande e n̄a naa nango. Ko siá xrojan ngisen tsantsja anta chamaranta, kaxon tájonnta camisáanta.

<sup>30</sup> Ko siá xrojan ngisen tsjancha anta nge e chondanta, tájonnta; ko siá xrojan nge e tsantsja anta n̄a, íncheniixin anta.

<sup>31</sup> \*Ja anta nche enta ngajin n̄a xranchi tjaunnta sinche e n̄a ngajinnta.

<sup>32</sup> 'Siá ja anta je o tjue enta ngisen chaxro nichja anta, ndo Dio nche a ndo juaxruxin me e, ixi kain ni chúxin a ndo Dio ko ni ndako a nche e, jaña nche e n̄a.

<sup>33</sup> Ko siá je o nche enta ti jian ngajin ngisen nche e jian ngajinnta, ndo Dio nche a ndo juaxruxin me e, ixi kain ni chúxin a ndo Dio jaña nche e n̄a kaxon.

<sup>34</sup> Ko siá nchekjennta n̄a xrojan nge e chondanta je o ngajin ngisen chao xrokjan annta nge e juinckekjennta, ndo Dio nche a ndo juaxruxin me e ixi kaxon ni chúxin a ndo Dio nchekjen kichuu n̄a xrojan nge e ko jaña tjaun n̄a xrokjen en n̄a kaxon.

<sup>35</sup> Ko ja anta xrotjue enta ngisen ningakon annta, ko sinche enta jian ngajin ni tjaun anta. Kaxon sinckekjennta n̄a naa nge e,

ko xro an nge e xrochon énta tsaye enta. Jaña ja anta tsaye enta naa nge e jian ixi ja anta xrokjannta chjen en ndo Dio jii ngajní, ixi je e ndo Dio kaxon jaña nche e ndo, tajon ndo kueya nge e ngajin ni tajon a juasaya ko ni ndako a nche e.

<sup>36</sup> Tikonóe énta chujni, xranchi Ndotáina jii ngajní tikonóe e ndo chujni.

*Tjankata inta ijié inaa chujni*

*(Mt. 7:1-5)*

<sup>37</sup> Tjankata inta ijié ngajin na, me e kaxon ndo Dio tsjangata inta ndo ijié ngajinnta. Nche anta ixi tangi tson en naa chujni ko jaña kaxon ndo Dio tsetuan i ndo ixi tangi tson annta. Tjáña anta nge e ndako a junta anta na, jaña kaxon ndo Dio xrotjáñe e ndo ti ndako a juinche enta.

<sup>38</sup> Ko tájonnta nge e xrokonde e ikaxin na, ko ndo Dio xrotjáanta ndo kain ti xrokonda anta. Ko sinchekaon ndo costáanta jian, tsonteto costa jian, tsontsjenga ndo ko jian xrokaon ixi ícha xrotjáanta ndo. Méxin siá juaxruxin kuajonnta, jaña tsaye enta kaxon.

<sup>39</sup> \*Ko ndo Jesús kaxon juako ndo ja in:

—¿Á chao naa ngisen tikon a xrotsé e itja inaa ni tikon a? ¿Á je a tsandatjen yui na ngaya tuye?

<sup>40</sup> \*Méxin, naa ngisen rué e, je a ícha no e sen ixi ti ndo nchekuen en sen. Ko nchakon tsitja sen jian, me e tsake e sen xranchi ndo juinчекuen en sen.

<sup>41</sup> ¿Sonda tsje enta xineno jii ngangí ikon sen kichuunta ko tsje anta ntáa ti chónnda ikonnta?

42 Siá tikon anta ntaā jii ngangí ikonnta, ¿sonda xrondachenta sen kichuunta: “Chon én tsantsjengi xineno jii ngangí ikuan”? ¡Ko ja anta ndako a xraxaonnta! Cháña sa ó tantsjenginta ntaā jii ngangí ikonnta, ko jaña chao tsikonnta jian tsantsjengínta xineno jii ngangí ikon sen kichuunta.

*Ntaā tajon tu tatsuanxinni ntaā ixi itu tsajon ntaā*

*(Mt. 7:17-20; 12:33-35)*

43 'Ko xro an ntaā jian tsajon naa itu xro an xrée, ko ntaā xro an xrée jua i tsajon ntaā naa itu jian.

44 \*Nanaá ntaā tatsuanxinni ntaā ixi itu tajon ntaā. Ixi ntacha a jua i tsajon ntaā tu higo, ko kachá a jua i tsajon ka tu uva.

45 \*Ni jian nichja n̄ nge e jian jii ngaya aséen n̄; ko ni ña i ndako a nichja n̄ ixi nichja n̄ ti chónnda n̄ ngaya aséen n̄. Ixi kain nge e chónnda n̄ ngaya aséen n̄ me e nichja ro a n̄.

*Nchia kui te ngata a itjao ko nchia kui te ngata a nchese*

*(Mt. 7:24-27)*

46 'Ko ja anta, ¿sonda ndachronta ixi jan an Ncháanta ko titikaon anta nge e tetuan annta?

47 Kain chujni tonchjiñe e n̄ ngajin jan an, ko tin en n̄ ti ntatjan n̄ ko titikaon n̄,

48 ni me e ste n̄ xranchi naa xi tsi-jinchekonchjian naa nchia ko sa ó inge xa ixi ngata a itjao tsi te xa nchia. Ko nchakon koyeé inda, ko soji kuincheka o inda nchia me e, ko xro an kon en nchia ixi soji jii nchia ngata a itjao.

<sup>49</sup> Ko ni tin en ti ndachrjan ko titikaon a na, ni me e ste na xranchi naa xi juinçekonchjian naa nchia ngata a nchese. Ko nchakon koyeé inda, ko soji kuinçekaka o inda nchia me e, jamangi. Ko jaña chjenjin nchia me e.

## 7

*Ndo Jesús juinçekruen en ndo xi nchexrée capitán romano*  
(Mt. 8:5-13)

<sup>1</sup> Ko juexin nichja ndo Jesús, ikjan ndo tjajna Capernaum.

<sup>2</sup> Nti a bake e naa xi capitán romano bachónnda xa naa xi nchexra ko tsango tjaun xa xi me e. Ko je e xi nchexra ni e xa ko ó jite en xa.

<sup>3</sup> Ko xi capitán kuin en xa nichja na nge e jian juinche e ndo Jesús, ko tjume e xro an xa kaxin ni judío tetuan an tsijé na ndo Jesús, tsinóatée na ixi xrokuji ndo ko xrojuinçekruen en ndo xi nchexrée xi capitán.

<sup>4</sup> Ko je e na konchjiñe e na ngajin ndo Jesús ko kuaxi kuinóatée na ngajin ndo ko ndachro na:

—Tsango jian xi capitán ko ja anta chao xrob-ingijnanta xa,

<sup>5</sup> ixi je e xa tjaun xa tjajnanana, tjajné ni judío, ko kuetuan an xa konchjian ningonana.

<sup>6</sup> Ko ndo Jesús ikjui ndo ko ó jitonchjiñe e sen ndo a xi capitán, ko tjume e xi capitán kuetuan an xa ngajin kaxin na itsji na tsindache na ndo Jesús:

—Xi capitán tjaun a xa xrotjáanta xa ixra, ko ndachro xa ixi tikinixin a xa tsixin innta ndo a xa

<sup>7</sup> ko kaxon tiki<sup>n</sup>ixin a ts<sup>i</sup>ji xa xronichja anta xa. Méxin, je o tájonnta juachaxin ixi xi nchexrée xa tsoxr<sup>u</sup>en en xa.

<sup>8</sup> Je e xa kaxon xrokonda tsitikaon xa ngisen tetuen en xa, ko kaxon chón<sup>d</sup>a xa juachaxin tetuan an xa ngajin kain xisoldadoe xa. Ko nchakon tetuen en xa naa xisoldadoe xa satsji xa, je e xa itji xa. Ko nchakon tetuan an xa ixi ts<sup>i</sup>ji naa xi soldado je e xa t<sup>i</sup>ji xa. Ko nchakon tetuen en xa naa xi nchexr<sup>a</sup>, je e xa titikaon xa.

<sup>9</sup> Ko kuin en ndo Jesús, ko xronka ndo ixi jaña ndachro xa, ko je e ndo konkjan tsje e ndo ti sen sterué e ndo, ko ndachro ndo:

—Nduaxin ntatjunta, xro an ni israelita kuitja chuntiana xranchi xi capitán ji i.

<sup>10</sup> Ko tjume e ni nche e ixr<sup>a</sup> ngajin xi capitán i<sup>k</sup>jan n<sup>a</sup> nchia, ko bikon n<sup>a</sup> xi ni e ko ó tsikoxruen en xa ko íxro an ichin chón<sup>d</sup>a xa.

*Ndo Jesús nchexechón ndo xitsi e naa nchri ka an*

<sup>11</sup> Ko tjume e ndo Jesús sakjui ndo naa tjajna ndatin in Naín, bikao ndo sen teyuu chrikao ndo ko kueya ni konchjiñe e ngajin ndo.

<sup>12</sup> Ko nchakon kuiji sen ngande e tjajna me e, ndo Jesús bikon ndo jitika o n<sup>a</sup> naa chujni tsiken en xroxrabaa, chán me e naa chjen en naa nchri ka an, naakua xjan me e bachón<sup>d</sup>a nchra. Ko tsango itsjé ni tjajna jitikao n<sup>a</sup> nchra tsixrabaa chán.

<sup>13</sup> Hora bikon ndo Jesús nchri me e, bikonóe e ndo nchra ko ndachro ndo:

—Ítsjanga ia.

<sup>14</sup> Ko tjume e ndo Jesús konchjiñe e ndo ko bake e ndo itja ndo ngata a nt<sup>a</sup>a jiá chán, ko ni



jitikao ntaa chón en na. Ko ndo Jesús ndache ndo chán tsiken en:

—Jan an ntatjua: ¡Chajan tingatjen!

<sup>15</sup> Ko tjume e chán tsiken en xendua chán ko bake e chán kojuangíxin chán nichja chán, ko jaña ndo Jesús kuajon ndo chán ngajin janée chán.

<sup>16</sup> Ko nchakon bikon na jaña kon en, kain na tsango xronka na kojuangíxin na kuajon na juasie na ngajin ndo Dio ko ndachro na:

—Ndo Dio xruan an ndo naa ndo nichja chijnie ndo, ndo me e tsango chónnda ndo juachaxin.

Ko kaxon ndachro na:

—Ndo Dio kuii ndo tsingijna ndo tjajnée ndo.

<sup>17</sup> Ko nguixin nunte Judea ko kain tjajna jii ngandajin nunte Judea kono e na nge e jian juinche e ndo Jesús.

### *Sen xruan an ndo Juan*

*(Mt. 11:2-19)*

<sup>18</sup> Sen chrikao ndo Juan beki e sen ndo kain nge e juinche e ndo Jesús ko tjume e kuiye e ndo yuu sen chrikao ndo,

<sup>19</sup> ko xruan an ndo sen tsitsje e sen ndo Jesús tsjanchangí e sen ndo á je e ndo ngisen tsii, o á xrochon en sen tsii inaa ngisen.

<sup>20</sup> Ko sen xruan an ndo Juan konchjiñe e sen ngajin ndo Jesús, ko ndachro sen:

—Ndo Juan xruan anna ndo tsjanchangi ananta á ja anta ndo Cristo tsii, o xraxrochon anna inaa ngisen tsii.

<sup>21</sup> Ko nchakon kuiji sen, ndo Jesús juinchexruen en ndo tsango itsjé ni chónnda ichin, ko kuantsje ndo espíritue Xixron anxrée chónnda

kaxin na, ko kaxon juinchexruen en ndo itsjé ni tikon a.

<sup>22</sup> Méxin, ndo Jesús ndache ndo sen xruan an ndo Juan:

—Itjinta, tindachenta ndo Juan ti bikonta ko ti kuin ennta: ni tikon a, chao tikon na, ko ni ntarengo chao ichrji na, ko ni kuachóna ichin lepra, jai íxro an ichin chóna na, ko ni bakien a, chao tin en na, ko ni kuen en, jai xechón na, ko ni nóa kuin en na chijni jian ixi tsachrje ijie chóna na.

<sup>23</sup> Ko sen xrotjáñe a xrochuntiana, sen me e juaxruxin tsintee sen.

<sup>24</sup> Nchakon sakjui sen tsixrua an ndo Juan, ndo Jesús kuaxi ndo ndache ndo kain ni kuitu e nti a kondee ndo Juan, ko ndachro ndo:

—Nchakon ikjuinta ntajie kuitsje enta ndo Juan, ¿xranchi xraxaonnta xrobikonnta ndo? ¿Á bikonta ndo xranchi naa ntatji tjatu o chrinto?

<sup>25</sup> ¿Na i, nge e xrobikonnta? ¿Á xrobikonnta naa xi jiá manta tsango tjintee? ¡Na i, je a me e! Ja anta ó no anta ixi ngisen jiá manta tjintee ko chóna itsjé nge e, ni me e ste na ndo a naa xi rey tetuan an.

<sup>26</sup> Méxin, ¿nge e kuitsje enta? ¿Á xrobikonnta naa ngisen chronga chijnie ndo Dio? ¡Jaán, ndu-axin me e, ko xi me e ícha chóna juachaxin ixi sen banichja chijnie ndo Dio sa ó!

<sup>27</sup> Ndo Juan me e ngisen kujj xranchi jitaxin xroon chijnie ndo Dio sa ó:

Jan an xroxruan an naa ngisen xrochronga chijn-  
ina

ko je e ndo sinchenataonxin ndo cha o,

ko sinchekonchjian ndo cha o ngajinnta.

<sup>28</sup> Jan an rintatjonta ixi kain ni kuii sa ó chronga chijnie ndo Dio, xro an ngisen kuachónnda juachaxin xranchi juachaxin chónnda ndo Juan Bautista. Ko maski, ngisen chónnda i itsjé juachaxin ti tetuan an ndo Dio, ícha ijié sen ixi ndo Juan.

<sup>29</sup> \*Nchakon kuin en nã ji i, kain nã ko kain xi xenge e i nã tsikikite ndo Juan kuitikaon nã ixi ndo Dio tsango jian ndo.

<sup>30</sup> Ko xi fariseo ko xi tjako ley chro a xa ixi ndo Juan xrobikitée ndo xa, tjaun a xa ti ndo Dio xrobingijna ndo xa.

<sup>31</sup> Ko ndo Jesús ndachro ndo:

—¿Xranchi tsjakoxin chujni ste jai? ¿Ste nã xranchi tsjakoxinni ti nche e chujni?

<sup>32</sup> Ste nã xranchi ichjan nchínchín take e xjan nunte sondaon xjan ngataon ndasin ko tuyaku e kichuu xjan ko ndachro xjan: “Jan anna kuanoana ntaxro ko ja anta té anta, jan anna itsjena soon ti chónndani juachjaon ko ja anta tsjanga inta.”

<sup>33</sup> Ko kuii ndo Juan Bautista, ko juine a ndo nutja ko kui a ndo xran vino, ko ja anta ndachronta ixi je e ndo chónnda ndo naa espíritue Xixron anxrée.

<sup>34</sup> Ko tjume e jui i jan an, Chjen en ndo Dio, xjan jongí e xranchi chujni, ko iné ko ti í, ko ja anta ndachronta ixi jan an tsango iné ko tsango ti í ko tjento kain ni ndako a nche e ko kain xi xenge e i nã.

<sup>35</sup> Ko ti tsango no e ndo Dio me e tjakoxin chjen en ndo Dio.

*Ndo Jesús jii ndo ndo a naa xi fariseo tin in Simón*

<sup>36</sup> Naa xi fariseo ndache xa ndo Jesús itsji ndo ndo a xa sinekao ndo xa. Ko ndo Jesús ikjui ndo nti a ko bake e ndo ti jii mesa.

<sup>37</sup> \*Ko tjajna me e jii naa nchri, nchri me e tsango kueya ijię kuachónnda nchra. Ko kono e nchra ixi ndo Jesús kuji ndo sine ndo ndo a xi fariseo me e, ko je e nchra ikjui nchra nti a ko bikao nchra naa xroxrao jichre inda chaxro xraxe tjintee.

<sup>38</sup> Ko konchjiñe e nchra ti jii tutée ndo Jesús ko bake exin nchra ntatuchi in nchra ko tsjanga nchra. Méxin, kuintjí ndakon nchra tutée ndo Jesús, ko tjume e xrajaa nchra juinchexemaxin nchra tutée ndo, ko kuitoxin nchra tutée ndo, ko tjume e bingamá nchra inda chaxro xraxe tutée ndo.

<sup>39</sup> Ko bikon xi fariseo tsikiye e ndo Jesús, ko je e xa xraxaon xa: “Á nduaxin ndo ji i naa ndo chronga chijnie ndo Dio, siá nduaxin me e, je e ndo xrokono e ndo ngisen jinéma ixi ndakon tutée ndo, ko ngisen nchri ji i; xrokono e ndo ixi nchri ji i tsango ndako a nche e nchra.”

<sup>40</sup> Ko tjume e ndo Jesús ndache ndo xi fariseo:

—Simón, jan an xrontatjua naa nge e.

Ko xi fariseo juate e xa:

—Ndachijiana, Maestro.

<sup>41</sup> Ko ndo Jesús ndachro ndo:

—Bake e yuu xi sínká tomi ngajin naa xi tjatuya tomi. Naa xi sínká na ó ciento tomi, ko naa xi sínká tu o ciento tomi.

<sup>42</sup> Ko jua i kuintejuenga xa n̄a. Ko xi tjatuya tomi juinchemé e xa ti sínká kayui xi me e.

Ndachro ndo Jesús:

—Jai ndachijiana ja a, ¿ngixe e xi ícha tjue e xi tjatuya tomi?

<sup>43</sup> Ko juate e xi Simón ndachro xa:

—Jan an xraxa on ixi xi ícha bikonóe e xa, xi sínká ícha tomi.

Ko ndo Jesús ndachro ndo:

—Jaán, nduaxin.

<sup>44</sup> Ko ndo Jesús tsje e ndo nchri me e ko ndache ndo xi Simón:

—Tsje é nchri ji i. Jan an kuixin in ndúya ko chjána iana inda tsijmaxin tutéena; ko nchri ji i juinéma nchra tutéena ixi ndakon nchra, ko juinhexemaxin nchra xrajaa nchra.

<sup>45</sup> Ja a kuitoxin ana ti jui i ndúya, ko je e nchra, xrakuixi in ndúya jititoxin nchra tutéena.

<sup>46</sup> Ja a bake a ndaxi e ngata a jáana; ko je e nchra bake e nchra inda chaxro xraxe tutéena.

<sup>47</sup> Méxin, jan an ntatjua ixi ti kueya sínká nchra ó komé e, ko méxin, ícha tjaunna nchra; ko ngisen sinka i ijié, kaxon je a ícha tjaunna n̄a.

<sup>48</sup> Ko tjume e ndo Jesús ndache ndo nchri me e:

—Kain ti ndako a juinche e ó komé e.

<sup>49</sup> Ko kain n̄a tsikonchjiñe e ti jii ndo Jesús tjenka mesa kuaxi n̄a ndache kichuu n̄a:

—¿Ngisen ji i, ixi nchemé e xa ti ijié chóna n̄a?

<sup>50</sup> Ko tjume e ndo Jesús ndache ndo nchra:

—Ja a chuntiana ko kuitikaonna, méxin ijié kua-chonda komé e ijié; méxin, jai juaxruxin satjia.

## 8

*Nchri bakingijna ndo Jesús*

<sup>1</sup> Ko tjume e, ndo Jesús kuaji ndo itsjé tjjajna ijié ko itsjé tjjajna nchíín kuachronga ndo ixi kuii juachaxien ndo Dio. Ko chrikao ndo sen teyuu kuinche e ndo.

<sup>2</sup> \*Ko kaxon nti a sterué e kaxin nchri tsikantsje e ndo espíritue Xixron anxrée kuachónnda nchra ko tsikantsje ndo kain ichin kuachónnda nchra. Ko naa nchri me e ndatin in María Magdalena, nchri me e kuantsjexin ndo yaato espíritue Xixron anxrée.

<sup>3</sup> Ko kaxon nti a bake e nchri Juana, janchri e naa xi ndatin in Chuza, xi me e kuanche e xa xrée xi Herodes; ko kaxon nti a bake e nchri Susana ko ikaxin nchri bakingijna nchra ndo Jesús ko kuajon nchra nge e juine sen.

*Ndo Jesús tjako ndo xranchi naa xi bikenga trigo ngataon ijngi*

*(Mt. 13:1-9; Mr. 4:1-9)*

<sup>4</sup> Ko xejo kueya na, kui xin na kueya tjjajna ko konchjiñe e na ngajin ndo Jesús. Me e je e ndo beki ndo naa chijni:

<sup>5</sup> —Naa xi bikenga tsee, ko kaxin tsee kuitsinga ngande e cha o. Ko kuatsinga chujni ko ngatjangi na tsee. Ko kuii kuxe juine ba tsee.

<sup>6</sup> Ko kaxin tsee kuitsinga ngakjen en ixro ko kuachrje ka, ko bangi a ka ixi xro an itjao\* ko inche chónnda nue e ka.

---

**8:2** Mt. 27:55, 56; Mr. 15:40, 41; Lc. 23:49. \* **8:6** *itjao* humedad

<sup>7</sup> Ko kaxin tsee kuitsinga ti jii ntacha a. Ko ntacha a ícha bangi ntãã. Me e xrabaatja ka ko bangi a tsee.

<sup>8</sup> Ko ícha tsee kuitsinga ngata a inche jian, me e bangi ka ko itsjé tsee kuajon ka, xranchi naa ciento tsee kuajon nguingu ka.

Jaña nichja ndo Jesús, ko tjume e séen ndachro ndo:

—Ngisen chao tin en, tsin en sen jian.

*Ndo Jesús chronga ndo sonda juako ndo chijni  
(Mt. 13:10-17; Mr. 4:10-12)*

<sup>9</sup> Ko sen teyuu chrikao ndo Jesús juanchangi sen:

—¿Nge e xrondachro chijni juako ndo?

<sup>10</sup> Ko je e ndo Jesús ndachro ndo:

—Ja anta kuaye enta juachaxin tsienxinnta ti noa inta, ti tetuan an ndo Dio. Ko chujni kaxin, na i. Méxin, jan an nichjaxin naa chijni, ixí maski tsikon na ko tsin en na, tsienxin a na.

*Ndo Jesús ndachro ndo nge e xrondachro ti  
binga tsee*

*(Mt. 13:18-23; Mr. 4:13-20)*

<sup>11</sup> 'Ko ji i xrondachro chijni ntatjunta: Ti tsee me e chijnie ndo Dio.

<sup>12</sup> Tsee kuitsinga ngande e chao me e xrondachro ngisen tin en chijnie ndo Dio. Ko Xixron anxrée nchetjáñajin xa na ko titikaon a na, méxin, tsitjáña na.

<sup>13</sup> Tsee kuitsinga ti jii ixro me e xrondachro ngisen kuin en chijnie ndo Dio ko bake e na juaxruxin, ko sé a kuitikaon na ixí kuu juachjaon ko ngaxiton na.

14 Tsee kuitsinga ngata a ntacha a me e xron-dachro ngisen tin en chijnie ndo Dio ko hora satji na tjáñe e na nge e kuin en na ixi yaa na juach-jauen tomi ko ícha tjue e na ti juaxruxin, ko nche a na ti tjaun ndo Dio.

15 Ko tsee kuitsinga ti inche indá xrondachro ngisen tayé e chijnie ndo Dio ngaxin in aséen na ko titikaon na ti ndachro ndo ko soji tjintee na.

*Ndo Jesús juako ndo no tsake e xro i*

*(Mr. 4:21-25)*

16 \*Xro an ngisen tsjaaka naa xro i ko tsake e na xro i chringi naa ichi o chringi ntaa tejuata a na. Xrokonda tsake e na xro i noi ixi kain ni tixin in nchia chao tsikon na ti tingasáña.

17 \*Xro an nge e jimá tsonoxin a, ko xro an nge e imao tsonoa ani inaa nchakon ixi kain nge e tsonoxixin ixi xro i.

18 \*Méxin, ja anta tin ennta jian; ngisen ó no e naa nchín, ndo Dio tsingijna ndo tsono e sen ícha, ko ti ngisen xro an no e, ti jixraxaon na ixi no e na kaxon me e tsachrje e na.

*Janée ndo Jesús ko xi kichuu ndo*

*(Mt. 12:46-50; Mr. 3:31-35)*

19 Tjume e janée ndo Jesús ko kaxin xi kichuu ndo kuiji sen ti jii ndo Jesús, ko jua i konchjiñe e sen ixi tsango itsjé chujni ste nti a.

20 Ko tjume e naa xi kuindache xa ndo Jesús:  
—Janáanta ko xi kichuunta ste sen nduja, ko nichja anta sen.

21 Ko ndo Jesús ndachro ndo:



—Sen tin en chijnie ndo Dio ko titikaon, sen me e janána ko sen kichian.

*Ndo Jesús ícha tituan an ndo  
(Mt. 8:23-27; Mr. 4:35-41)*

<sup>22</sup> Naa nchakon ndo Jesús kuajin in ndo naa ntábarco ko ndache ndo sen teyuu chrikao ndo:

—Tsatsingato ena ndalago.

Ko tjume e sakjui sen.

<sup>23</sup> Ko jitji sen ngataon inda, ko je e ndo kuejua ndo. Ko tuinxin kuii naa chrinto soji ko ntábarco steyá sen kuaxi bikia ntaá inda ko tjaun ntaá xrojamangi ntaá.

<sup>24</sup> Ko konchjiñe e sen ti jii ndo ko juinchexingame e sen ndo ko ndache sen ndo:

—¡Maestro, Maestro! ¡Tsen enna ixi xrojamangi ntaá steyána ko xrokjoinna inda!

Ko je e ndo bingatjen ndo ko kuyakutee ndo chrinto ko inda ko tuinxin ndabake e nda.

<sup>25</sup> Ko ndo Jesús ndache ndo sen:

—¿Sonda chuntia intana?

Ko je e sen xronka sen ko ndastetsjeko sen ko stendache kichuu sen:

—¿Ngisen ji i ixi tetuen en ndo chrinto soji ko inda, ko je e inda ko chrinto titikaon?

*Naa xi jii nunte Gadara  
(Mt. 8:28-34; Mr. 5:1-20)*

<sup>26</sup> Tjume e kuiji sen nunte ndatin in Gadara ti jii tuenxin ndalago ngajinxin nunte Galilea.

<sup>27</sup> Ko ndo Jesús xingajinxin ndo ntábarco ko tuinxin naa xi kuachrjexin tjajna nti a konchjiñe e xa ngajin ndo Jesús. Ko xi me e tsango sée kuachóna xa espíritue Xixron anxrée. Ko xro an

manta jiá xa, ko je a nchia bake e xa; bake e xa ngakjen en itjaŋ ti bajabaa na ni tsiken en.

<sup>28</sup> Hora bikon xa ndo Jesús, bake exin xa ntatuchi in xa ngajin ndo ko kuyako xa ko ndachro xa:

—Jesús, chjen en ndo Dio, ¿sonda nchexronkana? Tjancha ana xro an nchenana.

<sup>29</sup> Jaña ndachro xa ixi ndo Jesús tsiketuen en ndo espíritue Xixron anxrée tsachrjexin xa xi me e. Ko ó sée espíritue Xixron anxrée baketuen en xa xi me e ko bakichruaxin na tutée xa ko itja xa ixi nochika, ko je e xa bakonchrindaon xa nochika ko espíritue Xixron anxrée banchekinga xa chrika a ijna ti xro an chujni ste.

<sup>30</sup> Ko tjume e ndo Jesús juanchangi e ndo xi me e:

—¿Xranchi ti ian?

Ko je e xi ndachro xa:

—Jan anna ndatin inna Legión.

Jaña ndachro xa ixi tsango itsjé espíritue Xixron anxrée bake e ngaxin in aséen xa.

<sup>31</sup> Ko kain espíritue Xixron anxrée juanche e ndo Jesús ixi xroxruan a ndo satsji espíritu ti tuye yaso e.

<sup>32</sup> Ko ijna nti a steneña itsjé kuchinga, ko kain espíritue Xixron anxrée juanchia ngajin ndo Jesús ixi je e ndo tsajon ndo juachaxin tixin in kain espíritu me e ngaxin in kuchinga. Ko ndo Jesús kuajon ndo juachaxin.

<sup>33</sup> Ko kain espíritue Xixron anxrée kuachrjexin xi me e ko kuixin in ngaxin in kuchinga. Ko kain kuchinga binga ba ko kuitsingangi ba ti yaso e jii ndalago ko kjun en ba inda.

<sup>34</sup> Ko kain xi stetsje e xa kuchinga, bikon xa jaña kon en ba, ko je e xa tsango xronka xa ko binga xa kuindache xa ni tjajna nge e kon en ko kaxon kuindache xa ni ste ngataon ijngi.

<sup>35</sup> Ko kain ni me e kuij na kuitsje e na nge e kon en nti a. Ko hora kuiji na ti jii ndo Jesús, bikon na nti a jii xi kuachrjexin kain espíritue Xixron anxrée. Jii xa tjenka tutée ndo Jesús, ko ójiá xa manta, ko ndako xraxaon xa, ko kain na xronka na.

<sup>36</sup> Ko kain na bikon na nge e kon en nti a ko chronga na xranchi koxruen en xi bachónda espíritue Xixron anxrée.

<sup>37</sup> Méxin, kain ni nunte Gadara juanche e na ndo Jesús ixi satsjixin ndo nti a, ixi je e na tsango xronka na. Méxin, ndo Jesús kuajin in ndo ntabarco ko sakjui ndo.

<sup>38</sup> Ko xi kuachrjexin kain espíritue Xixron anxrée kuinóatée xa ixi xrokuajon ndo juachaxin tsikao ndo xa. Ko ndo Jesús kuetuen en ndo xa tsitu e xa, ko ndachro ndo:

<sup>39</sup> —Ikjan ndúya, ko teki é na kain nge e juinche e ndo Dio ngajian.

Ko xi me e sakjui xa ko beki e xa kain na nguixin tjajna ti juinche e ndo Jesús ngajin xa.

*Koxruen en naa xjan nchrichjan ndo ko naa nchri*

*(Mt. 9:18-26; Mr. 5:21-43)*

<sup>40</sup> Nchakon ikjan ndo Jesús tuenxin ndalago, kain ni ste nti a tsango ché e na ixi kuiji ndo Jesús, ixi kain na stechón en na ndo.

<sup>41</sup> Ko tjume e kuij naa xi ndatin in Jairo, xi me e baketuan an xa ni ngo judío nti a. Bake exin xa

ntatuchi in xa ngajin ndo Jesús ko kuinóatée xa ngajin ndo ixi xrokjui ndo ndo a xa

<sup>42</sup> ixi xjanchríche en xa, xjan naakuaxon chóna xa, chóna xjan teyuu nano ko jite en xjan. Ko tjume e ndo Jesús sakjui ndo ndo a xi Jairo ko tsango itsjé nā rué e nā ndo ko kuixintja nā ndo Jesús.

<sup>43</sup> Ko ngakjen en kain chujni me e nti a konchjiñe e naa nchri bani e nchra, teyuu nano níexin nchra jnié nchra, ko juinchexienxin nchra kain ti bachóna nchra ngajin xi nchexruan, ko ninaa xinchexruan jua i juinchexruen en nchra.

<sup>44</sup> Nchri me e konchjiñe e nchra tuenxin ndo Jesús ko itsé nchra ngande e mantoe ndo ko tuinxin kuíxin jnié nchra.

<sup>45</sup> Ko ndo Jesús juanchangi ndo:

—¿Ngisen itséna?

Ko kain nā ndachro nā ixi xro an ngisen itsé ndo. Méxin, ndo Pedro ko kain sen jitikao ndo ndachro sen:

—Maestro, kueya nā ste nā ngandajian ko sin-teeto nā, méxin, ¿sonda tjanchangia ngisen itsé?

<sup>46</sup> Ko ndo Jesús ndachro ndo:

—Xrojan ngisen itséna, ixi konóna juachaxin kuachrjexinna ixi koxruenxin naa ngisen.

<sup>47</sup> Ko nchri me e bikon nchra kono e ndo Jesús, ko konchjiñe e nchra ti jii ndo ko jixranga nchra ko xrakon nchra, ko bake exin ntatuchi in nchra tutée ndo Jesús. Ko ngatoxin† ikon kain ni ste nti a ndachro nchra xranchi itsé nchra mantoe ndo Jesús ko xranchi tuinxin koxruen en nchra.

<sup>48</sup> Ko tjume e ndo Jesús ndache ndo nchra:

† **8:47 ngatoxin** delante de

—Ja a koxruan an ixi chuntiana. Jai juaxruxin satjia.

<sup>49</sup> Xrajinichja ndo Jesús, kuiji naa ngisen kuixin ndo a xi Jairo, xi baketuan an ni ngo nti a; ko ndache na xa:

—Chjan an ó kuen en xjan; ítajon a ixra ngajin ndo maestro.

<sup>50</sup> Ko tjume e kuin en ndo Jesús, ko ndache ndo xi Jairo:

—Xronka ia; je o titikáoanna, chjan an tsoxruen en xjan.

<sup>51</sup> Ko ti kuiji sen ndo a xi Jairo, ndo Jesús kuachrjendaka o ndo, ndo Pedro ko ndo Jacobo, ko ndo Juan, kuixin in sen nchia ko kao ndotée ko janée xjanchrichjan.

<sup>52</sup> Ko kain ni ste nti a stetsjanga na ko yaxin na xjan juachjaon. Ko ndo Jesús ndache ndo na:

—Tsjanga inta; xjanchrichjan tsiken a xjan; je o jijua xjan.

<sup>53</sup> Ko je e na juanoa na ndo Jesús, ixi kain na no e na kuen en xjan.

<sup>54</sup> Ko tjume e ndo Jesús itsé ndo itja xjan ko séen ndachro ndo:

—Ja a xjanchrichjan, tingatjen.

<sup>55</sup> Ko je e xjan xechón xjan íjngo, ko tuinxin bingatjen xjan. Ko ndo Jesús kuetuan an ndo xrochjée sen xjan sine xjan.

<sup>56</sup> Ko janée xjan ko ndotée xjan tsango xrakon sen, ko ndo Jesús kuetuen en ndo na ixi xro an ngisen tseki e na jaña kon en.

## 9

*Ndo Jesús xruan an ndo teyuu sen chrikao ndo  
ixi itsji sen xrochronga sen chijnie ndo Dio*

*(Mt. 10:5-15; Mr. 6:7-13)*

<sup>1</sup> Ko tjume e ndo Jesús kuetuan an ndo tsonchjiñe e sen teyuu chrikao ndo, ko kuajon ndo juachaxin ixi chao tsantsje sen kain espíritue Xixron anxrée chónda nã, ko sinchexrjuen en sen ni ni e.

<sup>2</sup> Ko kuetuan an ndo satsji sen sinchekuen en sen nã kondee juachaxin tetuan an ndo Dio ko sinchexrjuen en sen ni ni e.

<sup>3</sup> Ko ndachro ndo:

—Xro an nge e tiku unta ti tsaanta cha o, tiku inta ntakuto, tiku inta puxa, nutja, tomi ko tiku inta yuu manta, je o manta rianta.

<sup>4</sup> Ko nchakon tsjasonta xrojan nchia tsixin innta ko tsitu anta nti a tsijija nchakon satsjixinnta tjajna me e.

<sup>5</sup> \*Siá tsjasonta xrojan tjajna ko tsajon a nã juachaxin tsinteenta nti a, ja anta tachrxixinnta tjajna me e, ko tontsjenganta inche yaa tutáanta, me e tsjakoxinnta ixi ndo Dio tsjankata a ndo ijie ngajin ni tjajna me e.

<sup>6</sup> Ko tjume e sakjui sen kain tjajna nchínchín, ko ndache sen nã chijni jian xranchi ndo Dio tsantsje ijie chónda nã ko juinchexruen en sen ni ni e.

*Kuen en ndo Juan Bautista*

*(Mt. 14:1-12; Mr. 6:14-29)*

<sup>7</sup> \*Xi Herodes, xi kuetuan an nti a, kono e xa kain nge e jian banche e ndo Jesús, ko je e xa

tsango xronka xa, noe a xa nge e xraxaon xa  
ixi kaxin n̄a ndachro n̄a ixi ó tsixechón xi Juan  
Bautista.

<sup>8</sup> Ko ikaxin n̄a ndachro n̄a ixi ndo kuachronga  
chijnie ndo Dio ó sa ó, ndo Elías, konoxin íjngo, ko  
ikaxin n̄a ndachro n̄a ixi inaa ndo kuachronga  
chijnie ndo Dio kuii ícha sa ó, ko jai xechón ndo  
íjngo.

<sup>9</sup> Ko ndachro xi Herodes:

—Jan an kuetuan an chrinjin jaa xi Juan; méxin,  
¿ngisen xi ji i ixi kuin an tsango itsjé nge e jian  
nche e xa?

Ko xi Herodes tsango tjaun xa xrokuitsje e xa  
ndo Jesús.

*Ndo Jesús kuajon ndo nge e juine na ó mil xi  
(Mt. 14:13-21; Mr. 6:30-44; Jn. 6:1-14)*

<sup>10</sup> Ko tjume e ikjan sen xruan an ndo Jesús ko  
beki e sen ndo kain ti juinche e sen. Ko tjume e  
ndo Jesús sabikao ndo sen ti xro an ngisen ste,  
tjenka tjajna Betsaida.

<sup>11</sup> Ko hora kono e n̄a no jii ndo ko je e n̄a rué e n̄a  
ndo, ko ndo Jesús kuajon ndo juachaxin kuitu e n̄a  
nti a. Ko chronga ndo kondee juachaxin tetuan an  
ndo Dio ko juinchexruen en ndo kain ni ni e.

<sup>12</sup> Ko ó kóndo, konchjiñe e sen teyuu chrikao  
ndo, ko ndachro sen:

—Ndachenta kain n̄a ixi satsji n̄a kaxin tjajna  
tjenka nti i, tse na n̄a ti sine n̄a ko tsjoké e n̄a ixi  
nti i xro an nge e jii.

<sup>13</sup> Ko ndo Jesús ndache ndo sen:

—Ja anta tájonnta nge e sine n̄a.

Ko je e sen ndachro sen:

—Xro an nge e chondana, je o chondana na ó nutja ko yuu kuchee, ¿á tjaunnta ixi tsike nana nge e sine kain nã?

<sup>14</sup> Ixi kain ni me e, je o ni xi xranchi na ó mil chujni. Ko ndache ndo Jesús sen teyuu chrikao ndo:

—Ndachenta nã tsintee nã nunte, nguungu yuukante nã.

<sup>15</sup> Ko jaña juinche e sen ko kuintee nã nunte kain nã.

<sup>16</sup> Ko tjume e ndo Jesús kua ndo na ó nutja ko yuu kuchee ko tsje e ndo ngajní, ko kuajon ndo juasie ndo ngajin ndo Dio. Ko konchrinjin ndo nutja ko kuchee ko chjée ndo sen teyuu chrikao ndo. Ko je e sen konchjeya sen nutja ko kuchee, kuayé e kain ni ste nti a.

<sup>17</sup> Ko kain nã juine nã ko kaon nã jian, ko juexin juine kain nã, sen teyuu chrikao ndo Jesús juejo sen teyuu ntaxra tutu o nutja tsixe e.

*Ndo Pedro ndachro ndo ixi ndo Jesús ndo Cristo  
(Mt. 16:13-19; Mr. 8:27-29)*

<sup>18</sup> Naa nchakon ndo Jesús tsikachrjendáa ndo ko kuinichje e ndo ndo Dio, ko jikao ndo sen teyuu chrikao ndo, ko je e ndo juanchangi e ndo sen:

—¿Nge e ndachro chujni, ngisen jan an?

<sup>19</sup> \*Ko je e sen ndachro sen:

—Kaxin nã ndachro nã ixi ja anta ndo Juan Bautista; ko ikaxin nã ndachro nã ixi ja anta ndo profeta Elías; ko ícha nã ndachro nã ixi ja anta naa sen profeta tsixechón.

<sup>20</sup> \*Ko tjume e ndo Jesús juanchangi e ndo sen:



—Ko ja anta, ¿nge e ndachronta, ngisen jan an?

Ko ndo Pedro ndachro ndo:

—Ja anta ndo Cristo, chjen en ndo Dio.

*Ndo Jesús ndachro ndo ixi je e ndo tsen en ndo  
(Mt. 16:20-28; Mr. 8:30–9:1)*

<sup>21</sup> Ko ndo Jesús tsango kuetuen en ndo sen ixi xro an chujni xronache sen ngisen je e ndo.

<sup>22</sup> Ko tjume e ndo Jesús ndache ndo sen:

—Jan an, chjen en ndo Dio, xjan jongí e xranchi chujni, xrokonda tsango tangi sinchena na, ko kain xi tetuan an ni ngo, ko kain xitaana tetuan an ko kain xi tjako ley, tsoñaona na. Ko naatsóñaxónna na, ko nchakon nínxin xroxechónna íjngo.

<sup>23</sup> \*Juexin ndachro ndo ji i, ndache ndo kain ni ste nti a:

—Siá xrojan ngisen xrorua na, xrokonda tsintu e sen ti ícha tjue e sen ko xrorua na sen kain nchakon, maski tangi tson en sen.

<sup>24</sup> \*Ko ni tjaun xro an tson en, sinchetjáña aséen na; ko ngisen tsen en ixi titikaonna sen, sen me e tsechón sen kain nchakon.

<sup>25</sup> ¿Nge e tsjacha na siá xrochónna na kain nge e jii ngata a nunte ko sinchetjáña na aséen na?

<sup>26</sup> Méxin, ngisen tosue e ixi titikaonna sen ko chijni nichja, kaxon jan an, Chjen en ndo Dio, xjan jongí e xranchi chujni, xrondachrjan ixi chúxin a sen nchakon tsikian ijié juachaxin ko chjiixro chónna Ndotána ko kain ángel ne e ndo.

<sup>27</sup> Nduaxin ntatjunta ixi kaxin ni ste nti i jai, xratsen a na tsikonja na juachaxien ndo Dio.

*Kuindoxin xranchi tsje e ndo Jesús  
(Mt. 17:1-8; Mr. 9:2-8)*

<sup>28</sup> Kuatsinga ijní nchakon ti ndachro ndo Jesús kain ji i, ko tjume e je e ndo kuajin in ndo naa ijnā xronichje e ndo ndo Dio ko bikao ndo ndo Pedro ko ndo Jacobo ko ndo Juan.

<sup>29</sup> Ko hora jinichje e ndo Jesús ndo Dio, ngayakon ndo Jesús kuindoxin ko ti jitsáa ndo ikjan xranchi chjiixro xronichje e ndo ndo Dio ko bikao ndo ndo Pedro ko ndo Jacobo ko ndo Juan.

<sup>30</sup> Ko tjume e konoxin yuu sen stetjao ndo Jesús, ko sen me e ndo Moisés ko ndo Elías.

<sup>31</sup> Ko nguixin ngandajin ti ste sen tsango chaxro bingasaña ko stetjao sen xranchi tson en ndo Jesús ko xranchi tson en ndo tjajna Jerusalén.

<sup>32</sup> Ko maski ndo Pedro ko sen stekao ndo tsango chjée sen kotachrin, je e sen stetsje e sen ko bikon sen juachaxin chónnda ndo Jesús, ko bikon sen sen yuu jikao ndo.

<sup>33</sup> Ko hora saxrokjui sen, ndo Pedro ndache ndo ndo Jesús:

—Maestro, jian stena nti i. Sintáñana ní tsa on nchíin; naa tsa on ja anta, ko naa tsa on ndo Moisés, ko naa tsa on ndo Elías.

Ko ndo Pedro noe a ndo nge e ndachro ndo.

<sup>34</sup> Ko xrajnichja ndo kuji naa itjuí kuitsía sen ko xrakon sen xronichje e ndo ndo Dio ko bikao ndo ndo Pedro ko ndo Jacobo ko ndo Juan.

<sup>35</sup> \*Ko tjume e ngakjen en itjuí me e kuin en sen naa ngisen ndachro:

—Ji i chjan na tsango tjua a. Tin ennta ti ndachro xjan.

<sup>36</sup> Juexin nichja ndo Dio, bikon sen ndo Jesús je o ndo jii ndo nti a. Ko je e sen tenko sen, ko xro an ngisen beki e sen nge e bikon sen.

*Ndo Jesús juinchexruen en ndo naa chajan  
(Mt. 17:14-21; Mr. 9:14-29)*

<sup>37</sup> Ndúyaxin ti xingajinxin sen ijna, tsango itsjé na jichón en na ndo Jesús ngatja cha o.

<sup>38</sup> Ko naa xi jii ngakjen en ni me e nichja xa ko ndache xa ndo Jesús:

—Maestro, tinóatáana ixi tikitsje enta chjan na ixi naakua xjan chonda ko ni e xjan.

<sup>39</sup> Chóna xjan espíritue Xixron anxrée ko itsé xa xjan ko nchekoyako xa xjan, ko titsinga xjan ko tuchrjo ti xin ro a xjan. Tsango ncheni e xa xjan ko tsango chrjen tajanda xa xjan.

<sup>40</sup> Jan an ó kuinóatáana ngajin sen chrjiku unta ixi xrokuantsje sen espíritu, ko jua i kuantsje sen.

<sup>41</sup> Ko ndo Jesús ndachro ndo:

—¡Ja anta chuntia intana ko titikaon anta! ¿Ti ngisa xrokonda tsake e ngajinnata ko sintakuan annta? Tikuunta chán nti i.

<sup>42</sup> Ti konchjiñe e chán ti jii ndo Jesús, espíritue Xixron anxrée me e juinchekuendaa chán, ko juanka chán ngata a nunte. Ko ndo Jesús kuyakutee ndo espíritu, ko me e kuachrje espíritu ña i ko koxruen en chán ko ndo Jesús kuajon ndo chán ngajin ndotée chán.

<sup>43</sup> Ko kain ni ste nti a tsango xronka na ixi bikon na juachaxin ijié chóna ndo Dio.

*Ndo Jesús íjngo chronga ndo tsen en ndo  
(Mt. 17:22-23; Mr. 9:30-32)*

Kain n̄a xrastexronka n̄a ixi ixr̄a ijié juinche e ndo Jesús, ko tjume e je e ndo ndache ndo sen teyuu chrikao ndo:

<sup>44</sup> —Tin ennta jian ti xrontatjunta, ko tjáña inta. Chujni xrotséna n̄a jan an, chjen en ndo Dio, xjan jongí e xranchi chujni, tsikaanna n̄a ti jii xi ña í.

<sup>45</sup> Ko je e sen kuienxin a sen nge e ndachro ndo, ixi xrakuajon a ndo Dio juachaxin xrokuienxin sen. Ko je e sen xrakon sen ko í juanchangíe a sen ndo nge e xrondachro ti ndachro ndo.

*¿Ngisen ícha tetuan an?*

*(Mt. 18:1-5; Mr. 9:33-37)*

<sup>46</sup> \*Ko tjume e sen teyuu chrikao ndo Jesús,juangíxin sen juao kichuu sen ixi ngisen ti je e sen ícha tetuan an.

<sup>47</sup> Ko ndo Jesús kono e ndo nge e xraxaon sen. Ko tjume e joa ndo naa chjan ko bake e ndo xjan tjenka ndo,

<sup>48</sup> \*ko ndache ndo sen:

—Ngisen tsayé e ichjan jii ixi titikaonna sen; sen me e tayé e sen jan an kaxon. Ko ngisen tsayé ena jan an, kaxon tsayé e ngisen xruan anna. Méxin, ngisen ícha tjinte a ngakjen ennta, sen me e ícha tjintee sen ti tetuan an ndo Dio.

*Chujni je a ningakoína, ni me e tsingijnana ixr̄a ntu una*

*(Mr. 9:38-40)*

<sup>49</sup> Ko tjume e ndo Juan ndache ndo ndo Jesús:

—Maestro, jan anna bikona naa xi ixi juachaxiannta jitantsje xa espíritue Xixron anxrée; ko

jan anna ntatjanna xa ixi ísinche a xa jaña, ixi je e xa chrijiko iana xa.

<sup>50</sup> Ko ndachro ndo Jesús:

—Tingakuen anta ni me e, ixi ni ningakona ina, je e na tsingijnanta na.

*Ndo Jesús kuyakutee ndo ndo Jacobo ko ndo Juan*

<sup>51</sup> Ko tjume e konchjiñe e nchakon satsji ndo Jesús nio ti jii ndotée ndo, ko xraxaon ndo itsji ndo tjajna Jerusalén.

<sup>52</sup> Je e ndo xruan an ndo kaxin sen kuitaonxin sen cha o sa ó, ko sen me e ikjui sen naa tjajna nunte Samaria bijée sen naa nchia ti tsjoké e ndo Jesús ko kao je e sen.

<sup>53</sup> Ko ni samaritano jua i kuajon na juachaxin nti a ixi ó no e na ixi ndo Jesús satji ndo tjajna Jerusalén.

<sup>54</sup> Hora kono e ndo Jacobo ko ndo Juan ixi ni samaritano jua i tsajon na juachaxin, je e sen ndache sen ndo Jesús:

—¿Nchána, á tjaunnta ixi tsjanchiana xroxin-gajinxin xro i ngajni sinchetjáña kain ni me e xranchi juinche e ndo profeta Elías ó sa ó?

<sup>55</sup> Ko tjume e ndo Jesús ngatjia tsje e ndo sen, ko kuyakutee ndo sen, ko ndachro ndo:

—Ja anta noa inta ngixe e espíritu chondanta.

<sup>56</sup> Ixi jan an, chjen en ndo Dio, xjan jongí e xranchi chujni, jui a ixi sintatjáña chujni. Na i. Jan an jui i ixi tsantsjen ije chóna na ixi tsechón na kain nchakon.

Ko tjume e sakjui sen inaa tjajna.

*Ngisen tjaun xrorué e ndo Jesús  
(Mt. 8:19-22)*

<sup>57</sup> Nchakon stetji sen ngatja cha o, naa xi ndache xa ndo Jesús:

—Jan an tja on xrorua anta nguixin ti no sat-sjinta.

<sup>58</sup> Ko ndo Jesús ndache ndo xi me e:

—Kain kutuunta chónnda ba tjaue tixin in ba, ko kain kuxe chónnda ba kakée ba, ko jan an, chjen en ndo Dio, xjan jongí e xranchi chujni, chonda i ti no tsarichrin.

<sup>59</sup> Ko íjngo ndo Jesús ndache ndo xi me e:

—Ja a rua nana.

Ko xi me e juate e xa ndachro xa:

—Tájonnta juachaxin tsijabaja ndotána.

<sup>60</sup> Ko juatingíexin ndo Jesús ndachro ndo:

—Tintu enta chujni tsiken en tsjabaa kichuu na; ko ja anta itjia ko ndachenta chujni xranchi jii juachaxin tetuan an ndo Dio.

<sup>61</sup> Ko tjume e inaa xi ndache xa ndo Jesús:

—Jan an tja on xrorua anta; tintunanta xrontatjan sen nía.

<sup>62</sup> Ko ndachro ndo Jesús:

—Ngisen teka ninge, ko ikjan sen tsje e sen, sen me e jua i sinche e ixra ti tetuan an ndo Dio.

## 10

### *Ndo Jesús xruan an ndo setenta chujni*

<sup>1</sup> Tjume e ndo Jesús kuinche e ndo níikán ko te chujni, ko je e ndo xruan an ndo sen, yuyu sen, tsitaon sen satsji sen kain tjajna ko nguixin ti no tjaun ndo xrokjui ndo.

<sup>2</sup> \*Ko ndachro ndo:

—Nduaxin ntatjunta, ícha tsikoña noa jai, ko sen sinche e ixra tsjé a sen. Méxin tinóatáanta ngajin nchéé nunte xroxruan an ndo itsjé sen sinche e ixra.

<sup>3</sup> \*Satjinta ixi jan an xruan annta itsjinta xranchi kutuchjon ngakjen en kundanixra.

<sup>4</sup> Tiku inta bolsa, tomi, kate ko xro an ngisen chje énta juajna ngatja cha o.

<sup>5</sup> Ti tsjasonta naa nchia, sa ó tájonnta juajna ko ndachronta: “Juaxruxin tsake e ni ste nchia ji i.”

<sup>6</sup> Ko siá xrojan ni nchia tikinixin tsayé e na juaxruxin, me e ícha juaxruxin tsayé e na xranchi ndachronta; ko siá na i, juaxruxin me e xrokjan ngajinnta.

<sup>7</sup> \*Ti tsjasonta naa tjajna, tituan anta je o naakua nchia ko intenta ko tin innta ti xrotjáanta ni nchia me e, ixi ngisen nche e ixra tikinixin xroxenge e na i na. Ko tji anta naa ko inaa nchia.

<sup>8</sup> Ti tsjasonta naa tjajna ko ni ste nti a jian tsiya anta na, intenta kain nge e xrotjáanta na.

<sup>9</sup> Nchexrue ennta ni ni e ste tjajna me e, ko ndachenta na: “Í kjín a jitii juachaxin tsetuan an ndo Dio.”

<sup>10</sup> \*Ko siá tsjasonta naa tjajna ko tsaya inta na jian, ja anta tachrjenta cha o ko ndachronta:

<sup>11</sup> \*“Inche tjajnánta itsé tuténana, tontsjengana ixi tsjakoxinna ixi ja anta ko jan anna chonda ina nge e xrotsje ena ixi ja anta kuitikaon anta ndo. Ko tono anta ixi juachaxin tetuanxin ndo Dio ó kjín a jii juachaxin.”

**10:3** Mt. 10:16.    **10:7** 1Co. 9:14; 1Ti. 5:18.    **10:10** Hch. 13:51.

**10:11** Mt. 10:7-14; Mr. 6:8-11; Lc. 9:3-5.

12 \*Jan an ntatjunta nchakon tsjexin nunte xas-intajni ícha tangi tson en ni tjajna me e ixi nge e kon en ni tjajna Sodoma ó sée.

*Kaxin tjajna kuitikaon a*

(Mt. 11:20-24)

13 '¡Tsango tangi tson annta ja anta ni tjajna Corazín! ¡Ko tsango tangi tson annta ja anta, ni tjajna Betsaida! Ixi siá ti ijié nge e junta a ngajinnta nti i xrokon en ngajin ni tjajna Tiro ko tjajna Sidón, ni me e ó sée xrokuindoxin nã ti ndako a juinche e nã ko xrotsjanga nã. Ko xrokueyá nã manta tiie ko xrobake e nã ntesoki i ngata a jaa nã.

14 Méxin nchakon tsjexin nunte nti i, ícha tangi tson annta ja anta ixi ti tson en ni tjajna Tiro ko tjajna Sidón.

15 Ko ja anta tjajna Capernaum, ¿á xraxaonnta itsjinta ti jii ndo Dio? Na i, je a jaña tson en, ja anta xroxingajinnta ti jii xro i xrochexin chujni titikaon a.

16 \*Ko ndachro ndo Jesús:

—Ngisen tsitikaon ti xrondachro ja anta, kaxon tsitikaonna nã jan an. Ko ngisen tsitikaon a ti xrondachronta, kaxon tsitikaon ana nã. Ko chujni tsitikaon a nã jan an, kaxon tsitikaon a nã ngisen xruan anna jui i.

*Ikjan sen setenta*

17 Tjume e ikjan sen níikán ko te chujni ko tsango juaxruxin ste sen, ko ndachro sen:

—Ncháanãna, kain espíritue Xixron anxrée titikaonna hora nichjana ixi juachaxiannta.



18 Ko ndachro ndo Jesús:

—Jaán, jan an bikon xranchi xingajinxin Xixron anxrée ngajní xranchi naa tóngíxin.

19 Jan an tjá anta juachaxin tsingatjanginta kunchee ko kulantajoon, ko tsixinte anta ti ña i, ko xro an nge e tson annta.

20 Ko take anta juaxruxin ixi espíritue Xixron anxrée titikaon ngajinnta. Ícha juaxruxin tinteenta ixi xranchi tin innta ó jitaxin ngajní.

*Ndo Jesús nichja ndo ngajin ndotée ndo jii ngajní (Mt. 11:25-27; 13:16-17)*

21 Ko hora me e Espíritue ndo Dio kuajon ngajin ndo Jesús juaxruxin ko ché e ndo nichje e ndo ndotée ndo jii ngajní ko ndachro ndo:

—Tajon juasaya ngajin ja anta Ndotána, Nchée nunte ko ngajní, ixi kuajonnta juachaxin ixi ngisen noe a xrokuienxin nã nge e kondée ngajní ko juinchenoe anta ni tsango no e ko ni tsango tienxin. Jaña, juinche e ja anta Ndotána ixi jaña tjaunnta.

22 \*Ko nichje e ndo sen nti a ko ndachro ndo:

—Ndotána chjána juachaxin ixi tetuan an kain nge e. Xro an ngisen no e ngisen chjen en je e ndo. Je o Ndotána chúxin ndo ngisen chjen en ndo. Ko xro an ngisen chúxin ngisen je e ndo, je o chjen en ndo, ko jan an tincha a ngisen tjaun xrochuxin Ndotána.

23 Ko tjume e ndo Jesús tsje e ndo sen teyuu chrikao ndo ko je o sen ndache ndo sen:

—Juaxruxin ste ni bikonxin ixi ikon nge e bikon ja anta.

<sup>24</sup> Ntatjunta ixí itsjé sen kuanichja sen chijnie ndo Dio ko itsjé sen rey tjaun sen xrobikon sen ti bikonta, ko bikon a sen. Ko tjaun sen xrokuin en sen xranchi ritin ennta jai, ko kuien a sen.

*Ndo Jesús tjako ndo ti junche e xi tjajna Samaria*

<sup>25</sup> \*Ko tjume e naa xi tjako ley tjajna Israel bin-gatjen xa nichje e xa ndo Jesús ixí tjaun xa tsono e xa á nduaxin no e ndo Jesús, ko juanchangi xa ndachro xa:

—Maestro, ¿inge e sinta a jan an ixí tsarichón kain nchakon?

<sup>26</sup> Ko ndachro ndo Jesús:

—¿Nge e jitaxin chijnie ndo Dio? ¿Nge e tienx-ian?

<sup>27</sup> Ko je e xa ndachro xa:

—Ley ndachro: “Tjue enta Ncháanta ndo Dio ixí nchijí asáanta, ko nchijí ja anta ko nchijí ti xraxaonxinnta; ko tjue enta ni kichuunta xranchi tjue enta asáanta.”

<sup>28</sup> Ko tjume e ndo Jesús ndachro ndo:

—Chao ndachrua. Siá ja a sinche e ji i, tsechón asáan kain nchakon.

<sup>29</sup> Ko xi tjako ley tjaun xa xrojuakoxin xa ixí ícha jian no e xa, méxin ndache xa ndo Jesús íjngo:

—¿Ngisen ni kichuuna?

<sup>30</sup> Ko tjume e ndachro ndo Jesús:

—Naa xi kuixin xa tjajna Jerusalén jitji xa tjajna Jericó, ko ngatja cha o bingakon en xa kaxin xi-che e, ko kue e na xa kain nge e chóna xa ko kain ti jitsáa xa, ko juaya na ngajin xa, xranaáxrokóñaxón na xa. Ko tjume e sakjui na.

31 Ko tjume e naa xitaana judío jitji xa xraje o cha o, ko bikon xa jitsinga xi me e, ko xitaana konchjino xa ko sakjui xa.

32 Ko kaxon no nti a jitatsinga naa xi levita, ko bikon xa xi jitsinga, ko kaxon konchjino xa.

33 Ko kaxon nti a jitji naa xi kuixin nunte Samaria, ko bikon xa jitsinga xi judío, ko je e xa bikonóe e xa xi me e.

34 Ko konchjiñe e xa tjenka xa, ko juinhexruen en xa ixí aceite ko vino kain ti no tsikoni e xa, ko kuetsía xa jian ti no tsikoni e. Ko tjume e juinheketa a xa xi kuntajnoé xa ko sabikao xa xi ni e naa nchia tjokéexin na, ko nti a je e xa kuayakon en xa xi ni e.

35 Ko nchakon sakjui xa, kuantsje xa yuu tomi ko juenga xa i na ngajin xi ndo a, ko ndachro xa: “Tayakon én xi ji i, ko siá sinchexienxian ícha tomi ixí je e xa, jan an tsjenga a na nchakon xrokjanna.”

36 Méxin ndachijiana, ¿ngisen ti ní xi ji i nduaxin tjue e xa xi juincheni e xiche e?

37 Ko xi tjako ley ndachro xa:

—Xi bikonóe e xi ni e.

Ko tjume e ndachro ndo Jesús:

—Méxin ja a kaxon itjia ko nche e jaña.

*Ndo Jesús ikjui ndo ndo a jan Marta ko jan María*

38 \*Tjume e ndo Jesús sakjui ndo, ko kuiji ndo naa tjajna nchín. Nti a jii naa jan ndatin in Marta ko kuajon jan juachaxin kuitu e ndo ndo a jan.

39 Ko je e jan Marta chóna jan naa jan kichuu jan ndatin in María. Ko je e jan María bake e jan

tjenka tutée ndo Jesús stetin en jan nge e jindachro ndo.

<sup>40</sup> Ko jan Marta tsango xraxaon jan sinchekonchjian jan nge e sine sen ko chónnda jan itsjé xra, méxin konchjiñe e jan ngajin ndo Jesús ko ndachro jan:

—¿Nchána, á xraxaon a ixí jan kichuuna tintuna jan jan on rinta a kain ixra? Ndache jan tsingij-nana jan.

<sup>41</sup> Ko ndo Jesús ndache ndo jan Marta:

—Marta, Marta, ja anta tsango yaanta juach-jaon ixí kain ixra chondanta,

<sup>42</sup> ko jii naakua nge e tsango tjintee. Ko jan María kuitja jan nge e ícha jian, ko xro an ngisen tsantsje e jan ji i.

## 11

*Ndo Jesús juako ndo xranchi xronichje eni ndo Dio*

*(Mt. 6:9-15; 7:7-11)*

<sup>1</sup> Naa nchakon ndo Jesús jinichje e ndo ndotée ndo, ndo Dio, ko juexin nichja ndo, tjume e naa sen chrikao ndo ndachro sen:

—Nchána, nchekuannaninta xranchi xronichja ana ndo Dio xranchi ndo Juan juako e ndo chujnie ndo.

<sup>2</sup> Ko ndachro ndo Jesús:

—Nchakon nichje enta ndo Dio, ndachronta: Ndotáina Dio ritjennta ngajní, tsango tjúá ja anta.

Ja anta tetuan annta ngajinna.

Nche enta xranchi tjaunnta ngata a nunte nti i, xranchi nche enta ngajní.

<sup>3</sup> Ko ja anta tájonnta nutja sinena kain nchakon.

<sup>4</sup> Ko nchemé enta kain ti ndako a nta ana, xranchi jan anna tjáñanana ti ndako a juinchenana na.

Tájon anta juachaxin ngajin Xixron anxrée ixi sinche e xa tsitexinna ti ndako a.

<sup>5</sup> Ko kaxon ndachro ndo Jesús:

—Take kona ixi naa ja anta chondanta naa xi tjentonta, ko ngusine tiie xrokjuinta ndo a xa ko xrondachenta xa: “Amigo, nchekjenna níi nutja,

<sup>6</sup> ixi kuij naa xi chúxin, kuixin xa ikjín, ko kuiji xa nía ko jan an xro an chonda xrotjá a xa.”

<sup>7</sup> Ko siá tsjate e xi jii ngaxin in nchia xrondachro xa: “Chjánai ana ixra; ó jije e nchia ko chjan na ko jan an ó tsintehrina; jua i tsaya xrotjá a nge e.”

<sup>8</sup> Ko ntatjunta siá chro a xa tsaya xa xrotjáanta xa nge e tjaunnta maski tjentonta xa, tsaya xa xrotjáanta xa kain nge e xrokonda anta ixi ítjaun a xa ícha xrokuiye enta xa.

<sup>9</sup> Méxin, jan an ntatjunta: Tjanchianta ko ndo Dio tsajon ndo; tjéenta nge e ko tsinchíinta; tinganta ntachja, ko tsantje e ndo.

<sup>10</sup> Ixi ngisen tjanchia nge e, tsayé e sen; ko ngisen tjée, sen me e tsitja sen; ko ngisen tinga ntachja, xitje e ntachja.

<sup>11</sup> ¿Á xrojan ja anta chondanta chjan anta ko tjanchia xjan nutja, á xrochje énta xjan naa ixro? Q, ¿tjanchia xjan kucheé ko xrochje énta xjan naa kunchee?

<sup>12</sup> ¿Q tjanchia xjan joja ko xrochje énta xjan naa kuntanchia?

<sup>13</sup> Méxin, siá ja anta maski jian inta no anta chje énta chjan anta nge e jian, ícha Ndotáina ndo

Dio jii ngajní tsajon ndo Espíritue ndo ngajin sen tsjanche e ndo!

*Ndachro nā ixi ndo Jesús chón̄da ndo juachaxien Xixron anxrée*

*(Mt. 12:22-30; Mr. 3:19-27)*

<sup>14</sup> Naa nchakon ndo Jesús kuantsje ndo naa espíritue Xixron anxrée tsijinchenosin naa xi. Ko hora kuachrje espíritue Xixron anxrée, je e xi chao nichja xa. Tjume e kueya ni ste nti a xronka nā ixi jaña juinche e ndo Jesús.

<sup>15</sup> \*Ko kaxin nā ndachro nā:

—Xi ji in tantsje xa espíritue Xixron anxrée ixi chón̄da xa juachaxien Beelzebú, me e Xixron anxrée, xi tetuen en kain espíritu ña i.

<sup>16</sup> \*Ko ikaxin nā tjaunna nā xrotsje e nā á nd-uaxin no e ndo Jesús, méxin juanche e nā ndo xrojuinche e ndo naa ixrā ijié ixi juachaxien ndo Dio jii ngajní.

<sup>17</sup> Ko je e ndo no e ndo nge e stexraxaon nā, ko ndachro ndo:

—Xrojan tjajna je a naxraje o xraxaon ni tjajna me e ko tē tō̄ kichuu nā, ndatsitjáña, ko ni ste naa nchia, siá je a naxraje o xraxaon nā, kaxon jua i tsintee nā.

<sup>18</sup> Jaña kaxon, siá Xixron anxrée tetōka o xa ni kichuu xa, tsitjáña juachaxin chón̄da xa. Ja in ndachrjan, ixi ja anta ndachronta ixi jan an tantsjexin espíritue Xixron anxrée ixi juachaxien xa.

<sup>19</sup> Ko siá jaña xrokjui, ¿ngisen chjée ni chrjiku u ja anta juachaxin tsantsje nā espíritu ña i?

Méxin, je e na xrondachro na ndako a jii nge e stexraxaonnta.

<sup>20</sup> Ko siá jan an tantsjexin espíritue Xixron anxrée juachaxien ndo Dio, me e xrondachro ixi ti tetuan an ndo Dio ó kuii ngajinnta.

<sup>21</sup> Nchakon naa xi tsanga yaa xa ntatjo ko jindaa xa ndo a xa, xro an nge e tsitjáña.

<sup>22</sup> Ko nchakon tji inaa xi ícha tsanga ko tsetoka o xa xi nchée nchia ko tsjacha xa, ko tsantsje e xa kain chika yama xi ndo a, ko satsjikao xa kain nge e chónða xi ndo a ko tsonchjeya ngajin ni chúxin xa.

<sup>23</sup> \*Ngisen titikaon ana jan an, ni me e ningakonna; ko ngisen tingijna i ixra nta a, ni me e tingakon enna.

*Naa espíritue Xixron anxrée tjngo ikjan  
(Mt. 12:43-45)*

<sup>24</sup> Ko naa espíritue Xixron anxrée kuachrjexin aséen naa chujni, satji ti jii nunte xema tijée no tsjoké e. Ko kuitja i ti no tsjokéexin, je e espíritu jixraxaon: “Jan an xrokjanna nía ti kuachrjexin.”

<sup>25</sup> Ko nchakon ikjan espíritue Xixron anxrée, tjume e tixin in aséen chujni ti kuachrjexin, ixi bikon xa ni me e ste na xranchi naa nchia tsikajon na ko chaxro tsje e.

<sup>26</sup> Ko tjume e espíritue Xixron anxrée tirué e yaṭo espíritu ícha ña i, ko kain espíritu tixin in ngaxin in aséen ni me e. Ko tjume e ícha tangi ton en na ixi sa ó.

*Ngisen nduaxin juaxruxin jii*

27 Ko ndo Jesús jinichja ndo kain ji i, ko tjume e naa nchri ste ngakjen en nã nti a, nichja nchra ndachro nchra séen:

—¡Tsango juaxruxin jii nchri juntajongí a ko juntakangia!

28 Ko ndachro ndo Jesús:

—¡Ícha juaxruxin tsintee chujni tin en nge e ndachro ndo Dio ko titikaon!

*Ni ndako a xraxaon juanchia nã naa nge e ijie  
(Mt. 12:38-42; Mr. 8:12)*

29 \*Tjume e itsjé nã konkueya nã ngandajin ndo Jesús, ko je e ndo juangíxin nichja ndo ko ndachro ndo:

—Kain ni ste jai, je e nã ña i nã ko tjanchia nã tsikon nã naa nge e ijie; ko xro an nge e sinta a; je o nge e kon en ndo profeta Jonás, ndo kuachronga chijnie ndo Dio sa ó.

30 Xranchi konoxin ndo Jonás ngajin ni kuintee tjajna Nínive ixi xrokuienxin nã, jaña kaxon konoxinna jan an, Chjen en ndo Dio, xjan jongí e xranchi chujni, ixi tsikon kain ni jii jai.

31 Nchakon tsoñã ijieé kain ni ste jai, nchri reina tsiki xìn naa nunte ícha níjin tsingatjen nchra ko tsjankata a nchra ijie ni ste jai ixi nchri reina me e tsiki xìn tsango ikjín ixi xrokuin en nchra ti juako ndo Salomón. Ko jai nti i ritjén jan an ngajinnta ko ícha chonda juachaxin ixi juachaxin kuachóna ndo Salomón.

32 Ko ni kuintee tjajna Nínive kaxon tsingatjen nã nchakon tsoñã ijie ngajin kain chujni, ko tsjankata a nã ijie ni ste jai ixi kain ni tjajna Nínive kuindoxin nã ko kuintu e nã ijie kuachóna nã



nchakon kuin en na chijnie ndo Dio tsichronga ndo Jonás ó sée. Ko jai nti i ritjén jan an ngajinnta ko ícha chonda juachaxin ixi juachaxin kuachónnda ndo Jonás.

*Ikonni, me e xro i tingasáña cuerpoeni*

*(Mt. 5:15; 6:22-23)*

<sup>33</sup> \*Xro an ngisen tjaaka naa xro i ko tsemá sen xro i me e, ko kaxon take a na xro i ngaxin in naa ntaa. Noi take e na xro i ixi kain ni tixin in nchia tsikon na ti tingasáña.

<sup>34</sup> Jaña ikonni xranchi naa xro i tingasáña cuerpoeni. Méxin, siá jian ikonnta, kaxon nguixin cuerpoanta tingasáña. Ko siá na i, jian a ikonnta, kaxon nguixin cuerpoanta naxixe e jii.

<sup>35</sup> Tsje enta jian ixi á chao jii xro i chondanta, á je a ti naxixe e stenta.

<sup>36</sup> Méxin, siá nchijíi cuerpoanta chónnda ti tingasáña, ko je a tu o chónnda naxixe e, jaña nchijíinta jian tingasáña xranchi xrochondanta naa xro i chaxro tingasáña.

*Ndo Jesús tuyakutéé ndo xi fariseo ko xi tjako ley*

*(Mt. 23:1-36; Mr. 12:38-40; Lc. 20:45-47)*

<sup>37</sup> Ndo Jesús juexin ndachro ndo kain ji i, tjume e naa xi fariseo kuinóatée xa ngajin ndo Jesús ixi itsji ndo ndo a xa sineka o xa ndo. Tjume e ikjui ndo Jesús ndo a xa ko kuixin in ndo ko bake e ndo ti jii mesa.

<sup>38</sup> Ko je e xi fariseo xrakon xa ixi bikon xa ixi ndo Jesús bake e ndo juine ndo ko konti a ndo inda itja ndo xranchi kuanche e kain ni judío.

<sup>39</sup> Ko ndo Jesús ndachro ndo:

—Ja anta xi fariseo nchetjúanta tuenxin vaso ko laato, ko ti ngaya asáanta jikaon kain ti chjuya anta ko ña inta.

<sup>40</sup> ¡Ja anta nintanta! ¿Á noa inta ixi ngisen juinchekonchjian cuerpo, kaxon juinchekonchjian ngaxin in cuerpo?

<sup>41</sup> Siá ixi nchijí asáanta chje énta ni nóa nge e chondanta, kaxon jaña nchijí asáanta tsontjúa.

<sup>42</sup> ¡Tsango tangi tson annta ja anta fariseonta! Ixi ja anta chje énta ndo Dio ti texin parte ka menta ko kain kaxroan, ika ko itu ineni ko nche anta nge e jian xrojuinche enta ko tjao anta ndo Dio, méxin chao xrochje énta ndo Dio nge e chondanta ko kaxon xrotjáña inta sinche enta kain nge e jian.

<sup>43</sup> ¡Tsango tangi tson annta, ja anta fariseonta! Ja anta tjaunnta tsaye enta xitaon ícha chaxro ngaxin in ni ngo, ko tjaunnta ixi kain na xrotjáanta juajna ngatja cha o.

<sup>44</sup> ¡Tsango tangi tson annta ja anta xratjakonta ley ko ja anta fariseonta ixi ja anta nche anta xranchi ndachronta! Ixi ja anta xranchi tuye tsixrabaa ni tsiken en stenta ko tikon a na tuye me e ko ta tu na tuye ko noe a na ixi nti a tsixrabaa chujni.

<sup>45</sup> Ko tjume e naa xi tjako ley ndache xa ndo Jesús:

—Maestro, ti ndachronta jaña, xranchi jan anna tuyakutéentana.

<sup>46</sup> Ko ndachro ndo Jesús:

—¡Kaxon ja anta tsango tangi tson annta, ja anta xro tjakonta ley! Ixi ja anta tetuen ennta na sinche e na nge e tsango tangi ko jua i sinche e na

me e. Ko ja anta tingijna inta n̄ sinche e n̄ kain ti tetuan annta.

<sup>47</sup> 'iTsango tangi tson annta xi ja anta nchekonchjiannta tjatu o tsango chaxro ngata a ti jixrabaa kain sen profeta tsichronga chijnie ndo Dio sa ó, ko me e ni ndotáchri anta xranchrjen tsikoña n̄ sen!

<sup>48</sup> Ko jaña ja anta tjakonta ixi chao ti tsijinche e ndotáchri anta xranchrjen sa ó, ixi je e n̄ tsikoña n̄ sen profeta ko jai ja anta nchekonchjiannta tjatu o chaxro ngata a ti jixrabaa sen me e.

<sup>49</sup> 'Ko ndo Dio tsango jian no e ndo, méxin, ndachro ndo: "Xroxruan annta ngisen xrochronga chijnina ko ngisen tsjako ngajinnta, ko ja anta naatsóñaxónnta sen ko ikaxin sen chinga sinchekuunta sen."

<sup>50</sup> Méxin, ndo Dio tsjankata a ndo ijié ngajin ni jii jai ixi kain sen profeta kuinteken en ko kuintji jnié sen, ti xra xrangíxixión konchjian nunte ko ti nchakon jai;

<sup>51</sup> xranchakon kuen en ndo Abel ko hasta ti kuen en ndo Zacarías, ndo kóñaxin n̄ ngusine ti jii altar ko ni ngo. Méxin, ntatjunta, ndo Dio tsjankata a ndo ijié ngajin ni ste jai ixi xranchi kuen en kain sen sa ó.

<sup>52</sup> 'iTsango tangi tson annta ja anta xro tjakonta ley! Ixi ja anta chondanta xroon jitaxin kain ti tetuan an ndo Dio ko ja anta tjaun anta titikaonnta, ko tingijna inta ni tjaun tsitikaon.

<sup>53</sup> Juexin ndachro ndo Jesús kain ji i, tjume e xi tjako ley ko xi fariseo tsango koñaao xa ngajin ndo Jesús, ko tjume e juanchangi e xa ndo Jesús tsango itsjé nge e,

<sup>54</sup>ixi xrobikon xa siá je e ndo xronichja ndo naa nge e ndako a ixi chao xrobankata a xa ijię ngajin ndo.

## 12

### *Ndo Jesús ndachro ndo nge e tson en ni fariseo*

<sup>1</sup>\*Tjume e xejo kueya na, tsango kueya na statelyá kichuu na. Ko je e ndo Jesús kuaxi nichja ndo sa ó ngajin sen teyuu chrikao ndo ko ndachro ndo:

—Nche anta xranchi nche e xi fariseo, ixi ndachro xa ko nichja xa jian ko ti ndachro xa, nche a xa.

<sup>2</sup>\*Ixi xro an nge e nche e chujni tsemá, kain nge e ti nche e chujni ti jimá, kain me e naa nchakon tsonoxin.

<sup>3</sup>Méxin, kain ti imao tsinichjanta, tsii nchakon tsonoxin; ko kain ti tsinichjanta imao ngaxin in nchia, tsajin in na nchia tsuyako na tsin en kain chujni.

### *Ngisen xroxrakon enni*

*(Mt. 10:28-31)*

<sup>4</sup>Jan an ntatjunta ixi tjento kichuuna, xrakuen anta ngisen naatóñaxón cuerpoeni ixi me ó chao sinche e na.

<sup>5</sup>Jan an xrontatjunta ngisen xroxrakon ennta: xrakon ennta ndo nduaxin tsantsja anta asáanta ko chónnda ndo juachaxin xroxruan annta ndo ti xro i xrohexin kain ni ndako a nche e. Je o ngajin je e ndo xroxrankana.

<sup>6</sup> ¿Á tuchji a na ó kuxechjan ixi yuu tomi nchínchín? Ko je e ndo Dio tjáñe a ndo ninaa ba.

<sup>7</sup> Ko ngujngu ja anta Ndotáina Dio je e ndo no e ndo ngijan in xrajaanta chondanta; je e ndo beki ndo naa ko naa ka. Méxin, ja anta xrakon anta, ixi ja anta ícha tjinteenta ixi kueya kuxechjan.

*Ngisen tsosue a xrondachro chuxinna ngatoxin ikon chujni*

*(Mt. 10:32-33; 12:32; 10:19-20)*

<sup>8</sup> Jan an ntatjunta ixi kain sen xrondachro chuxinna ngatoxin ikon chujni, kaxon jan an, chjen en ndo Dio, xjan jongíe xranchi chujni, xrontatjan kain sen angéel ndo Dio ixi jan an kaxon chuxin sen.

<sup>9</sup> Ko ni xrondachro chuxin ana nã ngatoxin ikon chujni, jan an kaxon xrondachrjan ngajin sen angéel kondee ndo Dio ixi chúxin a sen kaxon.

<sup>10</sup> \*Ko xrojan ni xronichja ndako a kondee nã jan an, chjen en ndo Dio, xjan jongíe xranchi chujni, xrachao tsumé e jíee ni me e; ko ni xronichja ndako a kondee espíritue ndo Dio, ni me e tsango tangi tson en nã ko tsumé a jíeena nã.

<sup>11</sup> \*Ko nchakon tsiku unta nã ngajin ni ste ni ngo, o ngajin xi sinchéña ijie, o naa xi tetuan an, ta inta juachjaon ixi nge e tsjatingíexinnta o nge e xrondachronnta,

<sup>12</sup> ixi Espíritue ndo Dio sintakuan annta ko xrondachro nge e tsjatingíexinnta.

*Ti ndakua i xraxaon naa ni chónnda tomi*

---

**12:10** Mt. 12:32; Mr. 3:29.  
21:14, 15.

**12:11** Mt. 10:19, 20; Mr. 13:11; Lc.

13 Tjume e naa xi jii ngakjen en kueya n̄a ndache xa ndo Jesús:

—Nchána, ndache xi kichian xrochjána xa ngusinexin ti kuintu e sen nía.

14 Ko je e ndo Jesús ndache ndo xa:

—¿Ngisen ndachro ixi jan an sintaña ijiē ngajinta ko tsonchjeya anta ti kuintu e ni ndúinta?

15 Ko kaxon ndache ndo kain ni stetin en:

—Ko xroxraxaon anta ixi xrochondanta itsjé nge e ko itsjé tomi. Ixi je a ti itsjé xrochondanta, me e xrotjáanta juaxruxin.

16 Ko kaxon ndo Jesús beki e ndo n̄a naa chijni:

—Bake e naa xi kuachóna xa itsjé nge e. Ko chjakée xa kóña kueya trigo, méxin, kueya juatsi in xa.

17 Ko je e xa jixraxaon xa: “¿Nge e sinta a ixi íko a no tsengachjian kain trigo juaka?”

18 Ko ndachro xa: “Ó nóna nge e sinta a. Tsonjamangi kain nchia nchíin ko sintaña kaxin nchia ícha ijié ko nti a tsjatsiin kain trigo kóña.”

19 Ko xrontatjan aséenna: “Kueya nge e kuatsían ko chonda itsjé nge e tsarichonxian itsjé nano. Inte ko ti ia, tjoka a ko take é juaxruxin.”

20 Ko je e ndo Dio ndache ndo xa: “Ja a ndako a xraxaon ko tienxin a, ixi tiie jai tsen én ko tsitjáña asáan ko, ¿ngisen tsonde e kain ti kuatsían?”

21 Ko jaña tson en kain ni ícha tjaun xrochóna tomi ko kain nge e jii ngata a nunte ko xro an nge e chóna n̄a ngajin ndo Dio.

*Ndo Dio tayakon en ndo kain chjen en ndo  
(Mt. 6:25-34)*

22 Ko tjume e ndache ndo Jesús sen teyuu chrikao ndo:

—Jan an ntatjunta ta inta juachjaon ixi nge e sintenta ko nge e tsaritsiinta.

23 Ícha tjintee ti tsechónni ixi nge e sineni, ko cuerpoeni ícha tjintee ixi manta tsetsáani.

24 Tsje enta xranchi jii kunta a. Tenga i ba ko xro an noa tatsi in ba, ko chónda i ba no tsechjianxin no, ko ndo Dio tajon ndo nge e ine ba. ¿Á je a ícha tjinteenta ja anta ixi kuxe?

25 Maski ja anta, ícha taanta juachjaon, jua i tsarichonnta ícha nchakon.

26 'Siá jua i nche enta nge e ícha tangi a, ¿sonda yaanta juachjaon ixi ti ícha tangi?

27 'Tsje enta xranchi tangi itsjo, tsjo me e nche a tsjo ixra ni tjaun a tsjo manta. Ko jan an ntatjunta ixi ndo rey Salomón, maski ícha chaxro kuetsaa ndo, kuetsa i ndo xranchi naa itsjo me e.

28 Siá ndo Dio nchekitsáa ndo ika, maski jai jichón ka ngataon ijngi ko ndúya ó xroche ka, ko á je a ícha chaxro sinchekitsáanta ndo ja anta ti chuntia inta ndo.

29 Méxin, ja anta ta inta juachjaon ixi nge e sintenta o nge e tsi inta.

30 Ixi ngisen chúxin a ndo Dio ícha tjaun na xrochónda na kain nge e. Ko ja anta chondanta Ndotánta jii ngajní, ko je e ndo ó no e ndo kain nge e xrokonda anta.

31 Ko ja anta cháña sa ó tjéenta ti tetuan an ndo Dio, ko je e ndo tsajon ndo kain nge e xrokonda anta.

*Tsango tjintee nge e xrochondana ngajní  
(Mt. 6:19-21)*

<sup>32</sup> Kutuchjonna xrakon anta. Maski kueya inta, Ndotáanta jii ngajní, tjaun ndo tsake enta ngajin ndo.

<sup>33</sup> Nchekjinta ti chondanta ko chje énta tomi ni nóa; ko tjume e nchekonchjianta puxa tichje a, ixi jaña xrochondanta ti ícha tjintee ngajní, ko me e kain nchakon tsake e ko tsjexin a. Ixi nti a jua i tixin in xiche e ko t̄i a kuch̄ii.

<sup>34</sup> Ixi ti no tsake enta ti tjintee chondanta, nti a tsake e asáanta kaxon.

*Xrotjá inta kotachrin, tsarichonnta*

<sup>35</sup> \*Kainko nchakon jian xrotsje enta ko nchekanga inta xro i jii ngaya asáanta.

<sup>36</sup> \*Ja anta take énta xranchi naa xi nche e ixra, xi jichón en xa xrokjan nchéé xa, ndo ts̄i x̄in ti tsikute e na. Ixi hora ts̄ii nchéé xa ko tseya ndo, je e xa tuinxin tsantje e xa nt̄achja tixin in ndo.

<sup>37</sup> Tsango juaxruxin tsintee kain ngisen nche e ixra nchakon xrokjan nchéé na ko tsitja ndo na stechón na, tsikejua i na. Ko jan an ntatjunta, ixi je e ndo tsajon ndo juachaxin tsake e na ti jii ntachaon\* ko tsajon ndo nge e sine na.

<sup>38</sup> Ijié juaxruxin tsintee na maski ts̄ii ndo ngusine tiie o tsingasáñaja ixi stechón en na ndo ko tsikejua i na.

<sup>39</sup> \*Ko tienxinnta ji i: siá xi nchéé naa nchia xrokono e xa nge e hora ts̄ii xiche e, je e xa xrokue-

---

**12:35** Mt. 25:1-13.    **12:36** Mr. 13:34-36.    \* **12:37 ntachaon**  
mesa    **12:39** Mt. 24:43, 44.



jua i xa hora me e, ko xrokuintue a xa tsee xiche e ndo a xa.

<sup>40</sup> Ja anta kaxon tarichrin anta; ixi jan an, chjen en ndo Dio, xjan jongí e xranchi chujni, tsji i naa nchakon ko ja anta noa inta ngixe e nchakon ko ngixe i hora tsji i.

*Yuu xi nche e xra, naa xi jian, ko naa xiña i  
(Mt. 24:45-51)*

<sup>41</sup> Ko tjume e ndo Pedro juanchangi e ndo ndo Jesús:

—Ncháina Jesús, ti ndachronta ji i, ¿á tsienxin kain na o jan onna tsianxinna?

<sup>42</sup> Ko juatingíexin ndo Jesús:

—Naa xi jian tetuan an ni nche e ixra, me e xrondachro ixi je e xa xrotsje e xa nchia ko tsajon xa sine kain ni ste nchia me e.

<sup>43</sup> Chaxro tsono e aséen xi me e nchakon tsji nchéé xa ko tsichuexin xa ixi jinche e xa ti kuituen en xa.

<sup>44</sup> Jan an ntatjunta ixi ndo tetuen en nchia tsake e ndo xi kuitikaon ixi je e xa tsetuan an xa kain ixra ko kain nge e chónda ndo ndo a.

<sup>45</sup> Ko siá xi sinche e kain ixra me e xroxraxaon xa ixi nchéé xa tsonchrjen en tsii ndo, ko tsaaxa ndako a sinchekao xa ni nchexra, ni nchri ko ni xi tituen en xa, ko je e xa take e xa sine xa ko tsi i xa ko xrokoan xa,

<sup>46</sup> ko nchakon ko hora xraxaon a xa tsii nchéé xa, ndo tetuen en nchia, tjume e je e ndo tsoñaon ndo ngajin xa ko tsikaon xa ko tsengi ndo xa. Xranchi tson en xi me e, jaña tson en kain ni titikaon a ndo Dio.

<sup>47</sup> Xi nche e ixra, siá no e xa nge e tjaun nchée xa sinche e xa ko je e xa titikaon a xa ti kuituen en xa, xi me e tsanga tsikaon xa.

<sup>48</sup> Ko xi noe a ixi ti ndako a jinche e xa, xi me e ícha tsikaon a xa. Méxin, ngisen ícha kueya kuayé e, sen me e ícha kueya xrokonda tsajon sen. Ko sen ícha kueya no e, sen me e ícha kueya xroxranche e sen.

*Je a naxraje o xraxaon na kondee ti juako ndo Jesús*

*(Mt. 10:34-36)*

<sup>49</sup> Jan an jui i ixi sintakakiin xro i ngata a nunte nti i. ¡Ko jan an ó tja on xrojuaa xro i jai!

<sup>50</sup> \*Xrokonda nge e tsango tangi sinchena na, ko jai jitoni e aséenna tsijija nchakon tson en me e.

<sup>51</sup> Siá ja anta xraxaonnta ixi jan an bikian juaxruxin ngata a nunte nti i, ntatjunta na i. Méxin jée xroxraxaon ngujngunta.

<sup>52</sup> Ixi nchakon xrangíxixín jai ko kaxin nchakon tsij, na ó ni ste naa nchia, ni me e xrochjeya na. Níi na tsoñao e na ni yuu ko ni yuu tsoñao e na ni níi.

<sup>53</sup> Ko ndotata xraningakon en ndo chjen en ndo, ko ichjan xraningakon en xjan ndotée xjan. Ko janána xraningakon en jan nchrichje en jan, ko nchrichje en jan xraningakon en xjan janée xjan. Jancha a xraningakon en jan nchritakinde e jan ko nchritakinda xraningakon en nchra jachée nchra.

*Ngajní tjakoxin xranchi tson en nchakon tsij*

*(Mt. 16:1-4; Mr. 8:11-13)*

<sup>54</sup> Ndo Jesús kaxon ndache ndo na:

—Ko nchakon tikonnta tsonchjian itjuí ti no tetaonxin nchakon, ja anta ndachronta ixi ó tsii chrin, ko jaña ton en.

<sup>55</sup> Ko nchakon chrinto ti xin no níjin, ja anta ndachronta tsania súa, ko jaña ton en.

<sup>56</sup> ¡Ja anta ndako a xraxaonnta! Ja anta ó no anta ko chuxinnta nge e ton en ngajní ko ngataon ijngi, ko ja anta noa inta ko tienxin anta nge e jiton en nchakon stenta.

*Tetokui anta ni kichuunta*  
(Mt. 5:25-26)

<sup>57</sup> ¿Sonda nchekonchjian inta ja onta ti nchekuu kichuunta?

<sup>58</sup> Siá xrojan ngisen tsjankata anta ijié ko xrokonda itsjinta ngajin xi nchekonchjian ijié, cháña naa tjaoxon kichuunta ti xrayáanta cha o ko xratjaso anta ti jii xi tetuan an. Ixi siá tsjasonta nti a, xi nchéña ijié xroxraxon innta xa ndo achjiso.

<sup>59</sup> Ko jan an ntatjunta ixi tsachrjexin anta nti a tsjengajanta kain tomi chondanta.

## 13

*Xrokonda tsindoxin nã ko sinche e nã ti jian*

<sup>1</sup> Nchakon me e konchjiñe e kaxin nã ngajin ndo Jesús ko beki e nã ndo xranchi juinche e xi Pilato ixi tsiketuan an xa kuen en kaxin xi tsiki xin nunte Galilea. Ko jnié xa tsikintji ti no chexin jnié iko ti bakajonxin nã juasaya ngajin ndo Dio.

<sup>2</sup> Ko ndo Jesús juatingíexin ndo:

—¿Á xraxaonnta ixi je e xa ícha kueya ijie sínká xa ixi kain ni tjajnéé xa ni Galilea, méxin jaña kon en xa?

<sup>3</sup> Jan an ntatjunta ixi na i. Ko siá ja anta tsindoxin anta xranchi nche enta ko xranchi xraxaonnta, kainnta jaña tsinteken ennta kaxon.

<sup>4</sup> Q, ¿á xraxaonnta kaxon ni itejní kuen en, ni xratja torre Siloé? ¿Á ni me e ícha ijie kuachónnda na ixi ikaxin ni bake e tjajna Jerusalén?

<sup>5</sup> Jan an ntatjunta na i. Ko siá ja anta tsitikaon anta ti tetuan an ndo Dio, ja anta jaña tsinteken ennta kaxon.

### *Ntaa tu higo tajon a ntaa itu*

<sup>6</sup> Tjume e ndo Jesús beki e ndo sen:

—Naa xi kuachónnda xa naa ntaa tu higo ngataon ijngi. Ko ikjui xa kuitsje e xa ntaa á chónnda ntaa itu, ko xro an itu kuitja xa.

<sup>7</sup> Ko tjume e ndache xa xi tsje e jngi e xa: “Ó chónnda níi nano titsja a ntaa ji i ko xro an itu titja. Méxin cháña tonchrijian ntaa, xruenxon jita a ntaa ngata a nunte na.”

<sup>8</sup> Ko xi tsje e ijngi ndachro xa: “Ja anta, tintu enta ntaa nano ji i; jan an sintandá inche tutée ntaa ko tsjánka a ntaa xineno tsitjo.

<sup>9</sup> Ko xrotsje ena á tsajon ntaa itu. Ko siá na i, me e ché xrochrijin ntaa.”

### *Ndo Jesús nchexruen en ndo naa nchri jisée*

<sup>10</sup> Naa nchakon tjoké e ni judío, ndo Jesús juinchekuen en ndo na chijnie ndo Dio ngaxin in naa nchando e ndo Dio.

11 Ko nti a jii naa nchri ni e itejní nano. Espíritue Xixron anxrée tsijatu o nchra, méxin jisée nchra, ko jua i xendua nchra.

12 Ndo Jesús bikon ndo nchra, ko kuiye e ndo nchra ko ndachro ndo:

—Ja a nchri jai kuachrje ichin kuachonda.

13 Ko tjume e je e ndo bake e ndo itja ndo ngata a nchra, ko tuinxin je e nchra xendua nchra ko kuaxi nchra kuajon nchra juasaya ngajin ndo Dio.

14 Ko xi tetuan an ni ngo koñaao xa ixi ndo Jesús juinchexruen en ndo nchra nchakon tjoké e na. Méxin je e xa ndache xa kain ni ste nti a:

—Jii ikjaon nchakon tikinixin tson en ixra; nchakon me e tsjiinta tsoxruan annta, ko jai nchakon tjoké eni tikinixin a tson en ji i.

15 Ko tjume e ndo Jesús ndache ndo xa:

—Ncheye a asáanta. ¿Á toxindange anta kuxinta anta o kuntajnoanta ko tiku unta ba tsi i ba inda nchakon tjoké eni?

16 Ko nchri jii xjantié ndo Abraham, Xixron anxrée tsikintexin xa nchra ixi ichin tejní nano ko, ¿á tikinixin a tsoxrue en nchra nchakon tjoké eni?

17 Jaña ndachro ndo Jesús, méxin kaxin na ningakon en na ndo ixi juinchesue e ndo na; ko ni ste nti a tsango juaxruxin ste na ixi bikon na tsango nge e ijíé juinche e ndo.

*Ndo Jesús juako ndo kondee naa tsee mostaza  
(Mt. 13:31-32; Mr. 4:30-32)*

18 Ko tjume e ndachro ndo Jesús:

—¿Xranchi jii ti tetuan an ndo Dio?

19 Me e jii ndako naa tsee mostaza. Naa xi bengaa tsee me e jngi e xa. Ko bangi ka ko kóña naa ntaa ijié ko kuxe juinchéña ba kakée ba ngata a chaan ntaa me e.

*Ndo Jesús juako ndo kondee ti tja in nutja  
(Mt. 13:33)*

20 Ko kaxon ndachro ndo Jesús:

—¿Nge e chao tsikonxinni ti tetuan an ndo Dio?

21 Me e xranchi ti nchetja in nutja ní medida ikuen tsitsé naa nchri ko jaña juan in chu u.

*Ntachja ijno  
(Mt. 7:13-14, 21-23)*

22 Sakjui ndo Jesús no tjanya Jerusalén, ko kuatsinga ndo itsjé tjanya ijié ko tjanya nchiín ko juinhekuen en ndo na chijnie ndo Dio.

23 Ko bake e naa xi juanchangi e xa ndo Jesús ko ndachro xa:

—¿Á kain a chujni xrochóna juachaxin tsechón kain nchakon?

Ko ndo Jesús ndachro ndo:

24 —Xakon annta tsixixinnta ixi ntachja ijno, ixi ntatjunta itsjé na tjaun na tixin in na nti a ko jua i tixin in na.

25 Ko tjume e ndo ndo a tsingatjen ndo ko tsije e ndo ntachja ko ja anta tsitu anta nduja, tsinganta ntachja ko xrondachronta: “Tantje enta ntachja.” Ko je e ndo xrondachro ndo: “Jan an nóna i no juixin ja anta.”

26 Ko tjume e ja anta tsjangixinnta xrondachronta: “Jan anna kui ina ko juinena ngajinnta, ko ja anta juinchequannanta chijnie ndo Dio ngatja cha o tjananana.”

27 Ko je e ndo xrondachro ndo: “Jan an ó ntatjunta nóna i no juixinnta. Satjixinnta ti ritjén jan an, ja anta ndako a nche enta.”

28 \*Nti a ja anta xrotsjanganta ko tseto nenonta nchakon tsikonnta ndo Abraham, ko ndo Isaac, ko ndo Jacob, ko kain sen profeta bake e sa ó, ste sen ngajní ti tetuan an ndo Dio, ko ja anta tsake enta nduja.

29 Ixi tsi xin chujni kain nunte; chuya, retuya, ku e ko no níjin ko tsake e na sine na ti tetuan an ndo Dio.

30 \*Méxin itsjé na jai xro an juachaxin chóna na, ko je e ni me e ícha ijié juachaxin xrochonda na; ko kaxin na jai tsango ijié juachaxin chóna na, ko ni me e íxro an juachaxin xrochóna na.

*Ndo Jesús tsjanga ndo ixi tjajna Jerusalén  
(Mt. 23:37-39)*

31 Nchakon me e ikjui kaxin xi fariseo ko ndache xa ndo Jesús:

—Satjixinnta nti i, ixi xi rey Herodes tjaun xa naatsónaxónnta xa.

32 Ko ndo Jesús ndachro ndo:

—Satjinta ko ndachenta xi me e, xi ndako a nche e: “Jai ko ndúya xratsantsje espíritué Xixron anxrée chóna chujni, ko sintaxruan an ni ni e, ko nínxin nchakon ó sintajexin xra na.”

33 Ko xrokonda xratsaji jan an jai ko ndúya ko tjenki, ixi kain sen profeta chronga chijnie ndo Dio xrokonda tsenxin sen tjajna Jerusalén.

34 'Ja anta tjajna Jerusalén, ja anta tóñanta kain sen chronga chijnie ndo Dio ko taxinta ixro sen

---

13:28 Mt. 22:13; 25:30. 13:28 Mt. 8:11, 12. 13:30 Mt. 19:30; 20:16; Mr. 10:31.

xruan an ndo Dio kuij xrobingijnanta! jJan an nanaunka fia on xroxra unta xranchi naa kuchika tja o ba chjen en ba ngangí nine e ba, ko ja anta chro anta!

<sup>35</sup> Méxin xrokono anta ixi nchianduinta je o ncha tsitu e ncha; ko xrontatjunta í tsikon antana tsija nchakon ja anta xrondachronta: “Tsango jian ngisen kujxin juachaxien ndo Dio.”

## 14

### *Ndo Jesús juinchexruen en ndo naa xi tsikatjuya*

<sup>1</sup> Naa sábadó nchakon tjoké e na, ndo Jesús ikjui ndo ndo a naa xi fariseo tetuan an, ko nti a chjée na ndo juine ndo. Ko nti a ste ícha xi fariseo stetsjaya xa ndo Jesús.

<sup>2</sup> Kaxon nti a jii naa xi tsikatjuya xa.

<sup>3</sup> Ko ndo Jesús juanchangi e ndo xi tjako chijnie ndo Dio ko xi fariseo:

—¿Á jii juachaxin sinchexruen enni naa ni ni e nchakon tjoké eni?

<sup>4</sup> Ko je e xa tenko xa. Tjume e ndo Jesús itsé ndo itja xi ni e, ko juinchexruen en ndo xa ko ndache ndo xa chao satsji xa.

<sup>5</sup>\*Tjume e ndo Jesús ndache ndo xi fariseo:

—¿Ngixe e ja anta, siá naa kuntajnoanta o naa kuxinta anta tsitsingaya ba naa tuye, á tsantsje anta ba maski nchakon tjoké eni?

<sup>6</sup> Ko xi fariseo jua i juatingíexin xa nge e ndachro ndo Jesús.

### *Chujni tsikiye e na tsij na kiée ni tute e*



<sup>7</sup> Ndo Jesús jitsje e ndo ixi kain ni konchjiñe e ti kiée n̄a, juée n̄a ntaxitaon jian jii ti mesé ni tsikute e, ko tjume e je e ndo ndachro ndo:

<sup>8</sup> —Nchakon itsjinta naa kiée ni tsute e, tjé anta ntaxitaon jii ícha tjenka ni tsikute e, ixi nchéxin tsii naa ngisen ícha tetuan an ko ni me e xrokonda tsake e n̄a nti a.

<sup>9</sup> Ko ngisen kuiya anta ikjuinta kia xrontatjunta n̄a: “Tingatjenxinnta ti ntaxitaon rita anta ixi ña tsake e naa ngisen ji i.” Ko tjume e ja anta tsingatjennta ko tsake enta ti ntaxitaon jii ícha no ndá a ko tsosua anta.

<sup>10</sup> Méxin naa ngisen xrondachro tsji inta naa kiée n̄a, ja anta cháña take énta ntaxitaon ícha no ndá a, ixi jaña ni ntatjunta jui inta kia xrontatjunta n̄a: “Ja anta tatsinganta ti ntaxitaon jii ícha tjenka ni kute e.” Jaña ja anta tsaye enta ícha juasaya ngajinxin\* kain ni ste nti a.

<sup>11</sup> \*Ixi ni ícha sinchejié aséen, ni me e tjinte a n̄a ko tsayé a n̄a juachaxin tsetuan an n̄a; ko ngisen nchejié a aséen, sen me e ícha tsayé e sen juachaxin tsetuan an sen.

<sup>12</sup> Ko ndo Jesús ndache ndo xi tsikiye e ndo tsii ndo kiée xa:

—Ja anta nchakon sinchéñanta naa kia, tiye anta chujni tjentonta, sen ndointa, sen kichuunta, sen ste tjenka ndointa chóna itsjé tomi, ixi sen me e chao sinchéña sen inaa kia ko tsiya anta sen itsjinta sinteku unta sen, ko jaña je e sen sinchekjan sen ti juine sen ndointa.

---

\* **14:10 ngajinxin** delante de **14:11** Mt. 23:12; Lc. 18:14.

13 Méxin, nchakon ja anta sinchéñanta naa kia, tiye enta ni nóa, ni jua i itji, ni jua i tontengi je o, ko ni ntakutsin.

14 Ko jaña ícha juaxruxin xrochondanta asáanta, ixi maski ni me e jua i tsjenga anta na na. Nchakon xroxechón kain ni jian juinche e, ndo Dio tsjenga anta ndo na nge e jian juinche enta ngajin ni nóa.

*Ndo Jesús juakoxin ndo xranchi kon en naa kia ijié*

15 Kuin en naa xi jii tjenka mesa ko ndache xa ndo Jesús:

—Tsango juaxruxin tsake e ni sine ti tsake e kia ti tetuan an ndo Dio.

16 Ko ndo Jesús ndache ndo xi me e:

—Naa xi bake e xa naa kia ijié, ko kuiye e xa itsjé na tsii na sine na.

17 Ko kuij hora sine na, ko xi me e xruan an xa naa xi nchexrée xa tsjirué e xa kain ni ndache xa tsii ixi ó chao jii kain nge e.

18 Ko kain ni me e kuaxi na ndache na xi kuetuan an xa kueya ko ndachro na ixi jua i tsii na. Xi sa ó ndachro xa: “Jan an kue na na nunte, ko xrokonda tsitsja a nunte; toñao anta ixi tsji a.”

19 Ko ndachro inaa xa: “Jan an kue na na ó yuntee kuxinta, ko xrokonda xrotsja a á chao nche e ba ixra; méxin, ndachrjan toñao anta ixi tsji a.”

20 Ko inaa xa ndachro xa: “Jan an nandá kuténa, méxin, jua i itsji.”

21 Ko xi nchexra ikjan xa ngajin xi tsixrua an xa tsjirué e xa na ko chronga xa kain ji i. Ko je e xa kuin en xa nge e tsichro ni xrokui sine, ko koñao xa ko ndache xa xi nchexrée xa: “Jaiko itjia kain

cha o ko kain ndasin chónnda tjanya ji i, ko tikua nti i kain ni nóa ko ni jua i itji, ko ni jua i tontengi je o, ko ni tikon a.”

<sup>22</sup> Tjume e je e xi nchexra ndachro xa: “Ó junta a xranchi kuetuannanta, ko xrají no tsintee ícha chujni.”

<sup>23</sup> Ko tjume e je e xi tetuan an ndache xa xi nchexra: “Itjia kain cha o ko kain cha o tatu ka ngande e tjanya, ko nchekateya na tsii na, ixi jaña xrokaon nía.

<sup>24</sup> Jan an ndachrjan tjaun a tixin in ninaa ni kuiya a ícha sa ó tsii na sine na.”

### *Tangi rué eni ndo Jesucristo*

<sup>25</sup> Tsango itsjé na rué e na ndo Jesús ko je e ndo ngatjia ndo ko ndache ndo na:

<sup>26</sup> \*—Siá xrojan ja anta tjaunnta xroruénanta, xrokonda ícha xrotjaunninta jan an ixi ndotánta, o janáanta, o janchri anta, o chjan anta, o nchri-kichuunta o xi kichuunta, ko kaxon je a ícha xrotjue enta asáanta. Ko siá ícha xrotjaunanta jan an, chao xrokjannta sen chujnina.

<sup>27</sup> \*Ko ngisen tsatsinga i juachjaon tsatsinga jan an ti tsen en na nganito ntacru, ni me e jua i xrokjan na sen chujnina.

<sup>28</sup> Siá xrojannta tjaunnta sinchekonchjiannta naa tjatu o tsango noi, ¿á tsake anta sa ó xroxraxaonnta ngijan in tomi xrokonda tsonchjianxin tjatu o me e?, ko, ¿á chondanta kain tomi xrokonda tsjexixin tsonchjian tjatu o?

<sup>29</sup> Ixi siá na i, je o kuitenta ixro tseta a tjatu o ko juexin tomi, ko í juexin a juinchekonchjiannta

tjatu o me e, ko kain ni tsikon tsjanoanta nā ixi juexin a kuitenta tjatu o.

<sup>30</sup> Ko ni me e xrondachro nā: “Xi ji i juangíxin xa juinchekonchjian xa tjatuée xa ko jue a xa kuite xa tjatu o.”

<sup>31</sup> Q̄ naa xi rey xrokonda itsji xa ko tsē tō xa ngajin inaa xi rey, ¿á je a sa ó xroxraxaon xa ixi á chao ixi ite mil xi soldado chónnda xa, tsē tō xa ngajin xi rey chónnda ikán mil xi soldado?

<sup>32</sup> Xi rey me e xraxaon xa ixi jua i tsjacha xa ngajin xi rey ti kueya xi soldado chónnda xa, méxin xroxruan an xa kaxin nā tsikao nā juajna ngajin xi rey chónnda kueya xi soldado ixi xrajíi xa ikjín, ko jaña tsētō a xa.

<sup>33</sup> Jaña, ja anta kaxon siá tsintue anta kain ti chondanta, jua i xrokjannta chujnina.

*Nchakon xíjnta tojní a xíjnta*

*(Mt. 5:13; Mr. 9:50)*

<sup>34</sup> Xíjnta tsango jian xíjnta tojnínin ti ineni ko nchakon sinchejní a xíjnta, ¿nge e tsojnínin ti sineni?

<sup>35</sup> Méxin nchakon tsojní a xíjnta ninge o tsonda xíjnta, tsintjini xíjnta ixi íxro anxrée xíjnta. Ngisen tin en, tsin en sen jian.

## 15

*Juako ndo Jesús naa chijni kondee naa kutuchjon tsikitjáña*

*(Mt. 18:10-14)*

<sup>1</sup> \*Konchjiñe e xi xenge e i nā tomi ti tjanchia xi tetuan an, ko kaxon kueya ni ndako a nche e

konchjiñe e na ngajin ndo Jesús ixí tsin en na ti ndachro ndo.

<sup>2</sup> Tjume e xi fariseo ko xi tjako chijni kuetuan an ndo Dio nichjangí e na ndo Jesús, ko ndachro na:

—Xi Jesús tjento xa kain ni ndako a nche e ko nekao xa na.

<sup>3</sup> Méxin ndo Jesús juako ndo naa chijni ngajin na:

<sup>4</sup> —Ngixe e ja anta, chondanta naa ciento kutuchjon, ko sinchetjáñanta naa ba, ¿á tsintue anta ko noventa y nueve ngataon ijngi ko itsjinta tsijéenta iko kuitjáña ko tsinchíjanta ba?

<sup>5</sup> Ko nchakon tsinchíinta ba, ja anta tsake enta juaxruxin ko tsamanta ba ngata a ntachaannta,

<sup>6</sup> ko nchakon tsjasonta ndointa, tsiye enta ni tjentonta ko kain ni ste tjenka ndointa ko xron-dachenta na: “Jai tsojuna juaxruxin ixí ó kuitja kutuchjonna, iko kuitjáña.”

<sup>7</sup> Jan an ntatjunta, xraje o jaña Ndotáina jii ngajni ko kain sen ángel tsango ché e sen ixí naa ngisen ndako a juinche e ó titikaon sen chijnie ndo Dio ixí ni noventa y nueve jian nche e, íxrokonda i tsindoxin na.

*Ndo Jesús juako ndo naa chijni kondee naa nchri*

<sup>8</sup> Ko kaxon ndachro ndo Jesús:

—Naa nchri chóna nchra ite tomi ko juinchetjáña nchra naa tomi, je e nchra sinchekakiin nchra xro i ixí tsjée nchra tomi juinchetjáña nchra ko tsajon nchra nguixin ngaxin in nchia tsitjaja nchra tomi juinchetjáña nchra.

<sup>9</sup> Ko hora tsitja nchra tomi, tsiye e nchra kain nchri tjento nchra ko kain ni ste tjenka ndo a

nchra ko xronache nchra kain na: “Tújúna juaxruxin ixi ó kuitja tomi juntatjáña.”

<sup>10</sup> Jan an ntatjunta kaxon ngajni kain sen ángel ne e ndo Dio ste sen juaxruxin nchakon naa ngisen ndako a juinche e tindoxin sen ko ikjan sen ngajin ndo Dio ko titikaon sen chijnie ndo.

### *Ndo Jesús juako ndo kondee naa chajan*

<sup>11</sup> Ko kaxon ndachro ndo Jesús:

—Naa xi kuachóna xa yuu chajan.

<sup>12</sup> Ko chán yuxin ndache chán ndotée chán: “Tata, chjánanta tomi ko nge e tikinixin tsayá a jan an.” Ko tjume e je e ndo konchjeya ndo yui cháje en ndo ti tikinixin en chán.

<sup>13</sup> Tsjé a nchakon kuatsinga, je e chán juinчекji chán ti kuayé e chán ko juejo chán kain tomi, ko tjume e sakjui chán inaa tjajna ikjín ko juinche e chán kain ti ndako a, ko juinчexienxin chán kain tomi kuayé e chán.

<sup>14</sup> Ko jue e chán juinчexienxin chán kain tomi, ko tjume e kují nchakon kain ni tjajna me e tsango kuatse na jinta ko je e chán tsango tangi kuatsinga chán kaxon.

<sup>15</sup> Ko tjume e ikjui chán bijanchia chán ixra ngajin naa xi tjajna nti a. Ko xi me e kotuen en xa chán itsji chán ngataon jngi e xa xrotsje e chán kuchinga.

<sup>16</sup> Ko je e chán tsango baken en chán jinta, ixi xro an nge e jii sineni ko tjaun chán xrojuine chán tjaja bajine kuchinga.

<sup>17</sup> Méxin bake e chán xraxaon chán ko ndachro chán: “¡tsjé ni nчexra ste na ndo a ndotána! ¡Ko

je e na chónḁa na itsjé nge e sine na, ko jan an nti i jiteenxinna jinta!

<sup>18</sup> Tsingatjen ko satsji ti jii ndotána ko xrontatjan ndo: Tata, jan an junta a ti ndako a ngajin ndo Dio jii ngajní ko ngajinnta kaxon.

<sup>19</sup> Ítikinixin a tsin inna chja annta; je o xrokjanna xranchi naa xi nchexráanta, naa xi xro an tjintee.”

<sup>20</sup> Tjume e kua chán cha o ikjan chán ndo a ndotée chán. Ko xrakjín jitiji chán, ndotée chán bikon ndo chán ko bikonóe e ndo chán ko binga ndo ti no jitij chán ko joa ndo chán ko kuetoixin ndo chán.

<sup>21</sup> Ko tjume e je e chán ndache chán ndotée chán: “Tata, jan an junta a ti ndako a ngajin ndo Dio jii ngajní ko ngajinnta kaxon. Méxin, ítikinixin a tsin inna chjan anta.”

<sup>22</sup> Ko je e ndotée chán ndache ndo ni nchexrée ndo: “Taka tikuunta manta ícha jian ko tjintee ko nchekitsáanta chjan na; ko kaxon tsikuunta kuchaningo tseyá itja xjan, ko take énta xjan kate ícha tjintee.

<sup>23</sup> ¡Tsikuunta kuxinta ícha ntao ko to inta ba sintena ko sinchéñana kia!

<sup>24</sup> Ixi chjan na ji i xranchi xrokuen en xjan ko jai xechón xjan. Je e xjan kuitjáña xjan ko jai ikjan xjan. Nchéñana kia ko tújúna juaxruxin.”

<sup>25</sup> 'Ko chán sa ó ngataon ijngi jinche e chán ixra. Ko hora ikjan chán konchjiñe e chán nchia, kuin en chán jii soon ko steté na.

<sup>26</sup> Me e kuiye e chán naa xi nchexra ko juanchangi e chán xa: “¿Sonda jii kia?”

<sup>27</sup> Ko xi nchexra me e ndachro xa: “Ikjan chán kichuunta, ko ndotánta kuetuan an ndo kuen en

kuxinta ícha ntao ixi ikjan chán ko xro an nge e tsikon en chán.”

<sup>28</sup> Ko chán sa ó tsango koñao chán, ko chro a chán tixin in chán nchia. Ko je e ndotée chán kuachrje ndo ko juinchetsen en ndo ñao chán ixi tixin in chán nchia.

<sup>29</sup> Ko je e chán ndache chán ndotée chán: “Ja anta no anta ngijan in nano rinta a ixra ngajinnta ko nai a nichjangí anta, ko ja anta ninaa kubitochjan chjána inta xrojuineki an xi tjento.

<sup>30</sup> Ko jai kuii chjan anta ji i, xjan ndako a juinchexienxin kain tomi ko kain nge e chje énta xjan, juinchexienxin xjan kain tomi kuayé e xjan ngajin nchri ndako a nche e, ko ja anta kon inta kuxinta ícha ntao ko juinchéñe enta xjan kia.”

<sup>31</sup> Tjume e je e ndo ndache ndo chán sa ó: “Chjan na, ja a kain nchakon ritjén ngajin, ko kain ti chonda jan an, ja a tikinixin an.

<sup>32</sup> Ko jai xrokonda tsojuna juaxruxin ko sinchéñana kia ixi xjan kichuua xrokjui xranchi ó kuen en xjan, ko jai xechón xjan ko je e xjan kuitjáña xjan, ko jai kuichuee xjan.”

## 16

*Ndo Jesús juako ndo naa chijni kondee naa xi nche a jian*

<sup>1</sup> Ndo Jesús beki e ndo sen teyuu chrikao ndo:

—Bake e naa xi chóna itsjé tomi, ko xi me e kuachóna xa naa xi bakeki kain tomi ko kain nge e kuachóna xa. Ko naa nchakon ikjui kaxin na kuindache na xi tomie ixi xi nchexrée xa tsango nchexienxin xa tomi ko nge e bake e ngayá itja xa.



<sup>2</sup> Ko tjume e xi tomie kuiye e xa xi nchexrée xa ko ndache kichuu xa: “¿Á nduaxin nche e xranchi bekinana jan an, nchexienxinkua tomina ko nge e chonda jan an? Jai ndachijiana nge e juinche e ixi kain nge e bakée ngaya tjáa ko tomi bake kia ixi ja a ísinche a ixra ngajín.”

<sup>3</sup> Ko tjume e xi bakeki tomi bake e xa xraxaon xa: “¿Nge e sinta a jai ixi je e nchána tsantsjena xa ixra? Jan an ísoji ina sinta a ixra ngataon ijngi, ko tsosua na tsjanchaka a.

<sup>4</sup> Ó nóna nge e sinta a nchakon i xrochonda ixra ixi ni sinke e nchána tsiya na na ndo a na.”

<sup>5</sup> Ko tjume e kuiye e xa ngujngu ni sinke e xi nchée xa. Ko je e xa juanchangi e xa xi kuí sa ó: “Ja a, ¿ngijan in tasinka ngajin nchána?”

<sup>6</sup> Ko je e xa juatingíexin xa: “Jan an tasinka cien barril tikia ndaxi e ko tasinka ndaxi e me e.” Ko je e xi teki tomi ndachro xa: “Itsé xroon ti jitaxin ti tasinka ko nchéñana tuinxin inaa xroon xron-dachro je o tasinka cincuenta ntābarril.”

<sup>7</sup> Tjume e xi teki tomi juanchangi e xa inaa xi sínká: “Ja a, ¿ngijan in tasinka?” Xi me e juat-ingíexin xa: “Cien costa noatrigo.” Ko tjume e je e xi teki tomi ndachro xa: “Itsé xroon ti jitaxin nge e tasinka ko tasintaxian je o tasinka noó ikán\* costa.”

<sup>8</sup> Tjume e xi tomie kono e xa nge e juinche e xi nchexrée xa, xi teki tomi, ko ndachro xa ixi xi ji i jaiko xraxaon xa nge e sinche e xa ixi kain ni ngata a nunte, ni chúxin a chijnie ndo Dio, ícha ña i na ixi tsingijna na ni naxraje o ndakua i nche e xranchi je e na ko sen titikaon chijnie ndo Dio,

---

\* **16:7 ikán** veinte

na i.

<sup>9</sup> Jan an ntatjunta chijni jii: tonda anta kain tomi ko kain nge e richondanta ngata a nunte nti i, ko tomi me e tsjachaxinnta chujni tsjentonta, ixi nchakon tsjexin kain nge e ko kain tomi, ja anta tsaye enta nchia jii ngajni tsarixi inta kain nchakon.

<sup>10</sup> 'Ngisen tayakon en ti kueya i chónnda sen, kaxon chao tayakon en sen ti kueya xrochónnda sen, ko ngisen jua i tayakon en ti kueya i, kaxon jua i tayakon en sen ti kueya.

<sup>11</sup> Méxin siá jua i xrotsje enta jian tomi ko kain nge e jii ngata a nunte nti i, ¿ngisen tsake e ngaya tjáanta tomi nduaxin tjintee?

<sup>12</sup> Ko siá jua i xrotsje enta jian tomie inaa chujni, ¿ngisen xrotjá anta tomi nduaxin tikinixin annta?

<sup>13</sup> \*'Ni nchexra jua i xrochónnda na yuu sen tituen en na, ixi xraningakon en na naa xi tituen en na ko xrotjue e na inaa xa, o chaxro tsitikaon na ngajin naa xa ko xronichjangí e na xi yuxin. Jaña kaxon jua i sinche e na ixra ngajin ndo Dio ko kaxon ícha xrotjue e na tomi.

<sup>14</sup> Ko xi fariseo tsango tjue e xa tomi, méxin juanoa xa ndo Jesús ixi nge e ndachro ndo.

<sup>15</sup> Ko ndo Jesús ndachro ndo:

—Ja anta tjaunnta tsono e na ixi jian ja anta ko je a nduaxin me e, ixi ndo Dio chúxin ndo asáanta. Méxin nge e tsango tjue e chujni, ndo Dio nche a ndo juaxruxin.

*Ícha jian tsitikaonni chijnie ndo Dio*

16 \*'Chijni kuayé e ndo Moisés ko kain ti tsindachro kain sen profeta me e chijnie ndo Dio. Chijni me e baketuan an ko kuachronga kain sen nche e xrée Ndo Dio kuijija nchakon kuij ndo Juan, ndo bikitée nā. Ko jan an tjá anta chijni jian chronga xranchi jii ngajní ti tetua an Ndo Dio. Méxin kain ni kuayé e chijni ji i tsango nche e nā nge e ixí tixin in nā ti no tetuan an ndo Dio.

17 \*Ko jan an ntatjunta ixí ícha tangi a tsitjáña ngajní ko nunte nti i ixí tsitjáña naa letrée chijnie Ndo Dio.

*Ndo Jesús juako ndo ixí chujni tsikute e jua i tsintu e kichuu nā*

*(Mt. 19:1-12; Mr. 10:1-12)*

18 \*'Siá naa xi tsikute e naa nchri ko tsij nchakon tsintu e xa janchri e xa ko tsute e xa inaa nchri, xi me e ndakua i jinche e xa ixí kuitikaon a xa ley kuetuan an ndo Dio. Kaxon, xi tsute e naa nchri tsikintu e ndoxi e nchra, xi me e kaxon ndakua i jinche e xa.

*Xi chóna itsjé tomi ko xi Lázaro, xi nóa*

19 'Bake e naa xi chóna itsjé tomi ko teya xa manta tjintee, ko kain nchakon take e xa kia.

20 Ko nduja ndo a xi me e bake e naa xi nóa bakin in Lázaro; xi me e tsango ni e xa, ko nchijí ntau e xa jirenga.

21 Ko kunia tonchjiñe e ba tuni ba ntau e xi nóa. Ko je e xa tjaun xa sine xa kain ti tsixe e ine xi chóna itsjé tomi.

22 Ko tjume e naa nchakon xi nóa kuen en xa ko sen ángel sabikao sen xa ti juaxruxin ti jii ndo Abraham, ti jii kain sen jian. Ko kaxon xi chónnda itsjé tomi kuen en xa ko juabaa nã xa.

23 Ko xi kuachónnda itsjé tomi kaxon ikjui xa ti ste ni tsiken en ko tsango tangi ste nã nti a. Je e xa tsje e xa noi ko ikjín bikon xa ti jii ndo Abraham ko xi Lázaro.

24 Tjume e kuyako xa ko ndachro xa: “Tata Abraham, tikonóananta, ko xruan annta xi Lázaro sinchetjao xa dedue xa ixi inda ko tsii xa sinchetjao xa nejen ixi tsango tangi ritjén chringi xro i nti i.”

25 Ko ndo Abraham ndache ndo xa: “Chjan na, xraxaoan ixi tsango jian bake e ngata a nunte, ko tsango kueya nge e chaxro kuachonda, ko xi Lázaro tsango tangi bake e xa nti a. Ko jai je e xa nti i jii xa juaxruxin ko ja a tangi ritjén ti jii xroi.

26 Ko kaxon jii naa yaso e tsango ijíé ngusine ti ste jan anna ko ja anta. Méxin sen ste nti i maski xrotjaun sen xrokjui sen tsingijnanta sen, jua i itsji sen; ko ni ste nti a jua i tsii nã nti i ti ste jan anna.”

27 Tjume e ndachro xi kuachónnda itsjé tomi: “Tata Abraham, jan an tinóatána, xruan annta xi Lázaro itsji xa ndo a ndotána

28 ixi nti a ste na ó xi kichian, ko jan an tja on sincheno e sen xa chijnie ndo Dio, ko jaña jian tsitikaon xa, ko je e xa tsi a xa nti i ti jii xro i.”

29 Ko ndachro ndo Abraham: “Xi kichuua chónnda xa xroon ti jitaxin tsikjin ndo Moisés, chijnie Ndo Dio ko ti tsinichja kain sen profeta. Sinchekuanxin xa ko tsitikaon xa xroon me e.”

<sup>30</sup> Ko xi kuachónda itsjé tomi ndachro xa: “Na i, tata Abraham, tsitikaon a xa. Cháña xruan annta naa ngisen ó ndakuen en xronichje e sen xa, me e tsitikaon xa ko tsindoxin xa.”

<sup>31</sup> Tjume e ndachro ndo Abraham: “Siá tjaun a na tsitikaon na chijnie Ndo Dio tsikayé e ndo Moisés jitaxin xroon ko ti tsichronga kain sen profeta, maski tsikon na naa chujni ndakuen en ko xroxechón chujni, tsitikaon a na kaxon.”

## 17

*Nge e nchekateyanta ixi sinche enta ti ndako a  
(Mt. 18:6-7, 21-22; Mr. 9:42)*

<sup>1</sup> Ndo Jesús ndache ndo sen teyuu chrikao ndo:  
—Itsjé nge e jii nchekateyani ixi sinche e ni ti ndako a, ko, ícha tangi tson en ngisen kondeexin sinche eni ti ndako a!

<sup>2</sup> Ni me e xrokuite e tusin na naa ixro ijié ti tontsingaxin ko xrokuitsingangi na ndachaon ixi jaña ísinche a na ixi naa chjan xranoe a xrojuinche e xjan ti ndako a.

<sup>3</sup> \*Taanta juachjaon ixi ja anta sinche anta ti ndako a, ko siá naa ni kichuunta sinche e ti ndako a ngajinnta, tuyakutéenta na; ko siá ísinche a na ti ndako a ngajinnta, ja anta tjáña anta nge e junta anta na.

<sup>4</sup> Maski yaato ndakua i sinta anta na naa nchakon, ko yaato xrondachro na tjáña anta nge e junta anta na, xrokonda yaato xrotjáña anta ja anta kaxon nge e junta anta na.

*Ti chúntiani Ndo Dio me e nche e ícha soji tsinteeni*

<sup>5</sup> Sen kuajikao ndo Jesús ndache sen Ndo:  
—Tingijnaninta ixi ícha xrochuntiana ngajin-  
nta.

<sup>6</sup> Ko je e Ndo Jesús ndachro ndo:  
—Siá ja anta xrochuntianta ndo Dio naa nch-  
inchjaon xranchi naa tsee ka mostaza, ja anta  
xrondachenta naa ntayua: “Ja a tachrjengíxian  
inche nti i, ko xenga ngangí ndachaon”, ko ntaa  
me e tsitikaon ntaa.

*Nge e xrokonda sinche e naa xi nchexra*

<sup>7</sup> Siá naa ja anta, chondanta naa xi nchexra ko  
xi me e tsikikao xa ngataon ijngi yunta o kuitsje e  
xa kutuchjoanta, ko ikjan xa tondó, ¿á xrojan  
ja anta xrondachenta xa: “Xrokuia take é sinte”?

<sup>8</sup> Na i, ja anta xrondachenta xi nchexra me e:  
“Xakon an nchéñanana sine, ko tikia sine ko tsi i,  
ko tjume e take é sinte ja a.”

<sup>9</sup> Ko, ¿á kaxon tájonnta juasaya ngajin xi nchexra  
ixi kuitikaon xa nge e kuituen ennta xa?

<sup>10</sup> Jaña kaxon ja anta, ti tsjexin sinche enta  
kain ti kuetuan annta ndo Dio, xrondachrona:  
“Jan anna xi nchexra xro an tundana; ixi je o  
juinta ana ixra tikinixinnana sinta ana.”

*Ndo Jesús juinchexruen en ndo ite xi kuachóna  
chinlepra*

<sup>11</sup> Ndo Jesús tingakitji ndo tjajna Jerusalén, ku-  
atsinga ndo itsjé tjajna tikinixin en nunte Samaria  
ko nunte Galilea.

<sup>12</sup> Ko tjume e kuiji ndo tjenka naa tjajna, ko  
tjajna me e kuachrjexin ite\* xi níexin chinlepra.  
Ko konchjiñe a xa tjenka ndo, ikjion kuíxi xa.

---

\* **17:12 ite** diez

13 Ko xi ni e me e kuyako xa ndache xa ndo:

—¡Jesús, Maestro, tikonóa nananta!

14 Ko hora bikon ndo Jesús xi ni e ndachro ndo:

—Itjinta ko tjakonta ngajin xi taana tjako ley.

Ko xranchi stetji xi ni e, kuachrje chin en xa ko koxruen en xa.

15 Ko naa xi ni e me e, bikon xa ixí koxruen en xa, ikjan xa ko kuajon xa juasaya ngajin ndo Dio.

16 Bake exin xa ntatuchi in xa ngajin ndo Jesús, ko kuisée xa ngata a nche, kuajon xa juasaya ngajin ndo. Ko xi me e, xi tjajna Samaria.

17 Ko tjume e ndachro ndo Jesús:

—¿Á je a ite xi koxruenxin ichin lepra? ¿No ste xi kaxin?

18 ¿Á je o xi ji i, xi kujxin ikjín, ikjan xa chjée xa juasaya ndo Dio?

19 Ko tjume e ndo Jesús ndache ndo xi me e:

—Tingatjen ko satjia; ixí nduaxin chuntia† ndo Dio, méxin koxruan an.

### *Tsijí nchakon tsituan an Ndo Dio*

*(Mt. 24:23-28, 36-41)*

20 Ko tjume e xi fariseo juanchangi e xa ndo Jesús, ngisa tsijí nchakon tsetuan an ndo Dio, ko ndo Jesús juatingíexin ndo:

—Nchakon tsijí ti tsetuan an ndo Dio, ni chúxin a ndo jua i tsikon na ti tetuan an ndo.

21 Jua i xrondachro na: “Nti i jii”, o “no ji a jii”, ixí ti tetuan an Ndo Dio jii ngaya aséen ni titikaon.

22 Ko tjume e ndache ndo sen teyuu chrikao ndo:

—Tsijí nchakon xrotjaunnta tsikonnta, maski naakua nchakon, chjen en ndo Dio, xjan jongí e

† 17:19 *chuntia* tener fe

xranchi chujni, ixi kain juachaxien xjan, ko ítsikon anta.

<sup>23</sup> Ko xrontatjunta na ixi nti i jii ndo o no jia a jii ndo, ko ja anta tji anta ko rue anta na.

<sup>24</sup> Xranchi tikonni tóngíxin ko tsingasáña nchijí ngajní, jaña tson en nchakon xrokjanna jan an, chjen en ndo Dio, xjan jongí e xranchi chujni.

<sup>25</sup> Ko xrokonda tsango tangi tsónna ko ni jii jai tsitikaon a na ko xrotjaun ana na jan an.

<sup>26</sup> Méxin xranchi kon en nchakon bake e ndo Noé, jaña tson en kaxon nchakon xrokjanna jan an, chjen en ndo Dio, xjan jongí e xranchi chujni.

<sup>27</sup> Ixi nchakon bake e ndo Noé, kain na bajine na ko baki i na ko bakute e na ko bakajon na chjen en na tsute e xjan. Ko ti kuitja nchakon kuixin in ndo Noé ntabarco ko kuania ichrin, kain na kuitu e na nduja ko kuen en na.

<sup>28</sup> Jaña kon en kaxon nchakon bake e ndo Lot, ni me e bajine na ko baki i na, bake na na ko banchekji na, bakenga na ko banchekonchjian na nchia.

<sup>29</sup> Ko nchakon kuachrjexin ndo Lot tjajna Sodoma, kuaniaxin ngajní xro i ko ndagaa azufre, ko me e kuenxin kain na.

<sup>30</sup> Jaña tson en nchakon xrokjanna jan an, chjen en ndo Dio, xjan jongí e xranchi chujni.

<sup>31</sup> \*'Ko nchakon me e xrojan ngisen jii ngata a ndo a, ko xrojan nge e kuintu e na ngaxin in nchia, xroxingajin a na xrotsé na nge e jii ngaxin in nchia. Ko siá xrojan ngisen jii ngataon ijngi, cháña xrokjan ina na ndo a na.



<sup>32</sup> Xraxaonnta xranchi kon en janchri e ndo Lot.

<sup>33</sup> \*Ni ícha tjaun chaxro tsake e ngata a nunte nti i, ni me e tsitjáña nã, ko ngisen tsjée ixi titikaon sen chijnie ndo Dio, sen me e sinchetjáña i sen aséen sen.

<sup>34</sup> 'Jan an ntatjunta ixi tiie me e, ti yuu ngisen stejua ngata a naa kania, naa nã tsajin in nã ngajní ko inaa nã tsitu e nã.

<sup>35</sup> Kaxon, siá jii yuu nchri steta o nchra, naa nchra tsajin in nchra ngajní ko naa nchra tsitu e nchra.

<sup>36</sup> Yuu xi jinche e xa ixrã ngataon ijngi, naa xa tsajin in xa ngajní ko naa xa tsitu e xa.

<sup>37</sup> Ko tjume e chujni kuin en ji i, juanchangi e nã ndo Jesús ko ndachro nã:

—¿Tinó tsoenxin ti rindachronta?

Ko ndo Jesús juatingiexin ndo:

—Ti jii cuerpoe ti tsiken en, nti a tjangataon kuntachrjen.

## 18

*Ndo Jesús juako ndo kondée nchri ka an tjanchia nchra ijie*

<sup>1</sup> Ndo Jesús juinchekuen en ndo sen teyuu chrikao ndo ixi kain nchakon xronichje e sen ndo Dio ko tsonchrjen a sen sinche e sen me e.

<sup>2</sup> Méxin ja in nichja ndo:

—Bake e naa xi juez, kuachónde a xa juasaya ndo Dio, ko chónde a xa juasaya ngajin chujni.

<sup>3</sup> Ko tjajna me e bake e kaxon naa nchri ka an, nchri me e nanaó bakji nchra ngajin xi juez ña i

ixi tjanchia nchra tsoñe e nchra ijie ngajin naa xi baketoka o nchra.

<sup>4</sup> Tsango kueya vez ikjui nchra kuitsje e nchra xi juez me e xixi sinchéña xa ijie, ko je e xa juinche a xa nchra kuenta, ko tjume e xraxaon xi juez me e: “Maski jan an chonda i juasaya ndo Dio ko chonda i juasaya chujni,

<sup>5</sup> xixi nchri ka an jii nanaó tii nchra tjanchia nchra ijie ko tsango tajondaxin nchra ixra, jan an cháña sintaña ijie ngajin nchra xixi jaña ítsi a nchra ícha.”

<sup>6</sup> Ko ndachro ndo Jesús:

—Jaña ndachro xi juez ña i.

<sup>7</sup> Méxin, ¿á je a ndo Dio ícha tsingijna ndo kain sen kuinche e ndo ti tinóatée sen ngajin ndo tiie, nchakon? ¿Á tsonchrjen en ndo tsjate e ndo?

<sup>8</sup> Jan an ndachrjan xixi je e ndo tuinxin tsingijna ndo sen. Ko nchakon xrokjanna jan an, Chjen en ndo Dio, xjan jongí e xranchi chujni, ¿á xrat-sitja ngisen ngata a nunte nti i xrochuntia ngajin jan an?

*Ndo Jesús beki ndo naa chijni kondee xi fariseo ko xi tjáka tomi*

<sup>9</sup> Ko tjume e ndo Jesús beki ndo inaa chijni ngajin kaxin ni xraxaon xixi je e na tsango jian na, ko batjaun a na ni kaxin. Ko ndachro ndo:

<sup>10</sup> —Yuu xixi ikjui xa ni ngo kuinichje e xa ndo Dio. Naa xi fariseo, ko naa xi tjáka tomie tjajna Roma.

<sup>11</sup> Ko xi fariseo me e siin xa, jinichje e xa ndo Dio ja in: “Ndotána Dio, juasianta xixi jan an chonda i ijie xranchi xiche e, xiña i, ko xi ncheye e janchri e ko xranchi xixi tjáka tomi jii.

<sup>12</sup> Jan an ntakatsa a aséenna yuu nchakon ngu-jngu semana, ko tantsjendáa tomi ti tjacha ngu-jngu semana tikinixin en Ndo Dio.”

<sup>13</sup> Ko xi tjáka tomi siin xa nchion ikjín ko jiséya xa nunte, tjendua i ikon xa noi, ko tandé e xa ntakuin xa ko ndachro xa: “¡Ndotána Dio, tikonóananinta ixi chonda ijie!”

<sup>14</sup> \*’Ko jan an ndachrjan ixi xi tjáka tomi, ícha jian ikjan xa ndo a xa ixi ndo Dio juinchemé e ndo kain jíee xa, ko xi fariseo na i. Méxin ngisen ícha tojié, ícha tjinte a nā ngajin ndo Dio. Ko ngisen tojié a, Ndo Dio ícha xrotjue e ndo sen.

*Ndo Jesús juinchenchaon ndo ichjan*

*(Mt. 19:13-15; Mr. 10:13-16)*

<sup>15</sup> Kaxon itsjé nā bikao nā chjen en nā ti jii ndo Jesús ixi je e ndo tsake e ndo itja ndo ngata a jaa xjan. Ko sen teyuu chrikao ndo, kuaxi sen kuyakutee sen ni bikao chjen en.

<sup>16</sup> Ko ndo Jesús kuiye e ndo sen ko ndachro ndo: —Tintu enta ichjan tsii xjan ngajin, ko tingakuen anta xjan. Ixi ngisen tayé e ti tetuan an ndo Dio, sen me e, ikjan sen xranchi naa ichjan.

<sup>17</sup> Nduaxin xrontatjunta ngisen xrokjan i xranchi naa chjan, jua i tsayé e sen ti tetuan an ndo Dio.

*Naa xi tsango tetuan an juao xa Ndo Jesús*

*(Mt. 19:16-30; Mr. 10:17-31)*

<sup>18</sup> Naa xi tetuan an ningue ni judío juanchangi e xa ndo Jesús ko ndachro xa:

—Maestro, jian ja anta, ndachronta, ¿inge e sinta a ixi tsjacha tsarichón kain nchakon?

19 Ko tjume e ndo Jesús ndachro ndo:

—¿Sonda ndachijiana ixi jianna? Xro an ngisen jian, je o Ndo Dio jian ndo.

20 Ó no a chijnie ndo Dio: “Xrochonda ia inaa nchri, tóñai a chujni, tema ia, je a xruxon tjankata a ijie inaa chujni, ko chónde e juasaya ndotáa ko janáa.”

21 Ko je e xa ndachro xa:

—Kain ña ó junta a, xranchiona.

22 Ko kuin en ndo Jesús nge e ichro xa, ko je e ndo juatingíexin ndo:

—Xratitjáña naa nge e sinche e. Nchekjia kain nge e chonda ko tonchjeye é ni nóa tomi me e, ko xrochónda nge e ícha tjintee ngajní. Ko tjume e tsji ia rua ñana.

23 Ko xi me e kuin en xa nge e ichro ndo ko tsango kuechín xa ixi itsjé nge e tjintee chónda xa.

24 Ko ti bikon ndo Jesús ixi tsango kuechín xa, ndachro ndo:

—¡Tangi tixin in naa ngisen chónda itsjé tomi ti tetuan an Ndo Dio!

25 Ícha tangi a tixin in naa kucamello ikon naa ntachika ixi naa ngisen chónda itsjé tomi tixin in ti tetuan an ndo Dio.

26 Ko ni kuin en ji i ndachro ña:

—¿Ngisen chao tixin in ti tetuan an ndo Dio tjume e?

27 Ko juatingíexin ndo Jesús:

—Nge e jua i sinche e chujni, Ndo Dio chao sinche e ndo.

28 Ndo Pedro ndache ndo ndo Jesús:

—Nchána, jan ana kuintu ana kain ti kuachondana ko rua ananta.

29 Ko ndo Jesús juatingíexin Ndo:

—Jan an nduaxin ntatjunta ixi ngisen kuintu e ndo a, ndotée, ko janée, xjan kichuu, o janchri e, chjen en ixi kondeexin chijnie Ndo Dio ko nge e tetuan an ndo,

30 sen me e ícha itsjé nge e tsayé e sen jai ti jichón sen ngata a nunte nti i, ko kaxon tsayé e sen nchakon tsj̄i ti tsechónni kain nchakon.

*Ndo Jesús íjngo ndachro ndo tsen en ndo*

*(Mt. 20:17-19; Mr. 10:32-34)*

31 Ndo Jesús kuiye e ndo sen teyuu chrikao ndo ko ndachro ndo:

—Jai satsjina tjajna Jerusalén. Ko nti a tsoenxin kain ti tsikjin sen profeta ó sa ó xranchi sinchekaona, chjen en ndo Dio, xjan jongí e xranchi chujni.

32 Ko ni me e tsajon n̄a xjan ngajin ni je a tjajna judío ko ni me e tsjanoana xjan, ko chinga xron-dache n̄a xjan, ko tsikitéena n̄a xjan ndatée n̄a.

33 Tsaxi n̄a xjan nt̄aa ko iton ko naatsóñaxón n̄a xjan. Ko nchakon nínxin xroxechón xjan.

34 Ko sen teyuu chrikao ndo Jesús kuienxin a sen ti nichja ndo, ixi jua i xrokuienxin sen.

*Ndo Jesús juinchexruen en ndo tjajna Jericó naa xi jua i tikon*

*(Mt. 20:29-34; Mr. 10:46-52)*

35 Ko nchakon ndo Jesús ko sen teyuu chrikao ndo kuiji sen tjenka tjajna Jericó, ko ngande e cha o bake e naa xi jua i tikon ko jitjanchiaka a xa.

36 Ko je e ti xi tikon a kuin en xa ixi jitatsinga itsjé n̄a, méxin juanchangi xa nge e jiton en.

<sup>37</sup> Ko ndache na xa ixi ndo Jesús tjanya Nazaret jitatsinga ndo nti a.

<sup>38</sup> Ko tjume e je e xa séen kuyako xa:

—¡Jesús, kuachrjenixinnta ndo David, tikonóananinta!

<sup>39</sup> Ko ni stetaon nti a koñao e na xa ko ndachro na ixi xrotenko xa ko je e xa ícha séen kuyako xa:

—¡Ja anta kuachrjenixinnta ndo David, tikonóananinta!

<sup>40</sup> Ko tjume e ndo Jesús chón en ndo ko kuetuan an ndo ixi tsika o na xi tikon a. Ko bika o na xa ti jii ndo, ko tjume e je e ndo Jesús juanchangi e ndo xa:

<sup>41</sup> —¿Nge e tjauan sinta a ixi ja a?

Ko xi tikon a juatingíexin xa:

—Nchána, jan an tja on tsikon.

<sup>42</sup> Ko ndo Jesús ndachro ndo:

—¡Chao tsikuan!, ixi chuntia me e koxruan an.

<sup>43</sup> Hora me e xi jua i bakikon chao bikon xa, ko rué e xa ndo Jesús, ko jitajon xa juasaya ngajin ndo Dio. Ko kain ni bikon nge e juinche e Ndo Jesús kaxon kuajon na juasaya ngajin ndo Dio.

## 19

### *Ndo Jesús ko xi Zaqueo*

<sup>1</sup> Ko Ndo Jesús kuiji ndo tjanya Jericó ko kuixin in ndo tjanya me e.

<sup>2</sup> Ko nti a bake e naa xi chón da itsjé tomi ndatin in xa Zaqueo. Xi me e tetuen en xa xi tjejo tomie xi tetuan an tjanya Roma.

<sup>3</sup> Ko je e xa tjaun xa tsikon xa ndo Jesús. Ko jua i tikon xa ndo ixi tsango itsjé na jii na nti a, ko je e xi Zaqueo jiné a xa.

<sup>4</sup> Méxin binga xa kuitaon xa ko kuajin in xa naa ntaa ndatin in sicómoro, ti no tsatsinga ndo Jesús.

<sup>5</sup> Ko hora kuatsinga ndo Jesús, tsje e ndo noi ti jii xi Zaqueo ko ndachro ndo:

—Zaqueo, jaiko xingajian ixi jai xrokonda tsituna ndúya.

<sup>6</sup> Tjume e xi Zaqueo jaiko xingajin xa, ko tsango juaxruxin bake e xa ixi ndo Jesús tsitu e ndo ndo a xa.

<sup>7</sup> Ko kain na bikon na, ko kuaxi na nichja na ixi sonda ndo Jesús itsji ndo tsikitu e ndo ndo a naa xiña i.

<sup>8</sup> Ko tjume e xi Zaqueo ndache xa ndo Jesús:

—Nchána, jai xrotjá a ni nóa ngusinexin kain nge e chonda, ko siá xrojan ngisen juntaya a ko kue é tomie na, jan an tsonkjan an na noóxin ícha ti kuantsja a na.

<sup>9</sup> Ko ndo Jesús ndache ndo xi Zaqueo:

—Jai ndo Dio tsantsje ndo jíee ni ste nchia nti i, ixi kaxon xi ji i kuachrjenixin xa ndo Abraham.

<sup>10</sup> \*Méxin, jan an chjen en ndo Dio, xjan jongí e xranchi chujni, jui i bijée ngisen tsikitjáña ko tsantsje ijie chóna sen.

*Ndo Jesús tjako ndo chijnie tomi*

*(Mt. 25:14-30)*

<sup>11</sup> Ko ndajitin en na nge e jindachro ndo Jesús ko beki ndo naa chijni juakoxin ndo, ixi ó kuiji ndo tjenka tjajna Jerusalén, ko ixi je e na xraxaon na ixi ndo Dio ó tsaxi ndo tsetuan an ndo ngata a nunte nti i.

<sup>12</sup> Méxin ndachro ndo:

—Bake e naa xi, xi me e chjen en kaxin ni tetuan an ko sakjui xa ikjín inaa nunte ixi nti a je e xa xrokjan xa rey, ko tjume e xrokjan xa tjajnéé xa.

<sup>13</sup> Ko ó xrokuachrjexin xa tjajnéé xa, méxin kuiye e xa ite xi nchexréé xa ko chjée xa xi nchexra kaxin tomi ngujngu xa, ko ndachro xa: “Nchejinche enta tomi ji i ixra xrokjanjan jan an.”

<sup>14</sup> Ko ni tjajnéé xi me e ningakon en na xa, méxin xruan an na kaxin ni xrondachro: “Tjaun ana xi ji i xrokjan xa rey tsetuanna.”

<sup>15</sup> Ko tjume e, juexin kuayé e xa juachaxin ikjan xa rey, ko nchakon ikjan xa tjajnéé xa kuetuan an xa tsii ni nchexréé xa, ni chjeye e tomi, ixi tjaun xa tsono e xa ngijan in juacha tomi kuajon xa ngajin ngujngu na.

<sup>16</sup> Xi ícha tuinxin konchjiñe e ndachro xa: “Nchána, tomi chjánana juacha íjngo ite tomi xranchi chjánana.”

<sup>17</sup> Ko je e xi rey ndachro xa: “Chao; jian juinche e ixra, ixi jian juinchejinche e ti kueya i tjá a, méxin jai xrotjá a juachaxin tsituan an ite tjajna.”

<sup>18</sup> Tjume e konchjiñe e inaa xi nchexra ko ndachro xa: “Nchána, ti tomi chjánana juacha tomi íjngo na ó tomi xranchi chjánana.”

<sup>19</sup> Xraje o jaña ndachro xi rey xranchi ndache xa xi sa ó kuji: “Jan an xrotjá a juachaxin tsetuan an na ó tjajna.”

<sup>20</sup> Ko tjume e konchjiñe e inaa xi nchexréé xa ko ndachro xa: “Nti i jii tomia chjánana. Jan an kuatsín tomi ngaya naa panito

<sup>21</sup> ixi jan an xronkana ixi ja a naa xi tsango



ntue e, ko tatsían nge e je a na a, ko tatsían ti no bengia ia.”

<sup>22</sup> Tjume e xi rey ndachro xa: “Ja a je a naa xi nchexra jian, ixi ti ndachrua ja ua kuama ijie. Siá ó no a ixi jan an tsango ntuena, ixi tja o ti no xro an nge e bakée, ko tatsiin ti no bengia i,

<sup>23</sup> ¿sonda bikan ia tomina naa nchia nchejinchexina tomi ixra ixi jaña nchakon xrojui i xrokuaya tomina ko ti juacha tomi?”

<sup>24</sup> Ko ndache xi Rey ni ste nti a: “Tantsje enta xi ji i tomi kuayé e xa ko tájonnta tomi ngajin xi chónnda ite tomi.”

<sup>25</sup> Ko je e na ndachro na: “Nchána, ¿sonda tsayé e je e xa siá ó chónnda xa ite tomi?”

<sup>26</sup> \*Ko xi Rey ndachro xa: “Jan an ntatjunta, ngisen chónnda itsjé, sen me e ícha tsayé e sen, ko ni xro an chónnda ko maski ti nchín chónnda na tsachrje e na.

<sup>27</sup> \*Ko kain ni ningakonna, ni tjaun ana ixi jan an xrokuaya a juachaxin tsetuan an ngata a nunte nti i, tikuunta na nti i ixi tsikon xranchi tsen en na.”

*Ndo Jesús kuixin in ndo tjajna Jerusalén  
(Mt. 21:1-11; Mr. 11:1-11; Jn. 12:12-19)*

<sup>28</sup> Juexin ndachro ndo Jesús kain ji i, íjngo kua ndo cha o itji tjajna Jerusalén.

<sup>29</sup> Ko tjume e kuiji sen tjenka tjajna Betfagé ko tjajna Betania, tjenka ijna ndatin in Olivo, je e ndo kuetuen en ndo yuu sen chrikao ndo

<sup>30</sup> ko ndache ndo sen:

—Itjinta nchia ste no yá a, ko ti tsjasonta nti a tsinchínta naa kuntajno jichroá ba nti a ko xraxro an ngisen teta a ba. Tonxindange enta ba ko tikuunta ba nti i.

<sup>31</sup> Ko siá xrojan ngisen tsjanchangi anta ko xrondachro nā: “¿Sonda tonxindange enta kuntajnona?”, ja anta tjatingíexinnta: “Nchánana xrokonde e ndo ba.”

<sup>32</sup> Ko sen xruan an ndo ikjui sen ko kuitja sen kuntajno xranchi ndachro ndo.

<sup>33</sup> Ko stetoxindange e sen kuntajno me e, ku*ij* ni kuntajnoé ko ndachro nā:

—¿Sonda tonxindange enta kuntajnona?

<sup>34</sup> Ko je e sen juatingíexin sen:

—Ixi Nchánana xrokonde e ndo ba.

<sup>35</sup> Ko tjume e bika o sen ba ti no jii ndo Jesús, ko bake e sen ti tetsáa sen ngata a ba ko juinçekita a sen ndo kuntajno.

<sup>36</sup> Ko ti jitatsinga ndo, bingó nā ti tetsáa nā ngatja cha o ti jitatsinga ndo Jesús.

<sup>37</sup> Ko stetonchjiñe e sen ti xingajinxinni ijnā Olivo, tsango itsjé nā sterué e nā ndo Jesús ko ché e nā, méxin séen kuyako nā stetajon nā juasaya ngajin ndo Dio ixi tsango itsjé nge e jian bikon nā juinche e ndo Jesús.

<sup>38</sup> Ko séen ndachro nā:

—¡Itsjé juachaxin chónnda ndo Rey, ndo jiti*i* tsixrua an ndo Dio! ¡Chaxro ko ijié juaxruxin tsake e ngajní ko ijié juasaya tsayé e ndo Dio!

<sup>39</sup> Tjume e kaxin xi fariseo ste xa ngakjen en ni nti a ndachro xa:

—Maestro, tetuen én chujnia xrotenko nā.

<sup>40</sup> Je e ndo Jesús juatingíexin ndo ko ndachro ndo:

—Jan an ntatjunta ixi siá xrotenko chujnina, ixro tsaxi ixro xronichja ixro.

<sup>41</sup> Ti kuiji ndo Jesús tjajna Jerusalén, bikon ndo tjajna, je e ndo tsjangaxin ndo tjajna me e,

<sup>42</sup> ko ndachro ndo:

—¡Siá nchakon jai ja a xrokuichuxianna, xrokuaye é ijié juaxruxin! Ko jai ja a tienxin a ixi jije e ikuan.

<sup>43</sup> Ko tsij nchakon tangi ngajian ixi tsij kaxin tjajna xroningakon an ko tsija a na ko tsingakon an na nguixin ngandajian, ko tse to na ngajian.

<sup>44</sup> Ko tsjacha na tsóña na, ja a ko kain chjan an, ko kain tjatu o ndúya tsonchjejin na, tsintue a na ninaa ixro ngata a inaa ixro. Ixi ja a kuichuxin a nchakon kuij ndo Dio ngajian.

*Ndo Jesús juinchetjúá ndo ni ngo Jerusalén  
(Mt. 21:12-17; Mr. 11:15-19; Jn. 2:13-22)*

<sup>45</sup> Nchakon kuixin in ndo Jesús ngaxin in ni ngo ijié jii tjajna Jerusalén, kuaxi ndo kuantsje ndo kain ni stenchekji ko ni stete na nti a.

<sup>46</sup> Ko ndachro ndo:

—Chijnie ndo Dio ndachro: “Nía ndatin in nchia nichjanaxinna sen”, ko ja anta juinчекjannta ncha ndo e xiche e.

<sup>47</sup> \*Kain nchakon bake e ndo Jesús ngaxin in ni ngo me e, ko banchekuen en ndo chujni chijnie ndo Dio. Ko xitaana baketuan an, ko kain xi tjako ley, ko kain xi baketuan an tjajna me e jitjee na xranchi tsóña na ndo Jesús.

48 Ko kuitja i na xranchi tsoña na ndo Jesús ixi kain na stetin en na nge e jichro ndo.

## 20

### *Juachaxin chóna Ndo Jesús* (Mt. 21:23-27; Mr. 11:27-33)

<sup>1</sup> Naa nchakon ndo Jesús juinchekuen en ndo na ngaxin in ni ngo ijié, xranchi ndo Dio tsantsje ndo ijié chóna na. Hora me e kuiji kaxin xitaana, xi ícha tetuan an, ko xi tjako ley, ko kaxon kaxin xi tetuan an.

<sup>2</sup> Ko ndache xa ndo Jesús:

—Ndachijiana ngisen tjáa juachaxin ixi jaña nche e o, ¿ngisen tjáa juachaxin ji i?

<sup>3</sup> Ko ndo Jesús juatingíexin ndo ko ndachro ndo:

—Kaxon jan an tsjanchangi anta naa nge e ko tjatingíexinnta.

<sup>4</sup> ¿Ngisen xruan an ndo Juan, ndo bikitée chujni? ¿Á ndo Dio o chujni?

<sup>5</sup> Ko kuaxi xa tjakaxin kichuu xa ko ndachro xa:

—¿Nge e tsjatingíexinna? Siá xrondachrona ixi ndo Dio tsixrúa an xi Juan, xi Jesús xrondachro xa: “¿Sonda kuitikaon anta xa tjume e?”

<sup>6</sup> Ko siá xrondachrona ixi chujni xruan an xa, kain ni ste nti i tsoña na ko tsaxinna na ixro, ixi no e na ixi xi Juan naa ndo profeta.

<sup>7</sup> Méxin je e xa juatingíexin xa:

—Nóna ina ngisen xruan an xi Juan.

<sup>8</sup> Tjume e ndachro ndo Jesús:

—Kaxon jan an xrontatju inta ngisen chjána juachaxin nta a ji i.

*Ndo Jesús juako ndo naa chijni kondee xi nchexra ña i*

*(Mt. 21:33-44; Mr. 12:1-11)*

<sup>9</sup> Ndo Jesús kuaxi ndo nichja ndo chijni ji i ko ndachro ndo:

—Bake e naa xi benga ntã tu uva nunte e xa, ko tjume e kuajon xa nunte ngajin inaa xi sinche e xa ixra ko sakjui xa kaxin nano.

<sup>10</sup> Ko kuji nchakon xroxexo itu me e, xruan an xi nunte e naa xi nchexrée xa ixi xrokuayé e xa itu tikinixin en xi nunte e. Ko je e xi kuayé e nunte xro an nge e kuajon xa, ko juaya xa ngajin xi xrokuayé e itu ko bengi kichuu xa.

<sup>11</sup> Tjume e xruan an xi nunte e inaa xi nchexrée xa. Ko kaxon jaña juinchekao na xa, juaya na ngajin xa ko kuyakutee kichuu xa, ko xro an nge e kuayé e xa.

<sup>12</sup> Ko tjume e xi nunte e xruan an xa inaa xi nchexrée xa. Ko kaxon xi me e xraje o juinchekaon na xa ko bengi na xa.

<sup>13</sup> 'Ko tjume e xi nunte e ndachro xa: “¿Nge e sinta a? Xroxruan an chjan na, xjan tsango tjua a. Ko siá tsikon na chjan na tsitikaon na ko tsajon na juasaya\* ngajin xjan.”

<sup>14</sup> Ko je e xi kua nunte, bikon xa chjen en xi nunte e, ndache xa xi kaxin xi nche e ixra: “Xjan ji i tsayé e xjan nunte e ndotée xjan, méxin naatsóñaxón na xjan ixi tsintueina kain nge e tikinixin en xjan.”

<sup>15</sup> Ko tjume e kuantsjexin na xjan ngata a nunte ko naakóñaxón na xjan.

---

\* **20:13 juasaya** respeto, honor

Ko ndo Jesús ndachro ndo:

—¿Nge e sinche e xi nunte e ngajin ni nchexra ña i?

<sup>16</sup> Je e xa itsji xa ko naatsóñaxón xa xi kua nunte, ko tsajon xa nunte e xa ngajin ikaxin na.

Hora kuin en na ji i, ndachro na:

—¡Ndo Dio tsajon a juachaxin tson en ji i!

<sup>17</sup> Ko ndo Jesús jitsje e ndo na ko ndachro ndo:

—Méxin, ¿nge e xrondachro xroon chijnie ndo Dio ti jitaxin ja in?

Ixro jueña o a ni nchekonchjian nchia, ixro me e ikjan ixro ícha tjintee.

<sup>18</sup> Ko ngisen tsitsingata a ixro ji i, ni me e tsaki kain nte e na. Ko siá ixro tsitsingata a ixro ngata a naa ngisen, ni me e xrokjan na xranchi inche.

*Ti xroxenge e xi tetuan an*

*(Mt. 21:45-46; 22:15-22; Mr. 12:12-17)*

<sup>19</sup> Ko tjume e kain xitaana baketuan an ko xi tjako ley tjaun xa xrotsé xa ndo Jesús ixi kuienxin xa contre xa nichja ndo. Ko jua i itsé xa ndo ixi xrakon en xa ni tjajna.

<sup>20</sup> Méxin xruan an xa kaxin xi xrotsjaya xa ndo Jesús ko xi me e sinche e xa xranchi ngisen tsango jian ko nduaxin a, xi me e stechón en xa ixi nchéxin tsin en xa xronichja ndo Jesús naa nge e ndakua i ixi jaña tsjangí e xa ndo ngajin xi tetuan an.

<sup>21</sup> Méxin juanchangi xi stetsjaya ndo Jesús:

—Maestro, nónana ixi kain ti nichjanta ko ti tjakonta me e ti nduaxin ko ti tjaun ndo Dio, ko ja anta tinche anta kaxion chujni, ixi ja anta tjue enta kain na.

<sup>22</sup> Ko jai ndachijinnta: ¿á chao tsjengana na ngajin xi tetuan an, o á na i?

<sup>23</sup> Ko ndo Jesús kono e ndo ixi ndako a stexraxaon xa, méxin ndachro ndo:

—¿Sonda tjaunnta sincheyananta?

<sup>24</sup> Tjako nanta naa tomi. ¿Ngisen ikon jinito nti i, ko nge e jitaxin?

Ko je e xa juatingíexin xa ko ndachro xa:

—Ikon xi César.

<sup>25</sup> Méxin ndachro ndo Jesús:

—Chje énta xi César ti tikinixin en xa, ko chje énta ndo Dio ti tikinixin en ndo tsayé e ndo.

<sup>26</sup> Ko juacha i xa sinchenichja xa ndo Jesús ninaa nge e ndako a ngatoxin ni tjajna jitin en. Ko je e xa juinche e xa juaxruxin xranchi juatingíexin ndo, méxin tenko xa.

### *Xranchi xroxechón chujni*

*(Mt. 22:23-33; Mr. 12:18-27)*

<sup>27</sup> \*Ko tjume e kuiji kaxin xi saduceo kuitsje e xa ndo Jesús. Ko xi saduceo me e titikaon a xa ixi xroxechón chujni tsiken en. Méxin ndache xa ndo Jesús:

<sup>28</sup> —Maestro, ndo Moisés tsikjin ndo xroon ndachro siá naa xi tsikute e, ko ndakuen en xa ko xro an ichjan kuachónnda xa ngajin janchri e xa, xi kichuu xi kuen en xrokonda tsute e xa ngajin nchri ka an me e, ko xrochónnda xa ichjan, ko xjan me e xrokjan xjan xranchi chjen en xi kuen en.

<sup>29</sup> Bake e yaato xi, xi me e kichuu xa. Ko xi sa ó kute e xa janchri e xa ko ndakuen en xa ko xro an ichjan kuachónnda xa ngajin janchri e xa.

<sup>30</sup> Ko xi yuxin kute e xa nchri ka an, ko kaxon ndakuen en xa ko xro an ichjan kuachón<sup>da</sup> xa ngajin nchra.

<sup>31</sup> Ko tjume e xi nínxin kute e xa nchri ka an me e, ko xraje o ndakuen en xa. Ko jaña kon en kain ti yaato xa. Kain xa kuen en xa ko xro an chjan kuachón<sup>da</sup> xa ngajin nchra.

<sup>32</sup> Ko tjume e je e nchra kuen en nchra kaxon.

<sup>33</sup> Méxin nchakon xroxechónni, ¿ngixe i ti yaato xi kuen en xrokjan xixi e nchra, ixi kain yaato xa, kute e xa nchri me e?

<sup>34</sup> Tjume e juatingí<sup>exin</sup> ndo Jesús:

—Nti i ngata a nunte, xi ko nchri tute e na.

<sup>35</sup> Ko ni tsikinixin satsji ngajní xroxechón na, nti a tsute a na.

<sup>36</sup> Ixi nti a ítsen a chujni, nchakon me e chujni xrokjan sen xranchi sen ángel, ko ni me e xrokjan na chjen en ndo Dio ixi ndo Dio juinchexechón ndo na.

<sup>37</sup> Ko kaxon ndo Moisés juako ndo kondee ti xroxechón chujni, ikjin ndo ti jitaxin xranchi naa ntaa kjuáa xro i ko che a ntaa, nti a ndachro ndo Moisés ixi ndo Dio me e ndo Dio titikaon ndo Abraham, ndo Isaac, ko ndo Jacob.

<sup>38</sup> Ko ndo Dio je a ndo Dio ne e chujni ndat-siken en. Ndo Dio, ndo Dio ne e chujni stechón, ixi je e ndo tikon ndo kain na jichón na.

<sup>39</sup> Ko kaxin xi tjako ley ndachro xa:

—Maestro jian ndachronta.

<sup>40</sup> Ko xronka xa ko íxro an nge e juanchangi e xa ndo.

*Ngisen kuachrjenixin Ndo Cristo  
(Mt. 22:41-46; Mr. 12:35-37)*



41 Ndo Jesús ndachro ndo:

—¿Á nduaxin ndachro chujni ixi ndo Cristo kuachrjenixin ndo ndo David?

42 Ndo David tsikjin ndo xroon Salmos ko ndachro ndo:

Nchána ndo Dio ndache ndo Nchána:

“Take é tjenkana ndatsjonxin jian,

43 tsake ejan ni ningakon an chringi tutáa.”

44 Ko siá ndo David ndache ndo ndo Mesías Nchána, ¿sonda tjume e ndo Cristo xrokjan chjen en ndo David?

*Ndo Jesús tjangi e ndo xi tjako ley*

*(Mt. 23:1-36; Mr. 12:38-40; Lc. 11:37-54)*

45 Kain nã stetin en nã ti nichja ndo Jesús ngajin sen teyuu chrikao ndo:

46 —Tsje enta jian xranchi nche e xi tjako ley ko nche anta xranchi je e xa, je e xa nche e xa juaxruxin take e xa manta jine, ko tjaun xa tsajon nã juajna ngajin xa ngataon ndasin, ko take e xa ícha tjenka ngaxin in ni ngo, ko nchakon itji xa kia tjaun xa tsake e xa ti xitaon ícha jian.

47 Ko ixi juancheya xa tantsje e xa nchri ka an ndo a nchra ko tjume e nchexion xa, sée nichje e xa ndo Dio. Xi me e ícha tangi tson en xa nchakon sinchéña ndo Dio ijie.

## 21

*Tomi kuajon naa nchri ka an*

*(Mr. 12:41-44)*

1 Ndo Jesús jii ndo ngaxin in ni ngo ijié ko jitsje e ndo ixi ítsjé ni chónnda kueya tomi ko kueya nge e,

kuij n̄a ko bake e n̄a tomi ngaya n̄tāa tingachjian tomi.

<sup>2</sup> Ko bikon ndo Jesús kuij naa nchri ka an ko nóa nchra, nchri me e bake e nchra yuu tomi nchínchín, tomi tjinte a.

<sup>3</sup> Ko ndo Jesús ndachro ndo:

—Jan an nduaxin ntatjunta ixi nchri ka an nóa, ícha tjintee tomi bake e nchra ixi ti kuajon ikaxin n̄a,

<sup>4</sup> ixi je e n̄a kuajon n̄a ti nge e xe e chón̄da n̄a, ko je e nchri nóa kuajon nchra kain tomi xrojuinexin nchra.

*Ndo Jesús ndachro ndo ixi xrochjejin ni ngo  
(Mt. 24:1-2; Mr. 13:1-2)*

<sup>5</sup> Kaxin n̄a stetjao n̄a ixi ni ngo ijié tsango chaxro ixro tsiki texin ni ngo, ko chaxro jitsje e nge e tsikajon n̄a ngajin ndo Dio. Ko ndo Jesús ndachro ndo:

<sup>6</sup> —Tsij nchakon kain nge e tikonnta tsitjáña, kain xrochjejin ko ninaa ixro tsitu e ngata a inaa ixro.

*Nge e tson en nchakon tsitjáña nunte xasintajni  
(Mt. 24:3-28; Mr. 13:3-23)*

<sup>7</sup> Juanchangi e n̄a ndo Jesús:

—Maestro, ¿ngisa tson en ji i? ¿Ko nge e tsjakoxin ixi jaña tson en?

<sup>8</sup> Ndo Jesús ndachro ndo:

—Tsje enta jian ixi xro an ngisen sintaya anta. Ixi tsij kueya n̄a xrondachro n̄a ixi je e n̄a ndo Cristo n̄a, ko xrondachro n̄a: “Ó tsitjáña nunte.” Ja anta titikaon anta ti ndachro ni me e ko rue anta n̄a.

<sup>9</sup> Nchakon tsin ennta ixi stetóña kichuu naa tjajna ko inaa tjajna, ko kaxon kaxin tjajna steteto na, xronka inta ixi kain ji i sa ó xrokonda tson en ko xratsitjáña i nunte.

<sup>10</sup> Ko ndo Jesús ndachro ndo ikaxin nge e:

—Tseto naa tjajna ko inaa tjajna, naa xi tetuan an naa tjajna ngajin inaa xi tetuan an inaa tjajna.

<sup>11</sup> Ko itsjé no tsanga tsontengi nunte, ko tsango tsatse na jinta ngata a nunte, ko kaxon tsango itsjé ichin tsij ngata a na, ko tsango chinga nge e tsikonni ngajní ko tsango sinchexronkana.

<sup>12</sup> 'Ko kain ji i xratsuen a, ixi sa ó tsenginta na, ko ndako a sinta anta na ko xroxraxin innta na ndo achjiso ko tsingakjinnta na ngajin ni tituan an ni ngo ko tsikaannta na ngajin xi tetuan an, kondanaxin jan an.

<sup>13</sup> Ko kain ji i sinta anta na, ko jaña ja anta chao xrondachronta ixi titikaonntana jan an.

<sup>14</sup> \*Ja anta ta inta juachjaon ko xraxaon anta xranchi tsjatingíexinnta ti nge e tsjanchangi anta na.

<sup>15</sup> Ixi jan an xrontatjunta nge e tsjate enta, chijni jian tsaye enta, ko ninna ni ningakon annta jua i tsjatingíexin na.

<sup>16</sup> Ko kaxon ndotánta, janáanta o xi kichuunta o ngixe i inaa ni ndointa, tsajon na juachaxin naatsóñaxónnta na.

<sup>17</sup> Ko kain ngisen xroningakon annta ixi titikaonntana.

<sup>18</sup> Ko maski jaña tson en, ninna xrajaanta tsitjáña i.

19 Soji tinteenta, me e jaña tsjachanta tsarichonnta kain nchakon.

20 'Ko nchakon tsikonnta ixi tjajna Jerusalén tsixindajin xi soldado, ja anta tsono anta ixi íse a xrochjejin nchijí tjajna me e.

21 Tjume e ni jii nunte Judea xrokonda tsingana satsji nã ngata a jnã. Ko ni ste tjajna Jerusalén kaxon xrokonda satsjixin nã nti a ko ni ste ngataon ijngi íxrokjan i nã tjajna.

22 Ixi kain nchakon me e tsango tsikaon ni titikaon a, ko ijíé juachjaon tsake e, xranchi jitaxin xroon chjnie ndo Dio.

23 ¡Lastu kain nchri jíá ichjan nchakon me e, ko nchri chónnda ichjan stetaki! Ixi tsango ijíé juachjaon tsake e nchijí ngata a nunte, ixi tsango tsikaon ko tangi tson en ni tjajna me e.

24 Ko kaxin sen tsóñaxin nã sen ixi chika espada ko kaxin sen xrotsé nã sen satsikao nã sen ndo achjiso inaa tjajna. Ko ni chúxin a ndo Dio tsingatjangi nã tjajnée ndo, tjajna Jerusalén, tsitjaja nchakon xrokjan chjen en ndo Dio.

*Tsii chjen en ndo Dio, xjan jongí e xranchi chujni (Mt. 24:29-35, 42-44; Mr. 13:24-37)*

25 \*Tjume e tsonoxin nge e tson en chjiixro ko nchanitjao ko nchanotsé. Ko ngata a nunte xasintajni\* kain tjajna tsaã nã juachjaon, ko xroxranka nã ixi tsanga tsontengi ko xroxruin ndachaon.

26 Tsango xroxronka nã ko tsontiye e nã kondeexin xraxaon nã nge e tson en ngata a nunte, ko kaxon kondeexin kain nge e jii ngajní tsontengi.

27 \*Ko tjume e tsikon na ndo Jesús, chjen en ndo Dio, xjan jongí e xranchi chujni, tsii ndo ngata a naa itjuj ko tsika o ndo ijié juachaxin tsetuan an ndo ko kaxon tsango ijié chjiixro tsika o ndo.

28 Ko nchakon xroxrangíxin tson en kain ji i, take énta juaxruxin, ko tsikonnta ixi ndo Cristo ó kuij ndo tsantsjen ndo ijié chondanta.

29 Ko ndachro ndo Jesús inaa chijni:

—Tsje enta xranchi jii ntaa tajon itu higo ko ikaxin ntaa.

30 Nchakon tsikonnta jixechji ntaa, me e no anta ixi ó tsaxi sinche e súa.

31 Jaña kaxon nchakon tsikonnta ixi tsaxi tson en ngajni kain ji i, tsono anta ixi tuinxin tsij ti tsetuan an ndo Dio ngata a nunte.

32 Jan an nduaxin ntatjunta ixi sa ó tson en kain ji i, ko xratsen a chujni jii jai ngata a nunte.

33 Ngajni ko nunte xasintajni tsatsinga, ko ti nichja jan an tsatsinga i, nduaxin tson en.

34 Tsje enta xranchi take énta; xraxaon anta ixi je o xrotjaunna sintenta, xrokoannta ko ti ícha tajon juaxruxin ngata a nunte nti i ko ixi konde-exin me e tsonoa inta ó kuij nchakon tsji i.

35 Ixi nchakon me e tson en xranchi take e naa nocha a itsé kulano, jaña tson en ngajin kain ni ste ngata a nunte.

36 Méxin tsejua i asáanta, ko jian tantje e ikonnta, ko kain nchakon nichje enta ndo Dio ixi jaña chao tsatsinganta juachjaon tsij, ko jaña chao tsonchjiñe enta ngajin chjen en ndo Dio, xjan jongí e xranchi chujni.

<sup>37</sup> \*Taanchakon ndo Jesús banchekuen en ndo na chijnie ndo Dio ngaxin in ni ngo ko tiie bakitu e ndo ti ijna ndatin in Olivo.

<sup>38</sup> Ko kain ni tjajna, ndúyo bakonchjiñe e na ti jii ni ngo ixi tjaun na tsin en na ti ndachro ndo Jesús.

## 22

*Imao juao na xranchi xrotsé na ndo Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Ó jitonchjiñe e nchakon xrangixin kia ti sine na nutja chóna i ti tja in nio, ko kia me e ndatin in Pascua.

<sup>2</sup> Kaxin xitaana xi tetuan an ko xi tjako ley stexraxaon xa xranchi tsóna xa ndo Jesús ixi ste xrakon en xa ni tjajnee xa.

<sup>3</sup> Ko Xixron anxrée kuixin in aséen xi Judas kaxon ndatin in Iscariote. Xi me e naa xi teyuu sen bajikao ndo Jesús.

<sup>4</sup> Ko xi Judas ikjui xa ngajin xitaana, xi tetuan an, ko xi stendáa ni ngo ko kuintejao xa xranchi tsingijna xa xrotsé na ndo Jesús.

<sup>5</sup> Ko xi ste ni ngo tsango bake e xa juaxruxin ko juao xa ixi xrochjée na xi Judas tomi ixi tsingijna xa.

<sup>6</sup> Ko xi Judas kutuexin xa ko jichón en xa xrochronga xa ngiora chao xrotsé na ndo Jesús nchakon xro an ngisen jii.

*Sen teyuu juinekao sen ndo Jesús*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Ko kuij nchakon kia pascua sine sen nutja chónda i ti tja in nio, ko nchakon me e xrokonda tsen en naa kutuchjon sine sen.

<sup>8</sup> Ko ndo Jesús xruan an ndo ndo Pedro ko ndo Juan ko ndachro ndo:

—Itjinta nchekonchjiannta ti sintena kia Pascua.

<sup>9</sup> Ko je e sen juanchangi e sen ndo Jesús:

—¿Tinó tjaunnta tsonchjian ti sintena?

<sup>10</sup> Je e ndo ndachro ndo:

—Hora tsixin innta tjajna ijié, tsetannta naa xi yama xa naa nchixréen inda. Rue énta xa ti nchia tixin in xa.

<sup>11</sup> Ko ndachenta xi ndo a: “Ndo nchekuannana ndachro ndo: ¿Ti no jii nchia sinexinna, jan an ko sen teyuu tajikia an, jai kia Pascua?”

<sup>12</sup> Ko je e xi ndo a tsjako anta xa naa nchia ijié, nchia yuxin jii ngata a noi, ko nchia me e ó chónda nchia kain nge e. Nti a nchekonchjianxinnta ti sintena.

<sup>13</sup> Ko je e sen sakjui sen ko kuitja sen kain nge e xranchi ndachro je e ndo. Ko nti a juinchekonchjian sen ti sinekao sen ndo Jesús kia Pascua.

<sup>14</sup> Ko kuitja hora sine sen, ndo Jesús ko ti sen teyuu chrikao ndo kuiji sen nti a ko bake e sen ti jii ntachaon.

<sup>15</sup> Tjume e ndo Jesús ndachro ndo:

—Jan an tsango jueña o sinekuu kichuuna kia Pascua ti xratsen ana!

<sup>16</sup> Ixi jan an ntatjunta í sine a kia jii tsija nchakon tsetuan an ndo Dio.

17 Ko tjume e itsé ndo naa copa jitjiá vino ko kuajon ndo juasie ndo ngajin ndo Dio, ko ndachro ndo:

—Tin innta ti jitjiá copa ko tonchjeye e kichu-unta.

18 Jan an ntatjunta ixi tsj a vino tsija nchakon ti tsetuan an ndo Dio.

19 Ko tjume e itsé ndo nutja ko kuajon ndo juasie ndo ngajin ndo Dio, ko konchrinjin ndo nio ko konchjeye e ndo sen ko ndachro ndo:

—Ji i cuerpona tsájon tsen en ixi ja anta. Nche enta ja in, me e xraxaonxinnintana jan an.

20 Ko juexin juine sen nutja kaxon kuajon ndo copa jitjiá vino ko ndachro ndo:

—Ti jitjiá copa ji i xrondachro nge e natjúá tsix-intaxin ixi jnina tsintji ixi ja anta.

21 'Ko xi sinchekjina nti i jii xa, rinekj an xa ngata a ntachaon.

22 Méxin chjen en ndo Dio, xjan jongí e xranchi chujni, xrokonda tson en xjan xranchi jitaxin xroon, ko, ícha tangi tson en xi sinchekji xjan!

23 Ko tjume e sen teyuu chrikao ndo kuaxi sen juakaxin kichuu sen ixi ngisen sinche e me e.

### *Ngisen ícha tjintee*

24 \*Ko tjume e juakaxin kichuu sen ixi ngak-jen en sen, ngisen ícha tjintee.

25 Tjume e ndachro ndo Jesús:

—Kaxin xi chúxin a ndo Dio tsango tetuan an xa ngajin ni tjajnée xa, ko xi tituan an ndachro xa ixi tsango jian xa ko tingijna xa tjajnée xa.

26 \*Ko ja anta nche anta jaña. Ixi ngisen ícha

22:24 Mt. 18:1; Mr. 9:34; Lc. 9:46.

22:26 Mt. 23:11; Mr. 9:35.

22:26 Mt. 20:25-27; Mr. 10:42-44.



tjintee, ícha tsitikaon sen xranchi naa chajan, ko chujni ícha tetuan an, me e sinche e ixra xranchi naa xi nchexra.

<sup>27</sup> \*Méxin, ¿ngisen ícha tetuan an, á sen take e sine, o sen tajon sine ngajin ni jii ntachaon? Ngisen sine ti jii ntachaon, ni me e ícha tetuan an na, ko jan an ritjén ngajin ja anta xranchi naa ni nchexra.

<sup>28</sup> 'Ko ja anta bake enta ngajin jan an kain nchakon ko bikonta kain nge e tangi kuatsinga.

<sup>29</sup> Méxin jan an tjá anta juachaxin tsetuan annta xranchi juachaxin kuayá a chjána Ndotána,

<sup>30</sup> \*ko ja anta sintenta ko tsi inta ti jii ntachaon tsétuan an; tsake enta nti a tsetuan annta ko sinchéñanta ijië ngajin teyuu tjajna kuachrjenixin ndo Israel.

*Ndo Jesús chronga ndo nge e sinche e ndo Pedro (Mt. 26:31-35; Mr. 14:27-31; Jn. 13:36-38)*

<sup>31</sup> Kaxon ndachro ndo Jesús:

—Simón, Simón, Xixron anxrée juanchia xa juachaxin tsontsjenga xa xranchi noa trigo.

<sup>32</sup> Ko jan an kuinóatána ngajin Ndotána ixi ja a nduaxin xrochuntiana. Ko nchakon xrokjan tsitikaonna, tingijna sen kichuua ixi kaxon tsitikaon sen ko soji tsintee sen.

<sup>33</sup> Ko ndo Simón ndachro ndo:

—Nchána, jan an xrorua anta ti no tsiku unta na ko siá tsija anta kaxon jan an, ko siá ja anta tsen ennta, kaxon jan an tsen ena.

<sup>34</sup> Ko juatingíexin ndo Jesús:

—Pedro, jan an ntatjua ixi jai xraxrotsje a kun-taxichiká, ja a xrondachrúa ní vez chuxin ana.

*Kuii hora tangi sinchekaon na ndo Jesús*

<sup>35</sup> \*Tjume e ndo Jesús juanchangi e ndo sen chrikao ndo:

—Nchakon xrúan annta, bikon inta puxa, nge e tsinga tomi, ko kate ko, ¿á xrojan nge e xrokonda anta?

Ko je e sen juatingíexin sen:

—Na i, xro an nge e.

<sup>36</sup> Ko tjume e ndachro ndo Jesús:

—Ko jai je a jaña tson en; ngisen chónða tomi, tsama sen tomie sen, ko kaxon puxa tsengachjian sen nge e sine sen; ko ngisen chónða i espada sinchekji sen noxrée sen ko tse na sen chika.

<sup>37</sup> Jan an nduaxin ntatjunta ixi xrokonda tangi tsónna xranchi ndachro chijnie ndo Dio: “Xranchi naa xi ndako a nche e, bikona ndo.” Méxin kain ti jitaxin xroon ixi jan an, xrokonda jaña tson en.

<sup>38</sup> Tjume e sen chrikao ndo ndachro sen:

—Ncháina nti i jii yuu chika espada.

Ko ndachro ndo Jesús:

—Ó chao, í nichja inta ícha.

*Ndo Jesús nichja ndo ngajin ndotée ndo*

*(Mt. 26:36-46; Mr. 14:32-42)*

<sup>39</sup> Tjume e ndo Jesús kuachrxjexin ndo tjajna Jerusalén ko sakjuí ndo ti jii ijna ndatin in olivo xranchi kuanche e ndo, ko sen chrikao ndo rué e sen ndo.

<sup>40</sup> Ko hora kuiji sen nti a, ndachro ndo:

—Ja anta nichje enta ndo Dio ixi tsingijnanta ndo ixi xro an ijié tsamanta.

<sup>41</sup> Ko tjume e ndo Jesús kuachrjendáa ndo kjinxin xranchi ti tjankani naa ixro, ko nti a bake exin ndo ntatuchi in ndo ko nichje e ndo ndotée ndo, ndo Dio.

<sup>42</sup> Ko ndachro ndo:

—Ndotána, siá tjaunnta, tsatsinga kain nge e tangi tsónna ko tsoen a xranchi jan an tja on, tson en xranchi tjaun ja anta.

<sup>43</sup> Ko tjume e konoxin naa ndo ángel kuixin ngajni ixi sinchesoji ndo aséen ndo Jesús.

<sup>44</sup> Ko ixi tangi jiton en aséen ndo Jesús, ícha soji nichje e ndo ndotée ndo ko bakintji ndachjién ndo ngata a nche xranchi ndua gota ijni.

<sup>45</sup> Hora juexin nichje e ndo Jesús ndotée ndo, ko bingatjen ndo kuitsje e ndo ti jii sen kuajikao ndo, kuitja ndo sen stejua sen ixi ijié juachjaon chóna aséen sen.

<sup>46</sup> Méxin ndachro ndo:

—¿Sonda stechrinnta? Xingama anta, ko nichje enta ndo Dio ixi tsingijnanta ndo sinche anta nge e ndako a.

*Itsé na ndo Jesús tsije e na ndo*

*(Mt. 26:47-56; Mr. 14:43-50; Jn. 18:2-11)*

<sup>47</sup> Xrajinichja ndo Jesús, kuii kueya na ko jitaon xi Judas, xi me e naa xi teyuu sen bajikao ndo. Ko konchjiñe e xi me e ngajin ndo Jesús ko kuitoxin xa ndo.

<sup>48</sup> Ko tjume e ndo Jesús ndache ndo xi Judas:

—Judas, ¿á ixi kuitoxiana me e xrondachro sinchekjiana, jan an chjen en ndo Dio, xjan jongí e xranchi chujni?

49 Ko sen chrikao ndo Jesús, bikon sen nge e jiton en me e juanchangi e sen ndo:

—Ncháina,\* ¿á tsjayana ngajin ni ji i xixi chika espada?

50 Ko naa sen chrikao ndo Jesús juincheni e sen naa xi nchexrée xitaana, xi ícha tetuan an, naa chrinjinxon ndatsjon xa ti jian.

51 Ko ndo Jesús ndache ndo sen chrikao ndo:

—Ó chao, tintu enta xa.

Ko tjume e ndo Jesús itsé ndo ndatsjon xi me e, ko juinchexruen en ndo xa.

52 Tjume e ndo Jesús ndache ndo xi tetuen en xitaana, ko xi tetuen en ni ngo ko ikaxin sen tetuan an, xi kuji itsé xa ndo Jesús:

—¿Sonda bikuunta ntaa ko espada xrotséxinninta xranchi jan an xrokjui naa xiche e?

53 \*Kain nchakon bake e ngajinnta ngaxin in ni ngo, ko xro an juinche enta. Ko jai oránta xixi tsitikaonnta xi tetuen en ti naxixe e.

*Ndo Pedro xrondachro ndo xixi chúxin a ndo ndo Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Ko tjume e itsé na ndo Jesús, ko sabikao na ndo ndo a xitaana, xi ícha tetuan an. Ko ndo Pedro kjínxin jirué e ndo.

55 Ko juaaka na xro i ngusine ntasien nchia me e ko kuendajin na xro i. Ko kaxon ndo Pedro bake e ndo ngakjen en na nti a.

---

\* **22:49** *Ncháina* Señor *Ncháina* Jesús o *Ncháina* Dio **22:53** Lc. 19:47; 21:37.

<sup>56</sup> Tjume e naa nchri nche e ixra nchia ngajin xitaana, ti bikon nchra ndo Pedro nti a ti jii xro i, ndachro nchra:

—Kaxon xi ji i chrikao xa xi Jesús.

<sup>57</sup> Ko ndo Pedro ndachro ndo:

—Na i, chuxin a xi me e.

<sup>58</sup> Ko tjume e kuji inaa xi ko bikon xa ndo Pedro ko ndachro xa:

—Ja a kaxon naa xi tajikao xi Jesús.

Ko ndo Pedro ndachro ndo:

—Na i, nduaxin a me e.

<sup>59</sup> Kuatsinga xranchi naa hora ko tjume e ndachro inaa xi:

—Nduaxin xi ji i chrikao xa xi Jesús, ixi kaxon je e xa xi nunte Galilea.

<sup>60</sup> Ko ndachro ndo Pedro:

—Nóna i nge e ndachronta.

Ko xrajnichja ndo itsje naa kuntaxichíká.

<sup>61</sup> Ko tjume e je e ndo Jesús konkjan ndo tsje e ndo ndo Pedro, ko ndo Pedro xraxaon ndo ixi jaña tsindachro ndo Jesús: “Xraxrotsje a kuntaxichíká ja a xrondachrua níi vez chuxin ana.”

<sup>62</sup> Ko tjume e ndo Pedro kuachrje ndo nduja ko tsango tsjanga ndo.

### *Tjanao na ndo Jesús*

*(Mt. 26:67-68; Mr. 14:65)*

<sup>63</sup> Ko xi soldado ti stendáa xa ndo Jesús juaya xa ngajin ndo ko juanoa xa ndo.

<sup>64</sup> Ko bije e xa ikon ndo ko tande e xa iton ngaya ikon ndo ko tjanchangi xa:

—¡Ndachrua ngisen kóña!

<sup>65</sup> Ko tsango chinga ndache xa ndo, ko kuyaku-tee xa ndo.

*Ndo Jesús jii ndo ngajin xi tetuan an ni ngo  
(Mt. 26:59-66; Mr. 14:55-64; Jn. 18:19-24)*

<sup>66</sup> Ko ndúyaxin xra o kain xi tetuan an ni ngo, ko xi taana tetuan an, ko kain xi tjako ley ko bikao xa ndo Jesús ti ste xi tetuan an nti a ko ndachro xa:

<sup>67</sup> —Ndachijiana, ¿á ja a ndo Cristo?

Ko je e ndo ndachro ndo:

—Siá jaán xrondachrjan, ja anta tsitikaon anta.

<sup>68</sup> Ko siá tsjanchangi anta naa nge e, ja anta tsjatingéxin anta, ko tsajanda intana satsji.

<sup>69</sup> Ko jan an, chjen en ndo Dio, xjan jongí e xranchi chujni, xrajai tsake e ndatsjonxin jian ti jii ndo Dio chónnda kain juachaxin.

<sup>70</sup> Ko tjume e kain xi ste nti a juanchangi e xa ndo Jesús ko ndachro xa:

—¿Á ja a nduaxin chjen en ndo Dio tjume e?

Ko ndo Jesús juatingéxin ndo:

—Jaán, ja anta ó ndachronta.

<sup>71</sup> Ko tjume e ndachro xa:

—Íxrokonda i xronichja ikaxin na. Jan anna ó kuin anna nge e nichja xi ji i.

## 23

*Ndo Jesús jii ndo ngajin xi Pilato  
(Mt. 27:1-2, 11-14; Mr. 15:1-5; Jn. 18:28-38)*

<sup>1</sup> Tjume e kain xa bingatjen xa ko sabikao xa ndo Jesús ngajin xi Pilato.

<sup>2</sup> Ko nti a kuaxi juankata a xa ijie ngajin ndo Jesús, ko ndachro xa:

—Jan anna kuitjana xi ji i juinchexronka xa ni tjajnanana. Ko ndachro xa ixi xrokonda i tsjengana i na ngajin xi tetuan an Roma, ko kaxon

ndachro xa ixi je e xa ndo Cristo, ko je e xa naa rey tetuan an.

<sup>3</sup> Ko tjume e xi Pilato juanchangi e xa ndo Jesús:

—¿Á ja a Rey tituen en ni judío?

Ko ndo Jesús ndachro ndo:

—Ja a ndachrua.

<sup>4</sup> Ko tjume e xi Pilato ndache xa xitaana tetuan an ko ni bikao ndo Jesús:

—Xro an ijiē titja jan an ngajin xi ji i.

<sup>5</sup> Ko kain ni ste nti a ícha séen kuyako nā ko ndachro nā:

—Je e xa juincheye e xa kain ni tjajnanāna ixi jée tjako xa. Ko kuaxi juako xa nunte Galilea, ko jai ó nti i tjajna Judea tjako xa.

### *Bikao nā ndo Jesús ngajin xi Herodes*

<sup>6</sup> Ko kono e xi Pilato ji i, ko juanchangi xa á ndo Jesús kuixin ndo nunte Galilea.

<sup>7</sup> Ko ndachro nā ixi nti a tikinixin en ndo, me e xi Pilato kuetuan an xa ixi satsikao nā ndo Jesús ngajin xi Herodes ixi xi me e tituan an nunte Galilea, ko nchakon me e xi Herodes tsikij xa tjajna Jerusalén.

<sup>8</sup> Ko ti bikon xi Herodes ndo Jesús, tsango bake e xa juaxruxin ixi ó sée tjaun xa xrokuichuxin xa ndo ixi tsikin en xa nge e jian kuanche e ndo, ko tjaun xa xrobikon xa naa ixrā ijié\* xrojuinche e ndo Jesús.

<sup>9</sup> Ko xi Herodes juanchangi e xa ndo Jesús itsjé nge e ko je e ndo xro an nge e juatingíexin ndo.

---

\* 23:8 naa ixrā ijié milagro

<sup>10</sup> Ko kaxon nti a konchjiñe e itsjé xitaana tetuan an ko itsjé xi tjako ley ko tsango kueya ijie tjankata a xa ndo Jesús.

<sup>11</sup> Ko tjume e xi Herodes ko kain xi soldadoe xa kuaxi xa chinga juinçekao xa ndo Jesús, ko juanoa xa ndo, ko tjume e juinçekitsa xa ndo manta tetsáa xi rey. Tjume e xi Herodes kuetuan an xa satsjikao na ndo Jesús ngajin xi Pilato Íjngo.

<sup>12</sup> Nchakon me e xi Pilato ko xi Herodes kuaxi tjento kichuu xa ixi seno kuaningakon en kichuu xa.

*Xi tetuan an ndachro xa tsen en ndo Jesús  
(Mt. 27:15-26; Mr. 15:6-15; Jn. 18:39–19:16)*

<sup>13</sup> Tjume e xi Pilato kuiye e xa xitaana tetuan an ko kain ni tetuen en ni judío, ko ni tjajna,

<sup>14</sup> ko ndache xa na:

—Ja anta bikuunta xi ji i, ko ndachronta ixi nchexronka xa ni tjajna, ko ja anta kuin ennta nge e juanchangi a xa, ko jan an kuitja i ijie ngajin xa, xranchi ja anta ndachronta.

<sup>15</sup> Kaxon xi Herodes kuitja i xa ijie ngajin xa, méxin Íjngo xruan an xa xi ji i nti i. Ko ó bikonta ixi xro an ijie chónnda xa tsikinixin tsen en xa.

<sup>16</sup> Ko tsetuan an tsikaon xa, ko tjume e tsajon juachaxin satsji xa.

<sup>17</sup> Ko kia me e, xi Pilato xrokonda tsajanda xa naa xi jixin in ndo achjiso.

<sup>18</sup> Ko kain na kuaxi na kuyako na:

—¡Tajanda ia xi ji i! ¡Tja onna tsajanda xi Barrabás satsji xa!



19 Ko xi Barrabás jixin in xa ndo achjiso ixi juinhexronka xa ni tjajna Jerusalén ko naakóñaxón xa chujni.

20 Ko xi Pilato íjngo ndachro xa tsajanda xa ndo Jesús.

21 Ko je e n̄a ícha séen kuyako n̄a:

—¡Tjankanitua xa nt̄acru! ¡Tjankanitua xa nt̄acru!

22 Nínxin juanchangi xi Pilato:

—¿Nge e ndako a juinche e xi ji i? Jan an titja i ijię tsikinixin tsenxin xa. Jan an tsetuan an tsikaon xa, ko tjume e tsajanda xa satsji xa.

23 Ko je e n̄a ícha séen kuyako n̄a ko ndache n̄a xi Pilato tsjankanito xa ndo Jesús nt̄acru. Séen kuyako n̄a ko kaxon kuyako kain xi taana, xi tetuan an, ko juacha n̄a nge e tjaun n̄a.

24 Méxin xi Pilato juinche e xa xranchi tjanchia n̄a.

25 Ko kuajanda xa xi Barrabás xranchi tjaun n̄a, xi bake e ngaxin in ndo achjiso, xi juinhexronka ni tjajna ko naatsikóñaxón xa chujni. Ko xi Pilato kuajon xa ndo Jesús ixi sinchekao n̄a ndo xranchi tjaun n̄a.

*Juankanito n̄a ndo Jesús nt̄acru*

*(Mt. 27:32-44; Mr. 15:21-32; Jn. 19:17-27)*

26 Hora jitikao n̄a ndo Jesús ixi tsjankanito n̄a ndo nt̄acru, itsé n̄a naa xi tjajna Cirene ndatin in xa Simón. Xi me e nandá tsiki x̄in xa chjakée xa ko juinчекama n̄a xa nt̄acru ko jirué e xa ndo Jesús.

27 Ko jirué e kueya ni tjajna, ko kaxon jirué e itsjé nchri stetsjanga nchra ko stetoyako nchra ixi yaa nchra juachjaon ixi ndo Jesús.

28 Ko ndo Jesús ngatjia ndo tsje e ndo nchra ko ndachro ndo:

—Ja anta nchri tjanya Jerusalén, tsjangaxin antana. Ja anta tsjangaxinnta chjan anta ko ja anta.

29 Ixi tsji nchakon xrondache kichuunta: “Tsango chaxro nchri jua i kuachóna ichjan, nchri xro an ichjan juinchejongí e, ko juinчекaki a nchra ichjan.”

30 \*Tjume e tsaxi na xrondache na ijna “Xrabaninta”; ko xronichje e na itjao ko xrondachro na “Nchekemáninta.”

31 Siá ntayua jaña stenchekao na ntaa, ¿nge e sinchekao na ntaa xema?

32 Ko kaxon bikao na yuu xiche e, xi me e kaxon tsjankanito na xa ntacru tjenka ndo Jesús.

33 Ko kuiji na ijna ndatin in Ntajaa Chujni, ko nti a juankanito na ndo Jesús ntacru ko kao kayui xiche e, naa xi bake e na xa ndatsjonxin jian ti jii ndo Jesús, ko inaa xa bake e na xa ndatsjonxin kjon.

34 Ko ndo Jesús ndache ndo ndotée ndo:

—Ndotána, tjáña anta ti ndako a stenchena na ixi je e na noe a na nge e stenze e na.

Ko xi soldado sondaonxin xa ixro ixi tsono e xa ngisen tsjacha manta jiá ndo Jesús.

35 Ko kueya ni tjanya nti a stetsje e na, ko kaxon xi tetuan an ko kain xa tjanoa xa ndo Jesús ko ndachro xa:

—Ikaxin na bingijna xi ji i, ko jai jua i je o xa tingijna xa aséen xa. Siá nduaxin je e xa ndo Cristo tsixrua an ndo Dio, chao xrobingijna aséen xa.

<sup>36</sup> Ko kaxon xi soldado tjanoa xa ndo Jesús; ko tjoké e xa ndo vino tsikonsán xrokui i ndo.

<sup>37</sup> Ko ndachro xa:

—Siá ja a ndo Rey tetuan an ni judío, ja ua xingajinxian ntaá me e.

<sup>38</sup> Ko nui ti ntaá tsikake e na ndo Jesús tsikake e na naa ntaá nchiín ko tsikjin na tée griego, ko latín, ko hebreo ko ja in ndachro:

“Xi ji i Rey tetuen en ni judío.”

<sup>39</sup> Ko naa xiche e ti yuu xi jitjjan nti a, nichjangí e xa ndo Jesús ko ndachro xa:

—Siá nduaxin ja a ndo Mesías, xingajinxian ntaá me e ko nchexingajianna jan anna kaxon.

<sup>40</sup> Ko inaa xiche e jitjjan nango kuyakutee kichuu xa:

—Ja a, ¿á xrakuen a ndo Dio? Jaina stetjianna nti i ko chinga stenchinana.

<sup>41</sup> Ixi jaña tikinixinna ixi ndako a juntos una. Ko xi ji i xro an nge e ndako a juinche e xa ko nti i jitjjan xa.

<sup>42</sup> Ko xi me e ndache xa ndo Jesús:

—Ja anta Jesús, xraxaonninta nchakon tsjangixinnta tsetuan annta.

<sup>43</sup> Ko juatingíexin ndo Jesús:

—Nduaxin ntatjua ixi jai tsake e ngajin ti chaxro jii ngajní.

*Kuen en ndo Jesús*

*(Mt. 27:45-56; Mr. 15:33-41; Jn. 19:28-30)*

<sup>44</sup> Ko konaxixe e ngata a nunte xrangíxixión ngusine nchakon, ko kuiji hora nínxin.

<sup>45</sup> Ko chjiixro konaxixe e, ko manta jijeexin ti ícha tjúá ndo a ndo Dio chrinjintonga manta.

<sup>46</sup> Ko ndo Jesús séen ndachro ndo:

—Ndotána, ngaya tjáanta takée aséenna.

Ko jaña jinichja ndo, ndakuen en ndo.

<sup>47</sup> Ko hora bikon xi tituen en xi soldado romano nge e kon en, je e xa kuajon xa juasie xa ngajin ndo Dio ko ndachro xa:

—Xi ji i tjúá xa ko nduaxin xro an nge e sínká xa.

<sup>48</sup> Ko kain ni ste nti a, bikon nã nge e kon en, ko sakuitekji nã ko stexronka nã ko tandé e itja nã ntakuin nã.

<sup>49</sup> \*Ko kain ni chúxin ndo Jesús, ko kaxon nchri rué e ndo tsikí xín nchra tjajna Galilea, ikjín ste nã stenchexroan nã kain nge e kon en.

### *Xrabaa ndo Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Ko bake e naa xi tsango jian, ndatin in xa José ko tjajnéé xa tjajna Arimatea tikinixin en Judea. Xi me e kaxon xi tetuan an tjajnéé ni judío.

<sup>51</sup> Je e xi me e jichón en xa kaxon ngisen xroxruan an ndo Dio tsetuan an ngata a nunte. Ko je e xa bake a xa juaxruxin ti nge e juinche e ikaxin ni tetuan an.

<sup>52</sup> Méxin, je e xa kuitsje e xa xi Pilato ko juanchia xa juachaxin ixi satsikao xa cuerpoe ndo Jesús.

<sup>53</sup> Ko juinchexingajin xa cuerpoe ndo Jesús ko kuintsía xa ndo naa manta natjúá tsango tjintee, ko bikao nã ndo ti tsinge nã ngaxin in naa itjaõ natjúá ti xraxro an ngisen xrabaa. Nti a bake e nã cuerpoe ndo Jesús.

<sup>54</sup> Kain jii kon en kóndo viernes ti taxi nchekonchjian nã ixi tsjoké e nã nchakon sábado.

<sup>55</sup> Ko sen nchri rué e ndo Jesús kuixin nunte Galilea, konchjiñe e nchra ko bikon nchra ti no tsikake e na cuerpoe ndo Jesús.

<sup>56</sup> Ko ikjan nchra ndo a nchra sinchekonchjian nchra inda chaxro xraxe ko xroan tsjimá cuerpoe ndo.

Ko nchakon sábado joke e nchra, xranchi tsik-itue en kain ni judío.

## 24

### *Xechón ndo Jesús*

(Mt. 28:1-10; Mr. 16:1-8; Jn. 20:1-10)

<sup>1</sup> Ndúyo domingo, nchakon xrangíxixín semana, ikjan nchra ti tsixrabaa ndo Jesús, ko jitikao nchra inda chaxro xraxe tsijinchekonchjian nchra ko sabikao kichuu nchra.

<sup>2</sup> Ko kuiji nchra nti a ko bikon nchra ixi ixro tsikijeexin itjaō ti no bake e na cuerpoe ndo Jesús nango jii ixro.

<sup>3</sup> Ko kuixin in nchra itjaō ko í kuitja i nchra cuerpoe ndo.

<sup>4</sup> Tjume e tsango xronka nchra ixi noe a nchra nge e kon en. Ko tuinxin bikon nchra yuu xi ste tjenka nchra ko tóngíxin manta steýá xa.

<sup>5</sup> Ko tsango xronka nchra ko kuisée nchra nunte, ko xi me e ndachro xa:

—¿Sonda tjéenta naa sen jichón ngakjen en sen tsiken en?

<sup>6</sup> \*Je e ndo í ko a ndo nti i; xechón ndo. Sintaxiñaonta nge e ntatjunta ndo nchakon bakaji ndo nunte Galilea.

---

**24:6** Mt. 16:21; 17:22, 23; 20:18, 19; Mr. 8:31; 9:31; 10:33, 34; Lc. 9:22; 18:31-33.

<sup>7</sup> Chjen en ndo Dio, xjan jongí e xranchi chujni, ndachro ndo ixi xrokonda xrotsé nã ndo ni tsango ña i ko tsóña nã ndo ko tsenito nã ndo ntacru ko nchakon nínxin xroxechón ndo.

<sup>8</sup> Ko je e nchra xraxaon nchra nge e tsindachro ndo Jesús

<sup>9</sup> ko ikjan nchra ko beki nchra nge e kon en ngajin sen tenaá chrikao ndo ko ngajin ikaxin nã kaxon.

<sup>10</sup> Ko nchri bikao juajna ndatin in nchra María Magdalena, nchri Juana ko inaa nchri ndatin in María, janée ndo Jacobo, ko ikaxin nchri ste ngajin nchra.

<sup>11</sup> Ko sen chrikao ndo Jesús kuitikaon a sen nge e ichro nchra ixi xraxaon sen jée nge e stenichja nchra.

<sup>12</sup> Ko ndo Pedro kuachrjexin ndo nchia ko binga ndo kuitsje e ndo ti no tsixrabaa ndo Jesús. Ko tsje e ndo ngaxin in itjao\* ko bikon ndo ixi xro an nge e jii nti a, je o manta kuitsía cuerpoe ndo Jesús jii nango. Tjume e ikjan ndo nchia ko tsango xronka ndo ixi nge e kon en.

### *Nge e kon en cha o Emaús*

*(Mr. 16:12-13)*

<sup>13</sup> Xraje o nchakon me e, yuu sen chrikao ndo Jesús stetji sen cha o itji tjajna ndatin in Emaús, tjajna me e jii xranchi tenaá kilómetro kjínxin ti jii tjajna Jerusalén.

<sup>14</sup> Ko stetjao sen kondee kain nge e juinçekao nã ndo Jesús.

<sup>15</sup> Ko stenichja sen, ndo Jesús konchjiñe e ndo tjenka sen ko jitikao ndo sen ngatja cha o.

---

\* **24:12** *itjao* cueva

16 Ko maski bikon sen ndo Jesús jua i kuichúxin sen ndo.

17 Ko ndo Jesús juanchangi ndo:

—Ja anta, ¿nge e stetjaunnta ti ya anta cha o? ¿Ko sonda tsango ni e asáanta?

18 Ko naa sen ndatin in Cleofas juatingíexin:

—¿Ja ua ja a jui a tjajna Jerusalén ko noa ia nge e kon en nchakon ji i?

19 Ko ndo Jesús ndachro ndo:

—¿Nge e kon en nti a?

Ko je e sen juatingíexin sen:

—¿Á noa ia nge e kon en ndo Jesús, ndo tjajna Nazaret, naa ndo profeta kuachronga chijnie ndo Dio? Kain nge e nichja ndo ko ti juinche e ndo juako ndo ijíé juachaxien ndo Dio, ko ni bikon kain ji i juinche e na juaxruxin.

20 Ko xi taana xi tetuan an ko xi tetuan an tjajnanana kuajon xa ndo Jesús ngajin xi Pilato xixi tsake e ndo xa nganito ntacru.

21 Ko jan ana xaxa onna xixi je e ndo Jesús xrokuantsjengí e ndo ti tetuan an ni romano ngajin tjajnanana Israel. Ko jai ó chóna ní nchakon kuen en ndo.

22 Ko kaxin nchri barué e ndo Jesús juinchexronkana nchra xixi ndúyo kuitsje e nchra ti no tsixrabaa ndo Jesús,

23 ko kuitja i nchra cuerpoe ndo, ko ikjan nchra nchia ko bekinana nchra xixi yuu sen ángel konoxin sen ngajin nchra ko chronga sen xixi ndo Jesús jichón ndo.

24 Ko kaxin sen kichianna ikjui sen kuitsje e sen ti no tsixrabaa ndo ko kuitja sen xranchi ndachro je e nchra, ko kaxon bikon a sen ndo.

25 Ko ndo Jesús ndachro ndo:

—¡Sonda tienxin anta, ko tsango indao titikaonnta kain ti nge e ndachro sen profeta kuji sa ó!

26 ¿Á je a ixi tsango tangi xrokon en ndo Cristo sa ó ko tjume e xrokuayé e ndo itsjé juasaya ngajní?

27 Ko tjume e juangíxin ndo juinchekuen en ndo sen nge e jitaxin xroon chijnie ndo Dio ti ndachro nge e xrokon en je e ndo Cristo. Ko juangíxixín ndo ti no tsikjin ndo Moisés ko kain sen kuachronga chijnie ndo Dio ó sa ó.

28 Ko kuiji sen tjajna, ko ndo Jesús juinche e ndo xranchi saxrokjui ndo ícha ikjín.

29 Ko je e sen kuinóatée sen tsitu e ndo ngajin sen:

—Tituan anta ngajinna ixi ó kontie.

Ko ndo Jesús kuixin in ndo nchia ko kuitu e ndo ngajin sen.

30 Ko kuintee sen ti mesa ko ndo Jesús itsé ndo nutja ko kuajon ndo juasie ndo ngajin ndo Dio, ko tjume e konchrijin ndo nio ko kuajon ndo nio ngajin sen.

31 Ko hora me e, xitje e ikon sen ko kuichúxin sen ndo Jesús ko je e ndo sajuixin ndo ti ste sen.

32 Ko je e sen ndache kichuu sen:

—¿Á je a aséeina tsango chaxro kono e ti steyá ana cha o ko je e ndo jinichjaina ndo nge e xrondachro chijnie ndo Dio?

33 Ko í chuen a sen ícha; tuinxin kua sen cha o ko ikjan sen tjajna Jerusalén. Nti a kuixin in sen nchia ti ste sen tenaá apóstol chrikao ndo Jesús ko ikaxin sen ste nti a.

34 Ko sen ste ngaxin in nchia chronga sen:



—Ndo Jesús nduaxin xechón ndo, ixi konoxin ndo ngajin ndo Simón Pedro.

<sup>35</sup> Tjume e sen yuu kuixin tjajna Emaús chronga sen nge e kon en ngatja cha o, ko xranchi kuichúxin sen ndo Jesús ti konchrinjin ndo nutja ko konchjeya ndo nio.

*Ndo Jesús konoxin ndo ngajin sen chrikao ndo (Mt. 28:16-20; Mr. 16:14-18; Jn. 20:19-23)*

<sup>36</sup> Ko xra stetjao sen nge e kon en, je e ndo Jesús bake e ndo ngusine ti ste sen ko ndachro ndo:

—¿Á chao stenta?

<sup>37</sup> Ko je e sen ícha xronka sen ixi xraxaon sen ti stetsje e sen naa espíritue ni tsiken en.

<sup>38</sup> Ko je e ndo Jesús ndache ndo sen:

—¿Sonda tsango stexronkanta ko sonda xratikaon anta ngaya asáanta?

<sup>39</sup> Tsje enta tjáana ko tutéena ixi nduaxin jan an. Itseninta ko tsje enta; ixi naa espíritue ni tsiken en chóna i ntao ko intaa xranchi tikonnta chonda jan an.

<sup>40</sup> Jaña ndachro ndo, ko juako ndo itja ndo ko tutée ndo.

<sup>41</sup> Ko je e sen xratitikaon a sen nge e stetsje e sen ixi tsango juaxruxin ste sen ko xrastexronka sen; méxin, je e ndo ndachro ndo:

—¿Á chondanta nge e sineni?

<sup>42</sup> Ko je e sen chjée sen ndo tu o kuchee tsichjáanta a xro i ko tu o katje chóna tsjeen kuchji i.

<sup>43</sup> Ko je e ndo itsé ndo nge e kuajon sen ko juine ndo ko je e sen stetsje e sen.

<sup>44</sup> Ko tjume e ndachro ndo:

—Nchakon bake e ngajinnta ntatjunta kain nge e xrojuinchenā nā xranchi tsikjin ndo Moisés ko tsikjin sen profeta ko ti jitaxin xroon Salmo.

<sup>45</sup> Ko tjume e je e ndo kuajon ndo juachaxin ixi tsienxin sen ti jitaxin xroon chijnie ndo Dio,

<sup>46</sup> ko ndachro ndo:

—Ja in jitaxin ixi ndo Cristo xrokonda tsen en ndo ko nchakon nínxin xroxechón ndo.

<sup>47</sup> Ko juachaxien ndo ko nombrée ndo xrokonda xronichja nā tsin en kain ni tjajna xasintajni ixi jaña xrokjan nā tsitikaon nā ndo Dio, ko tsumé e kain ti ndako a nche e nā. Xroxrangíxixión tsin en ni tjajna Jerusalén.

<sup>48</sup> Ko ja anta ti bikonta kain ji i xrokonda xronichjanta ti nge e bikonta.

<sup>49</sup> \*Ko jan an xroxruan annta ti nge e ndachro Ndotána. Ja anta tituan anta nti i tjajna Jerusalén tsayéjanta ijié juachaxin tsj xín ngajní ko me e Espíritue ndo Dio.

*Ndo Jesús sakjui ndo ngajní*

*(Mr: 16:19-20)*

<sup>50</sup> \*Ko kuachrjexin sen tjajna me e ko ndo Jesús bikao ndo sen tjajna Betania. Nti a juatsi in itja ndo ko juinchenchaon ndo sen.

<sup>51</sup> Ko xrajinchenchon ndo sen, je e ndo kuachrjendáa ndo, ko kuaxi kuajin in ndo ngajní.

<sup>52</sup> Ko je e sen kuajon sen juasaya ngajin ndo Jesús. Ko tjume e ikjan sen tjajna Jerusalén, ko tsango ijié juaxruxin chóna aséen sen.

<sup>53</sup> Ko kain nchakon bake e sen ngaxin in ndo a ndo Dio ko tajon sen juasaya ngajin ndo.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f